

4. Pu Chalrosanga Ralte, MLA.

Hengte hi tun Session chhunga Panel of Chairmen tur te an ni. Awle, vawiina kan tih tur chu kan zo ta a, kan chawl leh ang a, naktuk ni 16.3.2016 chawhma dar 10:30 ah heta thukhawm turin kan kal leh dawn nia. Siting is adjourned.

Sitting adjourned at 12:15 P.M.

**SEVENTH LEGISLATIVE ASSEMBLY OF MIZORAM
(EIGHTH SESSION)**

LIST OF BUSINESS

FOR SECOND SITTING ON WEDNESDAY, THE 16th MARCH, 2016
(Time 10:30 A.M. to 1:00 P.M. and 2:00 P.M. to 4:00 P.M.)

OBITUARY

1. **Pu LAL THANHAWLA** to make obituary references on the demise of the following dignitaries :
 - 1) **Shri Mufti Mohammad Sayeed**, Chief Minister of Jammu and Kashmir.
 - 2) **Shri Purno Agitok Sangma**, Member of Parliament (Lok Sabha) and former Speaker of Lok Sabha.

QUESTIONS

2. **Questions** entered in separate list to be asked and oral answers given.

DISCUSSION ON MOTION OF THANKS

3. Discussion on motion of thanks on the Address of the Governor (to be concluded).

NGURTHANZUALA

Secretary

....

SPEAKER : Tin, unaute u, kan ngen a che u, dan ang lova awmte chu zilh ula, rilru te te chu fuih ula, chak lote chu tanpui ula, mi zawng zawng lakah dawhthei takin awm rawh u. (I Thessalonika 5:14-15)

Vawiin chuan kan ram hruaitute pahnih Pu Mufti Mohammad Sayeed, Chief Minister, Jammu and Kashmir leh Pu Purno Agitok Sangma former Lok Sabha Speaker te sunna kan nei dawn a. Anni pahnih chungchanga sawi tur a neih ang angte sawi turin kan House Leader kan sawm ang a, khawngaihin an pahnih chanchin hi vawi khata sawi chhuah mai ni sela. Tunah kan Chief Minister zahawm tak Pu Lal Thanhawla i sawm ang u.

Pu LAL THANHAWLA, CHIEF MINISTER : Pu Speaker, vawiinah hei kan ram hruaitu lar tak takte, pakhat zawk Pu Sangma phei hi chu kan ram pawhin kan hriat lar em em kan tlangmi pui, kan Northeast pui Mizoramah pawh lo zin tawh a ni nghe nghe a, ani sun an ngai hi a pawiin a lungchhiat thlak hle a.

A hmasain Pu Mufti Mohammad Sayeed, Chief Minister, chungchang hi kan sawi hmasa ang a. Pu Speaker, a life sketch min tihsak hi ka Mizotawng thiam dan nen a inmil lo khawp mai a. Chuvangchuan, ka duh angin ka correct ngam si lova, ka sawi bah deuh pawhin min hrethiam dawn nia. Helai rawn ziaktute Mizotawng leh ka Mizotawng hi a inmil vak lova.

Pu Mufti Mohammad Sayeed, Chief Minister, Jammu and Kashmir hi ni 7th January, 2016 zing dar 7:30 ah taksa peng hrang hrang chaklohna (multi organs failure) avangin AIIMS Hospital, New Delhi-ah kum 79 mi niin a boral a.

Pu Mufti Mohammad Sayeed hi Pu Mufti Ghulam Mohammad a fapa a ni a, January ni 12, 1936-ah Bijbehara, Anantnag District, Jammu and Kashmir-ah a piang a, Pi Begum Gulshan Nazir nen 1955-ah an innei a, fanu pathum leh fapa pakhat an nei a ni.

Zirna lamah chuan Pu Speaker, MA, LLB. a ni a, S.P. College, Srinagar leh Aligarh Muslim University-ah te a zir thin a, hun engemaw chen chu Dan lam thiam a nih avangin a practice nghe nge a ni. Zirlai a nih lai atangin Jammu and Kashmir National Conference Party tan theih tawpin a thawk thin a. Kan hriat angin National Conference Party hi khulaiah regional party niin chak tak a ni a, rei tak a sorkar zawn a ni.

Pu Mufti Mohammad Sayeed hian politics hi kum 1952 atangin a luh chilh tan a. Jammu & Kashmir National Conference Party chu bansan in Democratic National Conference Party a zawm a, hun engemaw chen hnu kum 1960-ah a thawhpuite nen National Conference Party chu an zawm leh a. Kum 1962-ah Dachhanpura Constituency atangin MLA atan thlan tlin a ni a, Goodwill Mission-ah member niin November 1965-ah MP ho nen ram palai hna thawkin South East Asia ram hrang hrang an tlawh a ni. Kum 1967-ah General Election-ah MLA atan thlan nawn leh a ni a, hemi tum hian Deputy Minister niin Agriculture te, Co-operation Department a enkawl a ni. Politics thil a ngaihndan inan lohna avangin Ministry hi a chhuahsan leh a. Kum 1972-ah Jammu & Kashmir Legislative Council member-ah thlan tlin a ni a, Council of Minister ah lut leh in Public Works Department, Urban Development Department te leh Education Department te a enkawl a ni.

Kum 1975-ah Congress Legislature Party leader a ni a, Pradesh Congress-ah leader a ni bawk. Kum 1985 bye-election-ah R.S. Pura Constituency atangin MLA atan thlan tlin leh a ni a, Kum 1986-ah Rajya Sabha M.P. atan thlan tlin leh a ni a, Union Cabinet-ah a lut a, Pu Rajiv –a hunlai kha a ni a Tourism te, Civil Aviation Ministry te a chelh a ni. Kum 1987-ah Congress Party chhuahsanin Rajya Sabha MP a nihna pawh a ban san a. Tichuan, Pu V.P.Singh-a kaihhrainain Janata Dal party a zawm a, kum 1989-ah Lok Sabha MP atan Janata Dal party ticket-in Muzaffarnagar (Uttar Pradesh) Constituency atangin thlan tlin leh a ni a. Home Minister hna 2.12.1989-10.11.1990 thleng a chelh a. India rama Muslim Home Minister hmasa ber a ni.

Heng hun lai hi chuan state hrang hrangah Governor an dah dawn hian at least minimum courtesy Chief Minister te hnenah, ‘chumi khami chu Governor-ah rawn dah kan tum a, engnge in ngaihndan,’ te an rawn ti a. Kan ngaihndan ni chiah lo mahse anmahni an thu thin avangin, ‘a tha alawm,’ kan lo ti

mai thin a. Ani pawh hian min lo rawn nghe nghe a ni. Tun NDA sorkar hi chuan an ti ngai ta lova, an duh duh an rawh dah tawp tawp mai a. Keini hi kum khat chhunga Governor record ngah ber kan lo nih phah ta a ni. India rama Muslim Home Minister hmasa ber a ni. Hemi hnu hian Janata Dal Party hi chhuahsan lehin Indian National Congress-ah bawh a lut leh a, 1998 Lok Sabha-ah Indian National Congress ticket-in Anantnag Constituency atangin MP a thlan tlin leh a ni. Congress hi chhuah san leh in 1999-ah Lok Sabha election-ah independent candidate-in a ding leh a, hemi tum hian a tling zo ta lo a ni.

Pu Speaker, kum 1999 July thla ah Jammu & Kashmir Peoples Democratic Party (JKPDP) hi a din a a fanu te nen, an party thar hi a thang duang hle a. A thupui ber chu remna leh zahawmna, mipuite hmakhua hai langa rualkhai taka ram development kal tir a ni. Hei hian kan mipuite rilru pawh a hneh hle a, kum 2002 a lo her chhuah chuan Indian National Congress nen coalition sorkar an din a, 2.11.2002-2.11.2005 chhung Chief Minister a ni. Kum 2008 leh 2014-ah pawh MLA atan Anantnag Constituency atangin thlan tlin leh a ni a. Kum 2015 1st March khan BJP nen sorkar intawm siam lehin Chief Minister a ni a, tum hnih Chief Minister a nihna a ni ta a nih chu. He hna hi a thihni thlengin Pu Speaker, a chelh ta a ni.

Kum 2015 December ni 24-ah a hriselna a that tawh loh avangin AIIMS Hospital, New Delhi-ah admit a ni a, thatlam aiin tlakhniam lam a pan zel a, hun engemaw chen khawl hmanga thawh tir a nih hnu in a taksa bung hrang hrang chak lohna (multi organs failure) vangin 7th January 2016 zing dar 7:30 khan a thi ta a ni.

Hemi a thih atang hian J & K ah sorkar mumal a ding thei ta lo va, tun thleng hian, a ai hi a fanu Mehbooba Mufti in a awh a. BJP nen vawi engemaw zat an inbe tawh nain tun thleng hian an la inrem thei lo va. Hei hi ka'n sawichhuah duhna chhan chu, Kashmir politics-ah a pawimawh zia, dominant

figure a nih zia lantirtu pakhat a ni a. Tin, ani hi a mimal tak pawhin kan inhre tha hle a, Srinagar a kan kal te pawhin an inah vawi hnih/vawi thum chaw kan ei a, chutiang chuan a mimal pawh kawm nuam tak, pa fel tak a ni a. Vawiinah ani sunna kan han hmang hi a lungchhiat thlak hle a, India tan mi uiawm tak a ni. Kashmir ah khuan separatist, inlakhnan tum leh Pakistan a bei duh leh India khua leh tui nih duh khu an inbei deuh reng a. Ani hi Mosolman nimahsela India rama rinawmna loyalty pe tlat a ni a, chungte avang chuan Home Minister lai pawh a ni thei a ni.

Chutiang mi chu vawiinah kan lo chan ta a, a sunna leh kan ui thu sawina hun tha tak Pu Speaker, min pek avangin a lawmawm ka ti a. A chhungte a kalsan te Pathian-in thlamuanin awmpui se tih hi kan duhtusam leh kan tawngtaina a ni e.

A pahnihnaah chuan Pu Speaker, Pu Purno Sangma a hming pum diktak chu Pu Purno Agitok Sangma a ni a. Ani hi Lok Sabha Speaker lo ni tawh a ni a, March ni 4, 2016 ah lungphu chawlin New Delhi a a chenna inah a boral a ni.

Pu P.A. Sangma hi Pu Dipchon Ch.Marak leh Pi Chimri A. Sangma-te fapa niin September ni 1, 1947-ah Chapathi khua, West Garo Hills (Meghalaya) ah a piang a, Pi Soradini K. Sangma nen June ni 6th 1973-ah inneiin fapa pahnih leh fanu pahnih a nei a, an fate chu Punrot Sangma, Ex-Minister, Meghalaya, J.M. Sangma tunah Meghalaya-ah MLA ni mek, Agatha Sangma, central ah pawh Minister of State ni tawh kha a ni a. Tin, a naupang ber chu Kristi Sangma te an ni.

Zirna lamah chuan B.A. (Hons)., M.A. LL.B., a ni a, St. Anthony's College, Shillong leh Dibrugarh University (Assam)-ah te a kal thin. Pu P.A.

Sangma hi kum 11 mi chauh a nih lain a pa-in a thihsan avangin an rethei ta hle a, lehkha a zir chhonzawm hleih theih loh hnu ah Father Giovanni Battista Busolin-a sikul dinah a thlawna a luh theih avanga lehkha zir zawm leh thei chuah a ni.

Pu P.A. Sangma hi mifel tak, lu zo tak a ni a, kum 26 chauh a nihin Meghalaya Pradesh Youth Congress Vice-President a thlan a ni a, kum 30 a nihin Tura (Meghalaya) bial atangin Sixth Lok Sabha member atan thlantlin a ni. Lok Sabha member atan hian vawi 9 thlan tlin a ni a, chung te chu – Lok Sabha 6-na, Lok Sabha 7-na, Lok Sabha 10-na, Lok Sabha 11-na, Lok Sabha 12-na, Lok Sabha 13-na, Lok Sabha 14-na leh 16-naah te a ni a. Tuna Lok Sabha khu 15-na a ni a, a thih thleng hian Lok Sabha member a ni.

Member of Parliament a nih chhung hian Union Cabinet Minister te, Minister of State te, Union Deputy Minister nihna te chelhin Department hrang hrang Industry, Commerce, Supply Information and Broadcasting, Home Affairs, Labour, Coal te a enkawl a. A hun chhungin a enkawl Department ten kawng tam takin hma an sawn hle a ni. India hmarchhak tlangmi ah chuan a fel ber te zing ami, a lu zo ber a ni hialin a rinawm a. India politics laipuih pawh a thleng sang ber te zing ami a la ni.

Lok Sabha Speaker hi ni 23rd March, 1996 to 23rd March, 1998 (kum hnih) chhung Speaker a ni a. Speaker a nih lai hian rorel inkhawm a kaihrui hneh hle a, kei pawhin ka en fo a, a chhuanawm hle a ni. Member 500 chuang chu a hre vek emaw tih mai turin an hminga kovin, hmel hlim tak pu-in House a kaihrui thin a. Tin, fiamthu a thawh a, an nui ham ham thin a ni.

Pu Sangma hi kum 1988-1990 chhung khan Chief Minister, Meghalaya a lo ni tawh bawk a. Kum 2008 March thla khan Meghalaya

Assembly inthlan a chuh duh avangin M.P. atangin a bang a, MLA ah pawh a tling leh mai a. Kum 2012 June ni 20 khan President of India thlanna a chuh duh avangin NCP chu a chhuahsan a. AIADMK, BJD, BJP ten an thlawp a, mahse a tling zo ta lo a ni. January 2013 ah National People's Party (NPP) a din leh a, Meghalaya-ah a tan a, All India Party angin a siam a, hmun hrang hrangah chuan unit te pawh an lo nei ve nak nak a ni.

Pu P.A. Sangma hian hmasaber nihna a nei nual a, Speaker atana lungrual taka thlan hmasak ber a ni. Opposition leh Ruling Party ten lungrual taka an thlan tlan a ni a. NDA sorkar lain han invawrh zo leh khatiang lama han tih nalh tur an neih loh tlan tawh avangin consensus candidate an zawng a, P.A. Sangma hi consensus candidate atan an vawrh chhuah a ni. Parliament atanga eptu pawl Speaker hmasa ber; Scheduled Tribe zinga Speaker hmasa ber; Kristian zinga Speaker hmasa ber a ni a. Kum 1995-a Union Cabinet Minister a nih khan tribal zinga Cabinet Minister hmasa ber a ni bawh. May 23, 1996 ah Speaker atana thlan a nih khan kum 49 chauh a ni a, Speaker naupang ber a ni a, Speaker tha ber te zingah a hming pawh hi a tel a ni.

Pu Sangma hian nat lawkna pawh nei lovin March ni 4, 2016 Zirtawpni khan lungphu chawlin Delhi-ah a chenna inah a thi a, March ni 8, 2016 (Thawhtanni) khan State chawimawina famkim nen Tura khuaah vui liam a ni.

Pu Speaker, kan sawi tawh ang khan Pu Sangma hi naupang te a nih lain Minister a ni a. Labour Ministry te a enkawl a, chutih lai pawh chuan Mizoram-ah hian vawi tam tak a lo zin a, Mizoram dung leh vang hi helicopter bakah kalkawngah kalin, chhak leh thlang, chhim leh hmar hi a fang chip hle a. Tin, a tribal pui te kan nihna ang pawhin a theih chin chinah chuan min duhsak hle a ni. Tin, Congress party-a a awm lain a che thuk hle a, high command ah te member niin, sub-committee hrang hrangte Chair-in vawiin thleng hian an

recommendation tam tak chu Congress Party High Command hian an la hmang a ni. Tin, Delhi-ah khuan North East MP Forum an nei a. North East MP zawng zawng hi party party sawi lovin a tulah chuan North East tan tang hoin an inhmukhawm thin a. Chung zingah pawh chuan a meizang hlaptu ber a ni a.

Tin, Kristian anga inhmukhawm a tulnaah pawh ani hian nasa takin tan a lain meizang hlaptu ber a ni chho thin a ni. Tin, Meghalaya politics-ah pawh a challeng berte zing ami a ni a. A fate ngei pawh hi MLA te niin minister-te an ni hlawm a. Chutiang mi ropui chhungkaw kaihrui leh anmahni State chauh pawh ni lo India ram pumpui pawha hriat tham mai ni lovin a hmingtha pawl tak a ni a. Ani hian hetiang min boral san ta mai hi a uiawm takzet a. A bik takin India hmarchhak tlangmi te tan a uiawm zual a. Tunlai hian India hmarchhak mite endawngna leh engemaw a tam hle a, India ram hmun dangah. Chungah pawh chuan ani hi a sulsutu, India hmarchhak mite kan duai bik loh zia India ram hmun hrang hrangah pawh an lo hriat theihna tur atana a taka lantirtute zing ami a ni a.

Hetianga kan chan ta mai hi a uiawm hle a ni. India ram politics thlengin a nghawng phak ve a. A bik takin India hmarchhak mite tan chuan Christian community leh keimahni tribal community te tan channa rapthlak tak a ni a. Vawiinah helai hmunah a sunna hun kan han hmang mai tur pawh hi thil lungchhiatthlak tak a ni a. A kalsan a nupui fanaute leh a tu leh fate Pathianin awmpuiin thlamuan se tih hi kan tawngtaina a ni e. Ka lawm e.

SPEAKER : Awle, tunah chuan Opposition group leader Pu Vanlalzawma sawi tur a neih apiang sawi turin i sawm ang.

Pu VANLALZAWMA : Pu Speaker, ka lawm e. Kan House leader zahawm takin a sawi tawh ang khan vawiinah hian India ram hruaitu ropui pahnih sun a lo ngai ta

hi a pawl hle a. Kan House Leader tawmpuiin khang kan hruaitu ropui pahnih chungchangah khan thu tawite han sawi ve ka'n duh a.

A hmasa zawkin Pu Mufti Mohammed Sayeed-a kha kan ngaihthlak tawh ang khan India ram hruaitu ropui a ni a. Tin, a bik takin Kashmir-ah pheh chuan a pawimawh lehzuah a. Tin, keini tlangmite pawh min hrethiam tak, Kashmiri te pheh chu kan hre vekin ka ring a, tlangmi tho an nihna a awm ve a, Srinagar lam, Jammu lo lam khu chu, chuvang chuan mi hriatthiamna nei tak a ni a. Kan inhre thui hranpa lova, amaherawhchu, tum khat Parliamentary Committee, I.T an tih lam, chutih lai chuan kan Chairman chu a hnua Lok Sabha Speaker lo ni ta, Somnath Chatterjee hovin Srinagar kan tlawh a. Chutih lai chu Chief Minister a nih lai a ni a. Chaw eiah min sawm a, kan chibai den den a. Mizoram atanga lo kal ka ni tih a hriat khan mi a en dan hi a dang nghalin ka hria a, tlangmi ve bawh chu, min zawh hmasak ber chu 'remna leh muanna kha nangni chu in nei tha zel a ni lo'm ni?' a ti a. 'E, tha e, Mizoram khi tun thleng khian remna leh muanna Accord khi a puitling chho a, a nuam khawp asin' ti ten kan inchhang a. Chutiang chuan hun tawite amah nen kan hmang a. Helam pang awmdan min zawt nual a. Amaherawhchu, midangte an awm avangin thil tam tak sawina hun a ni lova. Chutianga Mizoram te pawh hre ve nalh kha a ni a, a lawmawm hlein ka hria a.

India ram hruaitu ropui tak tak an hmel te, anmahni pawh kan hriat tam tak hian Mizoram hre fuh mang lo hi an tam reng mai a, a har bawh a. North East tih hian state 7 lai kan lo awmte hi a mal mala hriat fuh har ve deuh te pawh kan ni a. Amaherawhchu, ani hi chu Mizoram chungchangte leh Mizoram chanchinte hrechiang ber kha a ni a. Tin, Kashmir politics-ah chuan thil hi a har em em tih hi a hmuh theih vek a. Pakistan influence nen, chutih laiin India rama beh duh nen, chutih mek lai chuan Pakistan pawh ni duh lo, India ramah pawh awm duh lo, independent ngaihtuah ran khu mipui engngemaw zat hlawm lian pui khu an awm reng a. Chung kara hruaitu ropui tak ni thei leh Chief minister pawh vawi hnih lai lo ni thei a ni a.

Nichinah kan House Leader-in a sawi tawh ang khan a fanu kha a lar em em bawk a. A fanu khu a chang chuan amah aiin a'n hmatheh chang a awm a. Amaherawhchu, kan hriat angin a boral takah hian a fanu chuan a ho khawm hleithei ta hrih lova, a hmaa a ho khawm theih kha. Chumiin a entir chiang tak chu hruaitu ropui, Congress pawhin an thawhpui tawh hnu, BJP pawhin an thawhpui theih kha a ni a. Mi danglam tak leh mi uiawm tak a ni tih kha ka'n sawi lang ve duh a. Vawiinah Opposition lam aiawhin kan ui takzet a ni tih kha ka'n sawi ve ni sela.

Tin, a pahnihna atan chuan kan ngaihthlak tawh ang bawk khan P.A. Sangma, ani hi North East atanga kan politician lar berte zing ami a ni a. A bik takin helaia awmte hi chuan kan hre deuh furin ka ring a, sawi tam a ngai lova. Mizoram chanchin hi a sawi thin a, mawi takin min chhuah thin a ni tih kha ka'n sawi hmasa duh a.

Tin, a bengvar em em a, han inhmuh nikhua pawh hian 'Ka pu, i dam maw?' a ti vat thin a ni. Mizo kan ni tih kha a hrechiang a. biak pawh hi kan be hmasa hman meuh lo a ni. Tiang khawpa Mizoramte pawh hrechiang a ni a. Chutih mek lai chuan a thil min hrilh pakhat chu UT lai tawh kha niin ka hria, a sawi kha, 'Inthlan buaipuiin ka kal a, sum leh paite pawh ka pai chho a, party lam atangin. Mahse, kan han ti kan han ti a, ka sum pai khan a lo daih khawp mai a, a bange pawh ka hawn thla leh a. Kan Tresurer hnenah ka pe leh a. Mak ti hian min en a, chu chu ka career atan zel pawh hian a lo tha khawp mai a. Khatiingin tumah return hi an awm ngai lova,' a ti. Party inthlanna tur atana an pawisa ken, an pek let leh hi. Chungte chu a sawi a, nuam hi a ti ve em em a. Mizorama a lo kal kha a hre reng a ni. Tin, a sawi ang chuan a career atan khami kha a tha em em a ni tih min hrilh a. Chungte chu a thusawi ka hriatreng pakhat ropui ka tih a ni a.

Tin, Mizote min sawi thin dan, nichina ka sawi tawh ang khan kan chanchin tha lam hi a sawi tui a. Kan bul a nih vang nge ni ka hre chiah lova. A ni chiah

pawhin ka hre lova, midang bulah pawh khan Mizoram chanchin hi a chhe zawng leh a tha lo zawng lamin a sawi ngai lova, mawi takin a sawi thin a. Tin, a thu min hrilh leh pakhat chu Speaker a nih chhoh dante kha a sawi a. Chutih mek lai chuan a Speaker nih mek laiin sawrkar a tla ta a. Tah khan, ‘Prime Minister nihna chance hi ka nei a ni,’ a ti a ni, a sawi dan chuan. Kan Speaker-in a hrechiang zawkin ka ring. Ani sawi dan chuan, ‘Prime Minister nih theihna chance pawh ka nei a, amaherawhchu, Inthlan that duh zawk lamte pawh an awm a, consensus-a Prime Minister nih theihna chance hi ka nei ve,’ a ti a. Chung avangte chu a ni em aw ka ti a, a sawi tlang chiah lo nachungin. Congress Party pawh a’n chhuahsan a, a’n tih chhoh chiamna chhante pawh kha khangte kha ni pakhatin ka hria a. Lo ni thei ta ang se, tih te pawh ngaihtuahnaah a awm a.

Tin, President te pawh kha ni thei hian a inngai a, kan hre vek a. President kha a contest ve a. Khu lamah vai ram ril zawkah mi tam tak a zu hmin a. Party ropui tak tak, mahnia khawsa thei, party lian pui pui kha amah vote tur khan a hmin thei a. Amah an support a, tiang khan candidate niin huaisen takin President Election pawh kha a fight chho ngam kha a ni a. Fighting spirit an tih ang chi hi a nei tha em em a.

Tin, amah mai hi a ropui a ni lova, ka’n sawi kai lawk duh chu a fate pawh hi a chhuah tha em emin ka hria a. Political career tha deuh a siampui a, nichina kan ngaihthlak tawh ang khan. A fanu central-ah minister a ni a. Chutih lai chuan khatih lai tak khan ka hriatsual loh chuan a fapa pakhat kha Meghalaya-ah minister a ni a. Tin, a fapa pakhat leh a upa zawk kha Meghalaya-ah Parliamentary Secretary a ni a. Ka zawt mai mai a, a nau zawk kha, ‘Ngatinge Cabinet i nih a, i u hi Parliamentary Secretary chauh a nih a?’ ka ti a. ‘Party-ah chuan ka senior zawk alawm, ka ute chu ka hnua lo lut ve chauh alawm,’ tiin zangkhai takin min chhang a. Chungte chu chhungkaw ropui taka politics-a a han din chho tak te pawh hi a ropui ka ti a, ngaihsan awm hlein ka hria a. Amah pawhin a zep chuang hlei lova, a sawi mai zel a. Ka hmaiah hian ka thiltih thin hi a lang mai zel a, a zu in te hi a zep chuang ngai miah lova. Chung chu fiamthu thawh nan te pawh a hmang mai mai a, amah hi mi kawm nuam leh mi zau tak mai hi a ni a.

Tin, North East atan symbol a nihna a awm a, kan ngaihthlak ang khan N.E. M.P. Forum kan tih te pawh kha. Pu P.R.Kyndhiah leh amah kha a dintu an ni deuh ber a. A term hnihna Pathian leh mipui zara M.P. ka nih ve tum pawh khan Treasurer ah te khan min dah chho ve a. North East M.P. Forum-ah khan anni te nen kan in hmu kan in hmu a, thil tam tak kan ngaihtuah ho a. North East tan hi chuan kan inlungual khawp mai a. Assam te, Manipur te, Tripura leh Arunachal te Sikkim thleng khan khatianga kan interest bikah chuan hma kan la ho thin a. Zoram a tha zawnga sawi reng tu a ni tih kha ka han sawilang ve duh a.

Vawiinah hian Pu Mukti Mohamed Sayeed leh Pu Sangma te hi keini group lam pawh hian kan ui takzet a ni. An chhungte kan tuarpuiin an kalsan tak an party te Pathianin hruai zel se tih kha kan duhdan a ni e. Ka lawm e.

SPEAKER : Sawi duh dang te kan awm mai thei a, amaherawhchu zawhna hun atan hun kan duhthawh bawk si a, duh tawk mai ila. Tunah hian kan hruaitute pahnih Mizoramin a sun takmeuh a ni tih entirnan ngawi rengin minute khat (1) i lo ding ang u.(Member-te ngawi rengin minute 1 an ding) I thu ang u.

Tunah chuan zawhna leh chhanna hun kan hmang tawh ang a, Starred Question No. 1-na kan la ang a. Zawhna neitu Pu K.Sangthuama, MLA zahawm takin zawhna zawt sela, ilo sawm ang.

Pu K.SANGTHUAMA : Pu Speaker, ka lawm e. Ka Starred Question No.1-na, Chief Minister zahawm tak min chhan atan:-

- a) Ramthar veng Sihpui atanga Thuampui kawnga Chite kaiah leidawh tumna a awm em?
- b) Awm ta se engzatnge estimate, tunge contractor?
- c) Kawng hi laih tlang tumna a awm em?

SPEAKER : A neitu Minister zahawm tak Pu Lal Thanhawla, House Leader kan sawm hmain zawhbelhna kha pakhatat panga aiin tam lo sela, a neituin, kha kha kan rel thluk tawh kha hria ila. Tunah chhang turin Department changtu zahawm tak Pu Lal Thanhawla ilo sawm ang.

Pu LAL THANHAWLA. CHIEF MINISTER : Pu Speaker, member zahawm tak Pu K.Sangthuama zawhna chhanna chu:

- a) Awm e
- b) Estimate amount hi ₹ 65,74,000/- (Rupees sixty five lakh seventy four thousand) only a ni. Contractor chu Pu Hrangthankima, Edenthar, Aizawl Regd. No. 70/CE-R/2/2014 a ni.
- c) Awm e, tih a ni e.

SPEAKER : Zawhbelhna a awm em ? A zawhna neitu khan a nei lo maw? A neih loh chuan Pu Thanliana

Pu LALTHANLIANA : Pu Speaker, ka lawm e. He zawhna hi hmanah khan ka zawt tawh a, a lawmawm ka ti khawp mai a. Pawisa pawh a lo thleng tawh a, hna pawh an tan niin ka hria a, a lawmawm ka ti a. Ka zawhnaah khanin Black Topping kha a tih theih lovang tih kha a awm deuh a, a kawng laih ngawr ngawr bakah khan. Hei hi a tih ve theih lawm maw ni le, nakinah a ngaihtuah zel theih ang em le ? tih kha ka han zawt duh a ni.

*Speech not corrected

SPEAKER : Le, Chief Minister sawm ila.

Pu LAL THANHAWLA, CHIEF MINISTER : Pu Speaker, hma kan la zel a, a tul angin ani pawh thlamuang takin lo awm phawt mai teh se.

SPEAKER : Awle, zawhbelhna a awm tawh lova, lawmthu sawina a ni zawk a, a lawmawm e. Tunah a pahnhna kan la ang a, a neitu MLA zahawm tak Dr. K.Beichhua zawt turin ilo sawm ang.

Dr. K.BEICHHUA : Pu Speaker, ka lawm e. PWD Minister zahawm tak hnena ka zawhna chu, Tlawng lei, Sihmui – Airport panna kawng dawhthat hna hi engtik atanga tan nge a nih ang? tih a ni e.

SPEAKER : Awle, Department changtu Chief Minister zahawm tak Pu Lal Thanhawla sawm ila.

Pu LAL THANHAWLA, CHIEF MINISTER : Pu Speaker, member zahawm tak Dr. K.Beichhua zawhna, Starred Question No.2 chhanna chu - Bailey Bridge dawh that hna hi tan thuai a ni ang. Bridge components hi Shiba Industries, Kolkata ten an rawn thawn kim huna dawh tan nghal a ni ang.

SPEAKER : Zawhbelhna Pu K.Beichhua

Dr. K.BEICHHUA : Pu Speaker, ka zawhbelhna chu, Leilawn dawh tha tur hian contractor thlan a ni tawh em ? Ni ta se, tunge Contractor ? Open tender a ni em tih pakhatna ni se.

Pahnhna ah chuan a hmaa vawi hnih chim tawh te kha tute nge Contractor leh pawisa cheng engzat nge kan sen?

Pathumna ah chuan, vanduaithlak takin 2nd December, 2015 a chim hi vawi thum chimna a ni tawh a. Heng vawithum chim ta mai te hi engvanga chim nge a chhan min hrilh theih em tih ka zawt bawk a.

Palina ah chuan, baily bridge-a lirthei tlan te lo endik a, a tlan theih leh theih loh thutawp siamtu tur sorkar hian Police emaw, PWD emaw, tute emaw hnenah authorisation a pe em tih ka zawt a.

Pangana ah chuan, baily bridge chim thin bula concrete bridge 2009 December atanga tan tawh vawiin thlenga hna la chhonzawm lo hi engnge a chhan, hei hi hmalak tumna a awm em tun hnai ah tih leh contractor tunge, cheng engzat nge sen ni tawh? A tam lutuk ang em aw, duh leh kan zawt leh mai dawn nia.

*Speech not corrected

SPEAKER : I zawt famkim khawp mai. Chief Minister zahawm tak chhang turin i sawm ang. A tawpna a ni tawh mai. Panga lai kha i chhiar tawh a.

Pu LAL THANHAWLA, CHIEF MINISTER : Pu Speaker, member zahawm tak kha, panga aia tam mah niin ka hria. Engpawhnise, Pu Speaker, he bailey bridge hi sorkar lo lam chauh hian pawl an ti lova, sorkar lam hlei hlei hian pawl kan ti a. Pawl ti ve mang lova min sawi tum hi, anni ka tihna ni lovin an tam khawp mai a. Hei hi Mizoin kan chin a ni a.

Hei Ration Card chungchang pawh an ti a, a pawl ti ber chu Ration Card dik lo chungchang pawh keini hi kan nih ka ring a. Tin siamthat tum chauh pawh ni lovin heti khawpa sorkar timualphote hi chu dan anga an chungah dan lekkawh tur niin ka ring a. Tihluhnain sorkar an timualpho nge ka hre lova. Kei pawh tukinah kan Ration Card ka hmu a. Ka nu leh ka pa chu dam angin an ziaak a. Kei hi sorkar hnathawk angin min ziaak bawk a, chutiang vel chu a ni a. Engah nge kan hrem loh lem ang le tih kha rilruah a

lo lut nghal a ni. Tiang mai maia inthlahdah tur a ni lova, eizawna a ni lova. Ringtute chu Pathianin min dahna hi a rawngbawl tura min dahna a nih avangin rilru leh tihtakzetin mite tana malsawmna ni tura thawk tur kan ni.

Pu Speaker, kan hriat tawh angin he baily bridge hi a chim hun kan hria a, Inquiry Committee te pawh din a ni a. Chumi report te pawh chu kan tlangzarh tawh a. A load bak phur ritin a zawh avanga chim a ni tih hi tlang hriat a ni tawh a. Tin, bridge part vel siamtu hi kan hriat dan chuan India ramah an awm tawh niin ka hria a. Chuvangin Bridge part te hi order a ni a. Hmuh kim huna dawh tan mai tura in peihsa reng kan ni a. Tin, heng bailey bridge dawhthat hi a hmanhmawh thlak a; tin, specialized job a ni a. Chuvangin deparment in tender ko lovin departmental a an thawh hi a tha ber a rin a ni a, chutiang thawk tura inruahman mek a ni. Disburse Supply Order hi GRSP Limited, Kolkata hnenah ni 8.12.2015 khan pek a ni a, mahse rang taka part te an siam zung zung theih bik loh avangin tunah hian cancelled leh a ni a, tichuan Shiba Industries, Howrah hnenah pek leh a ni a.

Phone atanga inbiak mai duh tawk lovin a hmunah engineer-te pawh an kal a. Kolkata-ah tirin BB pass an rawn thawn thlen hun tur zuk hre turte pawhin intirh a ni a. Shiba Industries te hian pre payment nuai 187 an hmuh hman chuan ni. 20.2.2016 ah bailey bridge part siam zo tur leh rawn thawn tan thei turin an intiam a ni. Hetih chhung hian suppliers te hian advance bill hi Regional Officer, MORTH, Guwahati hnen atangin pawisa awmluh vangin an la hmu thei lova. Bridge part te pawh an la rawn thawn thei lovin, vawiin thleng hian la hmuh loh a ni.

Tin, Chief Engineer, Ministry of Road Transport and Highways R.O. Guwahati te Mizoramah rawn zinin he lei hi a hmunah an en a, he lei dawh hmanhmawh a tul zia an hmuhin pawisa release thuai turin an intiam nghal bawk a, hun reiloteah suppliers-ten pawisa an hmuh ve leh an bridge part te an rawn thawn ang a, bailey bridge, Tlawng ami hi dawh zawh thuai theih beisei a ni. Tin, he bailey bridge hi 200 ft

a sei a ni. Double Reinforce Structural Loading tura duan a ni a. Tin, hei a hnuai point hrang hrangte hi member zahawm tak khan a hriat thain ka ring a, a hriat duh tho ka ring a.

A hnuai point hrang hrangte hi Tlawnglui-Sihhmui-Lengpui Road permanent Bridge dawh mek chungchanga hma lak mekna dinhmun a ni - Tender for investigation of Consultancy Services hi Chief Engineer, PWD Highways atangin ni 13.4.2015-ah chhuah a ni a. He tender hi ni 1.12.2015-ah hawn a ni. Tender endik tur Committee hi ni 16.12.2015-ah technical bid endik a ni a. Technical bid endikna paper kha Committee member zawng zawngin an signature an pek hnuah Regional Cell MORTH, Guwahati hnenah approve tura thawn a ni a. Regional Cell MORTH, Guwahati-in a approve hnuin Chief Engineer, PWD Highways ah ni 18.1.2016 khan an rawn thawn let a, ni 22.1.2016-ah financial bid hawn leh a ni. Financial bid endikna leh finding te R.O. Guwahati hnenah 29.1.2016-ah approve turin thawn leh a ni. He hna atan hian firm pakhat chauhin tender a pe a, single tender a nih chuan authority sang zawkin approve a ngai a, he tender chhangtu hi PCI Consulting India Limited a ni.

Chief Engineer, MORTH Delhi leh R.O. Guwahati te tun hnai ni 19 leh 20 February 2016-ah Mizoram an rawn kal leh a, work site an tlawh lain he tender dinhmun hi sawipui an ni a. Headquarters-ah an kir ve leh a single tender hi approve tur leh work order issue nghal turin an intiam a ni. He hna, Consultancy Services for the said permanent/RCC bridge i.e. for preparation of the trade design engineering for checking and the stability of the existing sub-structure and foundation of alternate bridge design including or excluding the existing work done and remedial measures strengthening file structure and its foundation and necessary protection work with all technical study for the bridge of the river Tlawng, National Highway 44A Mizoram hi hun reiloteah thawh tan thuai tura beisei a ni a. Chutiang chuan Pu Speaker, hmalak mek a ni a, he lei hi thawh zawh thuai department pawhin a duh a, chuvangin theihpatawp a chhuah mek a ni.

Dr. K.BEICHHUA : Pu Speaker, a point te tea min chhan kha chu a tan pawh a harsa mai thei a, chuvang chuan chiang deuh hleka kan hriat theihna turin, a chim chhan kha load bak phurh vang tih a ni ta a, a thar pawh lo dawh leh ta reng pawh ni ila load bak phur kha tunge veng ang tih kha. Tu kutah emaw authorization kan pek loh chuan Police nge, PWD nge, tute kutah emaw khami kha kan authorize loh chuan, a thar pawh kha dawh leh ta ila, vengtu an awm loh chuan a va chim leh mai hmel ve, kha kha hmalakna a awm em tih ka zawhbelh a ni e.

*Speech not corrected

SPEAKER : A Department changtu Chief Minister sawm ila.

Pu LAL THANHAWLA, CHIEF MINISTER : A tul angin hma kan la mai a, khawi khawiah emaw chuan an ruk nasat avangin Chowkider te kan dah a, chutiang chuan a vengtu dah an ngai ang a. Tin, permissible load exceed lo tur khan chianguang takin an permissible load maximum kha tar a ni ang a, chu chu hmun dangah pawh an tih thin dan a ni a. Helaiah pawh hmun thenkhatah chuan tih a ni a, hetiang a chim tawh loh nan a tichim theitu, a phurh phal chin aia tam phurin an zawh lohna turin a vengtu dah tum a ni. Tin, hemi lei chauh hi ni lovin a tulna hmun dang dangah pawh chutiang chuan tunah hian a kal mek a. Amaherawhchu, sorkar-ah hi chuan thil hi a kal muang a, a ri vut vut thei lova, hna lak tharte a lo ngai a, sum a lo mamawh a, sum hi kan neih zawng tak a ni hranpa lova, chu chu kan harsatna a ni.

Pu LALRUATKIMA : Pu Speaker, khawngaihin tuna a zawhna piah lama a chhiar chhuah kha kan PWD Minister zahawm tak khan khawngaihin a copy min pe thei lawm ni tiin ka rawn ngen a ni.

*Speech not corrected

SPEAKER : Aw, a thei a nih chu. Zawhna dangah kan kal ang a, zawhna No. 3-na neitu Er. Lalrinawma, MLA zahawm tak zawt turin sawm ang.

Er. LALRINAWMA : Pu Speaker, ka lawm e. DM & R changtu Minister zahawm tak hnen a ka Starred Question No. 3:-

- a) Kum 2015-2016 chhungin rangva bundle engzat nge lei a nih?
- b) He mi atan hian cheng engzat nge hman a nih?
- c) Tender chhuah a ni em?
- d) Mi engzat hnenah nge rangva hi pek a nih tawh?

SPEAKER : Awle, a department changtu Minister zahawm tak Pu C. Ngunlianchnunga chhang turin i sawm ang.

Pu C. NGUNLIANCHUNGA, MINISTER : Pu Speaker, Er. Lalrinawma, MLA zahawm tak Starred Question pathumna chhanna chu –

- a) Kum 2015-2016 chhungin rangva bundle 860 lei a ni.
- b) Rangva lei nan hian ₹ 36,98,000/- hman a ni.
- c) Rangva leina atan hian Restricted Tender chhuah a ni.
- d) Rangva hi chhungkaw 16 hnenah ₹ bundle 4 zela pek an ni tawh.
Ka lawm e.

S P E A K E R : Zawhbelhna, a neitu Er. Lalrinawma

Er. LALRINAWMA : Pu Speaker, ka zawhbelhna chu rangva bundle khat cheng engzat hisap nge tih leh eng quality nge an lei tih a ni e.

S P E A K E R : Zawhbelhna pahnih chhang turin a changtu Minister zahawm tak i lo sawm ang.

Pu C.NGUNLIANCHUNGA, MINISTER : Pu Speaker, zawhbelhna kha tel khat 46 kg.032mm a ni a, a rate hi ₹ 4,300/- bundle khat a ni.

S P E A K E R : Zawhbelhna dang a awm tawh lo maw ? A lawmawm e. Starred Question No. 4-na ah kan kal ang a. A question neitu Pu P.C.Zoram Sangliana, MLA zahawm tak i sawm ang.

Pu P.C.ZORAM SANGLIANA : Pu Speaker, Starred Question No. 4-na PWD Minister zahawm takin min chhan atana ka zawhna chu hei hi a ni e –

- (a) Aizawl City leh District Capital chhung kawngpui enkawl hna hi Urban Development Department kutah PWD hian pek/hlan tumna a nei em ?
- (b) Aizawl City leh District tin khawpui chhung kawngpui siamthat nan 2015-2016 kum a sum dah zat leh hman ral zat. Bat a awm chuan tarlan tel ni se.

S P E A K E R : Chhang turin a changtu kan Chief Minister zahawm tak Pu Lal Thanhawla i lo sawm ang.

Pu LAL THANHAWLA, CHIEF MINISTER : Pu Speaker, member zahawm tak Pu P.C. Zoram Sangliana Starred Question No.4 chhanna chu :-

- (a) Tunah chuan Aizawl City leh District Capital ni lovin, Headquarters chhung kawngpui enkawl hna hi UD&PA Department kutah PED hian hlan tumna a nei rih lo.
- (b) Aizawl City leh District tin khawpui chhung kawngpui siamthat nan, kum 2015-2016 chhung hian Non-Plan hnuai ah ₹ 1463.40 lakh leh Plan hnuai ah ₹ 116.51 lakh, a vaiin ₹ 1579.91 lakh dah a ni a, vawiin thleng a hmanral tawh zat chu ₹ 1105.90 lakh niin, tun dinhmunah chuan bat a la awm rih lo.

S P E A K E R : Zawhbelhna Pu P.C.Zoram Sangliana.

Pu P.C. ZORAM SANGLIANA : Pu Speaker, nimina kan Governor zahawm takin House a rawn address-ah khan PWD Department-in kawng leh thil hrang hranga hma a lakna hi keini ang tan pheih chuan belh thiam loh khawpa sum tamin hma a la a ni tih kan hria a. Ka zawhna (a)-na bika ka zawhbelh duh chu, Kolasib-ah Urban Development Department-in, Mizo pa, a khaw tlangval ngei ruaiin Kolasib khawpui chhung kawng hna thawh a ni a. Ka sawisual ka ring lo ve, Pu Speaker, Mizoram District Headquarter-ah Kolasib khua hi kawng nei tha ber a ni ang. A bial ang pawhin kawng thatah hian kan inchhuang khawp mai. Hetia ka tawn hriat atangin Kolasib khua leh ka bial kawng a that theih chuan Aizawl khawpui leh District khawpui hrang hrangah hian UD&PA-ah khawpui kawng siam hna hi hlan ni sela, PWD-in hna dang an ngah baw k si a. Hei hi tih theih a ni em? tih hi ka rawn zawhbelh a. A tha zawnga kan tawn hriat atanga hemi hi tarlan a niin, duhthawhna atanga zawhna leh zawhbelhna rawn siam ka ni e.

Khawpui kawng tihthat nan leh cheina atan zawhna kan House Leader zahawm takin min rawn chhanah khan 1579.91 lakh ah 1105 lakh hman tawh a nih thu min hrilh a. A bang la awm hian kan khawpui kawng siamthat hmabak ngaihpaawimawh tak takte hi chak leh zual zawkin chhonzawm a ni thei ang em? Kawngpui siam pah hian Pu Speaker, side drain hi min ngaihpaawimawh sak thei ang em? Side-drain avang hian kawngpuiin a chhiat ran phah hle thin si a tih te hi ka zawhbelh a ni e.

S P E A K E R : Zawhbelh turin Pu Lalruatkima.

Pu LALRUATKIMA : Pu Speaker, JNNURM atangin Aizawl khawpui kawng siamna turin engzatnge sum hmuh a nih? Package I leh package II ah tute nge contractor tih leh package II-ah hian 71.34% hi physical achievement a ni a, nikum October ni 21 Assembly zawhna Starred Question 189-na ang chuan. Chumi bak 28% chu engtikah nge thawh chhonzawm leh a nih dawn tih kha ka zawhna ni sela.

Tin, ka zawhna dang lehah chuan ka bial chhung RM High School atanga Tuikual Thlanmual inkar kawng tawite 292 meters a sei khu resurfacing min tihsak thei lawm ni ? RM High School khu MICE School a thlak tur a ni tawh bawk a. Chuvang chuanin, khulai kawngpui khu tun thal chhung ngei hian min chei sak thei lawm ni tih kha ka'n ngenin ka'n sawi lang tel a ni.

SPEAKER : Zawhbelhna leh ngenna a ni a. Pu K.Sangthuama'n zawhbelh law law sela.

Pu K. SANGTHUAMA : Pu Speaker, University kawng Ch.Chhunga High School leh Ropaiabawk inkar tuna blacktop zawh loh tlem la awm khu 1.8 km vel chauh a ni a. Tunah khuan beih mek a ni a. Khu khu kan House Leader hian khawngaiha tun thala zo hram tur hian min lo ngaih pawimawh sak se kan duh khawp mai a.

Tin, bitumen hi a daih lo an ti a. A daih loh pawh hi PWD hi ka'n ngen ve leh chhawng a. Puk tir mai ula, nakinah an ba-ah hian in cut sak mai ang a ka'n ti a. Khu khu bitumen an neih loh avangin sum kan nei rih lo an ti a. Vaibelchhe 7 lai kan lo bat sak si a, a awm ka tihpui viau a, a thawktute tan pawh. Chu chu PWD lam hian kha mi tlemte chu tuna an puk tir bak hi lo puk tir leh hram turin kan PWD Minister, kan Chief Minister zahawm tak ni bawk hi House-ah hian ka'n ngen duh a ni.

S P E A K E R : A chhang turin kan Chief Minister zahawm tak i sawm ang.

Pu LAL THANHAWLA, CHIEF MINISTER : Pu Speaker, senior member Pu Sangthuama attitude-ah hian hmanah pawh khan lawmthu ka sawi tawh a. Tun tumah pawh hian 7 crore lai min bat sak avangin chutiang khatiangin kan thawk chak thei lo a ni an ti a. Chuti chung pawh chuan, 'kei pawh contractor ka ni tawh thin a, kan sumin kan thawk a, sorkarin a neih hunah min pe mai alawm, mahni tana thawk kan

ni lova, mipui tana thawk kan ni a ka ti mai a,' a ti a. Kha kha thil kalphung tur ni awm tak a ni a.

Tuna zawhna kan chhan mek hian tuna thil dang tam tak kha a huam lova. Kan member ten in hriat atana tha awma ka hriat helaiah hian kan hotuten anrawn buatsaih hi in lo hriat ve hrim hrim thain ka hria a. Nakin zelah pawh ngaihtuahna leh ngaihdante in neih a, sorkar tanpui dan emaw, thahnemngaih vanga han sawisel dan emaw pawh a hriat theihin ka ring a. Chuvangin, hei hi ka'n sawi ang a.

Tin, side drain hi ngaihpawimawh hmasak ber turte zing ami niin ka ngai ve a. Contract hi naia sen khat mah ka la thawk lova, supply hi naia sen khat mah pawh ka la thawk lova. Tin, ka tan leh ka pawlte tan thawk turin tumah hi ka ti ngai lova, ka beisei bawk lova, ka duh bawk lova, ka tum bawk lova Pathian khawngaihna. Tunhma atang tawh khan side drain hi ngaihpawimawh hmasa turin ka ti thin a, mahse, ngaihpawimawh hi a hlawh vak lo a ni. Tin, khawpuiah hi chuan side drain hi a awmna-ah hi chuan mipui hian kan hnawh zel zawk a. Chuvangin, tuihawk hi a luan loh kawrah hian a luang a luang zawk mai a ni fur lai chuan. Hei hi khawtlang nun siamthat tum pawl nena bih tlan ngaiin ka hria. Tuihawk hi a luanna tur kawra a luan theihna turin kan veng ami theuhah hian mawh kan phurh a ngai a. Local Council te mawh nimai lovin, mipui, ram leilungfa, citizen tena kan tihtur a ni.

Tin, JNNURM hnuai city roads contractor hi Tantia te leh Sunshine Overseas Limited te an ni a. Tin, Ch. Chhunga Road to Tanhril MZU road thawh mek chu kar leh chhung hian zawh tum a ni. Hei, ka han sawi leh lawk ang a, ka tiam zing tawh a, kan ti lo tam tawh khawp a, tiam leh pawh hi ka hreh tawh khawp mai, department hian an bawhzui duh mang si lova. (SPEAKER: Zawhna hun a ral a mahse chhang zo law law se).

Pu Speaker, UD & PA Department hi tun dinhmunah chuan technical mi Executive Engineer ho chauha awm an nih avangin, Aizawl city leh District Hqrs kawngte enkawl tur chuan mi leh sa an neih tlem deuh avangin a enkawl hna hi an kuta hlan a la remchang rih lovah kan ngai a. Tin, 2015-16 chhung hian Mizoram chhung kawng hrang hrangte siamthat leh enkawl nan non-plan hnuaiah nuai ₹ 3,00,340.56 a awm a. Pu Speaker, hun a tawp tawh a, Governor's Address discussion-ah khan hun kan duh tam zawk ka ring a. Member zahawm takte hnenah heng copy hi ka pe ang a, nakin zelah pawh zawh dan tur te, kalpui dan tur te leh sorkar tanpui dan tur te an thiam theihna turin. Chuti chuan ti mai ang aw.

S P E A K E R : Member-te khan khawngaihin ngaihven ula.

Pu LALRUATKIMA : Pu Speaker, kan ngenna zahawm tak kha min entertain thei lawm ni? (SPEAKER : An ngenna kha eng ber nge ni kha?) Tuna R.M. High School atanga Tuikual Thlanmual inkar meter 292 khu resurfacing tih lohna kum sawm chuang a ni tawh a. Khawngaihin min siamsak thei lawm ni tiin PWD Minister zahawm tak ka'n ngen a ni.

Pu LAL THANHAWLA, CHIEF MINISTER : Pu Speaker, tuna kan subject a ni chiah lova, mahse, nakina ka pek tur atang khan chiang zawkin in hriain ka ring a. Tin, i sawi tur niawm tak a ni a, Pu Speaker, hei MLA kan ni a, mipui thlan kan ni a, kan bial atan chauha thlan kan ni lova, Zoram pumpui tana thlan kan ni a, Opposition leader Pu Zawma hian a hriatchian viau ka ring a. Ka bial kan tih ringawt hian keimahni theuhah khan kan rilru a zim a, kan bial chuah kan ngaihtuahah min ngaih theih a hlauhawm a, Zoram pumpui tana thlan kan ni a, ka bial ka bial tih hi chu a mawi lohna chin a awm bakah a tul lo a ni.

Amaherawhchu, kan bial chungchang kan sawi duh a nih chuan, 'hei Thenzawlah chutiang khatiingin, Kolasib-ah chutiang khatiingin, hei mipui vantlang

tana tangkai tur a ni a, sorkarin min ngaihtuah sak se,' tih ang zawnga kan sawi hi a mawi zawk em aw, ka ti a. Mahse, sawi dik ber chu ka ni lova, mahse, Parliamentary Ethics kha a awm ve avangin ka'n sawichhuak ve a ni e.

S P E A K E R : Awle, member zahawm tak ten kan hriat tur chu, mahni bial chungchang bik hi chu kan Minister-te an office-ah emaw, khawiah emaw kan sawipui thei vek a, a bik takin. Amaherawhchu, sawi loh theih loh, sawi tel ngei ngei a ngaihna chin chu a awm leh thin ang a...

Pu LALRUATKIMA : Pu Speaker, khawngaihin, session-ah vawithum ka zawt tawh a, hemi chungchang hi, thawh mai tur angin sawi ni si tunthlengin thawh lohina awm a, a beidawn thlak tawh deuh a ni, official-te pawh ka dawr nasa tawh a ni.

Pu LAL THANHAWLA, CHIEF MINISTER : Pu Speaker, chu chu ka chhanna a ni tawh lo a ni. Nia, beidawn kha a ni leh thin a, a har alawm.

SPEAKER : Awle, kan member pahnih Pi Vanlalawmpuii Chawngthu leh Pu T.Sangkunga ten he House-a awm loh phalna an dil a, kan phalsak a ni tih kha House-in min hriatpui ula.

Tin, thil pakhat, session hmasa khan member thenkhatin- 'Camera khan min chhuk lak a' an ti a, an sawisel deuh a, Chuvangin I&PR Department te nen tangrualin camera thar kan han ruahman a. Hei pawh hi duhthu a la sam lo mai thei a, mahsela, member zahawm tak ten he House-a in thu sawi hi kan ngaipawimawh hle a ni tih erawh chu he House-in min hriatpui ula a tha e.

Tunah chuan, Motion of Thanks-ah kan kal tawh ang a. Sawihona kan nei ang a, member pakhatin minute 10 theuh chang ta ila, kha kha kan tihdan thin a ni

a, ring ta mai ila a tha ang e. Tunah hian Motion neitu, member zahawm tak Pu R. Vanlalvena sawi tan turin i sawm ang.

Pu R. VANLALVENA : Pu Speaker, ka lawm e, kan Governor zahawm tak thusawi motion pulut thei a, ka awm avangin ka lawm a. Kan party hruaituten he motion sawi hawng tura min ruat hi kan party hruaitute chungah pawh a hmasain lawmthu ka sawi duh a ni. Minute sawm chhung kan hun neih a ni a, a rei lo si a, (SPEAKER : Nang chu a neitu i ni a, a aia rei i nei thei ang.) a theih anga rangin sawi zung zung kan tum ang e, Pu Speaker.

Hei kan Governor rawn sawi hi point 56 lai a ni a. Amaherawhchu, heng zawng zawng sawi tur hian hun a awm lo a ni tih chu a chiang reng mai a, chuvangin a pawimawh zual pawh ni lo, helaia kan hmuh a a lang ang ang hi kan sawi mai turah ka ngai a. Kan member zahawm tak ten nakinah hun tam tak an rawn nei ang a, chungah chuan fiah zawk leh fel zawkin an rawn sawi turah ka ngai a ni.

A bul tanna a hmasabera a rawn sawiah hian inthlan felfai tak mai 12th Aizawl North -III ah kan nei kha lawmawm a tih thu a rawn sawi a, a lawmawm ka ti a. Chuta inthlan kan neihna tur te Electoral Roll leh election chungchang hrim hrim a role pawimawh tak play theitu Central YMA ten a bik takin National Civil Society Organisation Award an dawng te kha lawmawm ka ti a. Anni hi dawng awm tak reng an ni a. Kan society min khalh ngiltu leh election chi hrang hranga min vengtu pakhat an ni a, anni avang hian kan election te pawh hi a mawi thin a. Hetiang hian an kal zel kan duhsak a, kan Governor zahawm takin a rawn sawilang te pawh kha a lawmawm ka ti a ni.

A dawt lehah chuan Agriculture Department chungchang han sawi kai daih ila. Kan Agriculture Department hi (SPEAKER : Kan han inthlak lawk aw) (DEPUTY SPEAKER : Le chhonzawm rawh le) Pu Deputy Speaker, ka lawm e. Kan

Agriculture Department hmalakna a ropui hle a. Kan hriat angin Mizoram mihring tam zawk hi Agriculture-ah kan la innghat lo thei lova. Department-ten theihtawpin hma an la a. Leilet a tam theihna tur leh buh a thar tam theihna turin tractor te an pe a. Mimalah pe lovin inhmantawm turin an pe a. Leilet neitu mi tam takin an inhmantawm a, darkar inchhawk ten mahni ram an siam a. Chu chuan leilet zau zawk min siam tir bakah buh thar that theihna tur Agriculture Department-a thawk ten training an han pe a, chu chuan buh thar a titam a, buh an thar pung nasa em em a ni tih kan Governor speech atang khan kan hmu thei a. Kum 2010 aiin 39.4% in buh hmun a zau va, buh thar 22.21 in a pung a. Tin, chutih lai chuan lawmawm em em chu tlangram lo kan han nei a, ram kan tichereu a, lo kan vat duai duai ang kha an titlahniam daih mai te kha Agriculture Department hnathawh ropui tak kan Governor speech a kan hmuh theih a ni a, a lawmawm takzetin ka hria.

A dawt lehah chuan Taxation Department hi an tangkai ka ti a. Kan hriat theuh angin kan ram hian tax kan la tlem a. Chutianga tax kan la tlem chung chung chuan kan ram phu ang tawkin Taxation Department ten tax an khawn tha khawp mai a. Kum dang zawng aiin tax an khawn pung a ni tih kan hria a ni. Vabelchhe 218.73 an lalut a, anmahni department ringawtin. Tin, Transport-in vaibelchhe 16.88, Revenue Department-in vaibelchhe 4.2. Tin, Revenue Department thovin Registration leh Stamp Fee atangin vaibelchhe 2.31 an lalut a ni tih kan hria a. Anni chauh lo pawh hi department hrang hrang, kan ram tan, kan ram dinchhuahna atana chhiah lalut an awm tih kan hmu a ni. Geology & Mineral Resources Department pawhin vaibelchhe 3.95 an lalut a. Chungte chu kan ram hmasawna leh kan than zelna tur atan tangkai taka hman tur a nih avangin a lawmawm hle a ni.

Tin, PWD hi nichinah member zahawm tak Pu Zoram Sangliana khan a sawichhuak zawk tawh a, hna hi an thawk tam em em a. Kum khat chhunga an hnathawh ringawt pawh hi chhui tham leh belh tham fe a ni. Hna tam tak an thawh zingah pakhat a lo tluk sawp palh emaw, engemaw harsatna a lo tawh hian a tha tam tak kha sawi lovin a

chhe lai hi kan sawi fo thin, hei hi Mizo zia a ni a. Tunah pawh hian kan hmuh theih chu lei pakhat an han dawh fuh lo palh a, chumi chu kan sawi nasa em em a, a tha lam hi kan sawi tam lo zawk thin a ni.

Kawng laih (formation cutting) hi 2015-16 chhungin 64.44 kms an thawk a. Black-topping hi 109.94 kms an thawk a. Culvert 152, lei 4 an dawh a ni. An dawh chhiat ringawt ni lo an dawh that te pawh a awm a ni tih kha kan hmu theiin ka hria. Hmun 78-ah tunah hian kawng siam mek an nei a, building 54 an thawk hman a. Chung zingah chuan 13 an zo hman tawh a ni. Chutiang khawp chuan kan PWD te hi an thawkrim a, theihtawpin chhun zan zawmin, a bik takin Aizawl khawchhung hmun tam takah pheih chuan an thawk a ni tih kan hria a. Kan ram hi a zau ve a, sum leh pai indaih lohna te nen, department thawktute indaih lohna te nen, engemaw kan duthusam thleng lo te chu a awm ve mai thei a. An thawk chhe lovin ka hria a, heng an thawh zawng zawngte han hmuh hian a lawmawm ka ti a ni.

A dawt lehah chuan Pu Deputy Speaker, Power & Electricity Department hi kan hria a, nikum lamah te Budget Speech-ah pawh kan hmu tawh a. Power leina atan kum tina pawisa kan ram sorkarin a sen nasat zia te kan hmu thin a ni. Chung chu hre reengin he department hian theih tawp chhuahin mi ram, mi state atanga power kan lei lohna turin hma an la a. Tlawva te, Kawlbem te, Tuirial te kan hma lawkah hawn theih mai turin tunah hian an buatsaih a. Hengte hi kan neih theih chuan pawisa kan sen vak vakna thin ang hi kan inphuhruk thei dawn a ni tih an hria a. Chulo pawh electric regular taka kan neih theihna turin hna an thawk tam em em a ni tih a buah khan kan hmu a. A bu kha kan nei theuh a, sawi vek sen a ni lo va, an hnathawh hi a tam a ni tih kha kan hriat tlan tur chu ni pakhatin ka hria a.

A dawt lehah chuan Sericulture-ah khan kal ta dawrh ila. Sericulture te, Horticulture te, Agriculture te hi kan inngahna bulpui an ni lo thei lo va. Nichinah khan Agriculture chu kan sawi tawh a. Sericulture hian silk kan neih theihna turin nasa takin

hma an la a. A bik takin helaia ka sawi duh chu, a dang kha sawi chakawm em em a ni chungin hun kan nei tlem a. Kan sawi fal bik duh chu Integrated Muga Silk Development Project, tuna Kolasib District-a an kalpui, vaibelchhe 13.52 hmanga an kalpui mek hi a tuiawmin a phurawm ka ti a. Kan hria a, kan House Leader, kan Chief Minister zahawm tak pawhin a sawi fo thin a. Nature-in malsawmna min pe kan ti a, muga pangang tun hmaa silk siamna tur kan rama awm thei ngai lo Assam rama awm thin, Assam ram a lum tak lutuk avanga pangang a nun that theih tawh loh avanga Mizoram lama lo chho ta, hemi tihpunna tur te, chumi pangang hmanga silk la tam zawk kan tharchhuah theihna tura department hmalakna te hi a lawmawm ka ti a. Hemi hi a hlawhtlin theih chuan environment ven nan, khaw lum lokal zel tur ven nan te, a silk a kha hralh atan a lo tha bawk si a. Sericulture Department-in hemi lama hma an lo la hi lawmawm ka ti tak zet a.

Horticulture hi kan sawi ang khan Sericulture te nena inkawp tlang a nih avangin hei hi a pawimawh em em a. Vawiinah Horticulture Department hmalakna hlawhtlinna tam tak kan hmu a. Serthlum tam tak an thar tawh a, thil dang chi hrang hrang pawh kan tharchhuak tawh a ni. Chutianga nasa taka kawng hrang hranga an hmalakna zinga lawmawm em em pakhat chu Horticulture College kan nei thei tur hi a lawmawm ka ti a. Hei hi kan thalaite leh kan ram future atan thil pawimawh tak a nih avangin a hlawhtlin zel beiseinain kan thlir a, a hlawhtlin hun hi a nghahhlehawm em em a ni tih ka sawi tel duh leh a.

A dawt lehah chuan AH&Vety Department-ah hian kal ta ila. AH&Veterinary Department hi an thawkrim khawp mai a. An skill hi a lo sang hlein ka hria a. Kan Governor speech han chhiar atang hian an fakawm lehzualin ka hria. Tunhmaa ka lo ngaihtuah teh vak ngai loh, kan lo en liam mai kha an hnathawh han chhiar hian an thawrimna te a lang chiang hle a ni. Bawnghnute kan thar tam tawh dan te, a zat kan sawi vek lovang a. Artui leh sa kan neih tam tawh zia te hi a lawmawm ka ti a. Tin, ran an han vulh a thingtlang lamah sial te, bawng te an han vulh a. Nitin mahni ina haw tir reng theih a lo ni lo va, a farm bikah te an chen tir a. Mahni ta hi hriat loh mai

hi a awl em em mai a, an lo thang ve zel a; tin, man te a lo har bawk nen. Microchip an bengah anmahni ran chhinchhiahna an dah te hi a lawmawm, hei hi a remhriat thlak khawpin ka hria a ni.

Tin, artificial insemination (kah rai) vawk kah rai te, bawng kah rai te, ar keu tir a ni mah ang chu hengte an han ti hi an skill hi an thiam khawpin ka hria a. Arpa chi hi a nu chi-ah hian an dah a, tunhma kan hriat dan kha chuan a pa tel lo hian ar hi an keu thei lo va. Tunah chuan kan Vety Department hmalakna atang hian a pa tel lo hian an keu tir thei tlat tawh mai a. Hengte hi an fakawm hlein ka hria a ni. Tin, vawk kahrai kan tih ang chi phe chu India ram hmundangah an lo ti lo va, Mizoram hian an lo ti thei a. Hengte avang hian kan Vety Department hmalakna hi a ropui khawp mai a. Kan hotupa ber hi a kah rai lampang hi a thiam riau a nih hi, amah a awm lo lehngal a maw ni? A fakawm khawp mai an hmalakna hi.

Tin, PHE-in kan ramah hma an lak nasat zia te kan hria a. Aizawl khawpui chhungah ngei pawh tui kan dawn that tawh zia te kan hmu a. Heng an hmalakna zawng zawngte hi a fakawm takzetin ka hria a. Tuna an hmalakna kal mek National Rural Drinking Water Programme-ah ringawt pawh hian khaw 23 vel tunah hian hmalak mekna an nei a. Tuna min pek tawh zawng zawng pawh hi a tam tehlu nen an hmalak zelna pawh hi lawmawm ka ti.

Tin, sanitation lama an hmalakna te, AMRUT lama an hmalakna zawng zawng te pawh hi a fakawm a ni a. Department pakhat hmalakna ringawt pawh hi Pu Deputy Speaker, sawi dawn ila darkar 1 sawi hi a awm awm e. Amaherawhchu hun kan nei lo tih kan hre tlang a, tlem te te chauh kha kan sawi dawn a ni.

Education Department hi an fakawm khawp mai a. A changtu nih hi a huphurhawm thin hi ka ti a, mihring an tam si a. Kan kal tawhah duhthusam loh thil, siamthat duak duak theih loh tam tak a lo awm tawh bawk nen, an tan hian manganna leh

harsatna tam tak hi a awm ve ang. Amaherawhchu, chuti chung chung chuan rim tak leh hah takin an thawk a, tun thlengin tluang taka an kal thei hi an fakawm ka ti a. Tunhma khan zirtirtu kan lakin chumi subject bik atan chuan lak tih a awm ngai lo a rules kan neih thin loh avangin. Tunah chuan Recruitment Rule, Middle School leh High School-ah te Science teacher tur atan a hran bik te, Mathematics teacher tur atan a hran bik te an han la thei te hi a lawmawm ka ti a. Hengte hi kan Minister te, kan Parliamentary Secretary zahawm tak takte hmalakna hlawhtling kan hmuh mek, kan ram tan a ni a. Hengte hi an fakawm ka ti a, an chhuanawm hle in ka hria a ni.

Tin, Minor Irrigation Department hi kan hria a, kan ramah thlai chin te, buh chin te, chi hrang hrang tui tel lo chuan a tih theih loh a, tui a awm loh chuan a chhe zui nghal mai zel a ni a. Chung kan ram thlaite chu tuia kan chawm theihna turin Minor Irrigation Department-in nasa takin hma an la a, an hmalak tawh pawh hi a rah kan chhawr, kan seng nasa em em a ni tih Mizoram kan hmu a ni. Chuti chung chung pawh chuan tunah hian project 25 lai kalpui mek an nei a, hengte hi a hlawhtlin hunah chuan kan ram tan tha zawkin thlaite kan thar ang a, buh tam zawk pawh hi kan thar ngei ang tih a rinawm a ni. Heng an hmalakna zawng zawngte hi lawmawm ka ti.

Tin, Aizawl khawpui chhungah kan hria a, CCTV te an han dah a, surveillance hi darkar 24 chhung englaipawhin kan police-ten min enkawl reng a. Kam term chhung, tun kum nga, kum ruk, kum sarh chhunga Mizoram, a bik takin Aizawl khawpui chhung him tak zia te kan hmu a. Hneh taka min vengtu kan police-te hi fakawm tak an ni. An hnathawh hmuh tur englaipawhin a awm a.

Tin, building te an sa thar a, tihian project thar te nen niminah pawh khilailah kan Chief Minister zahawm takin lungphum te a han phum a. Hmasawna tam tak an nei a ni, sawi sen loh hi an nei a ni tih kan House hian min hriatpui se ka duh a ni.

Tin, jail neih loh hi a chakawm khawp mai a. Mihring lo pung zel leh sualna lo pung zelah hian jail te hi nei lo thei lovin kan awm a. Kan hmasawwna atana chhiar tur chu ni mah se hmasawwna chakawm loh pawl tak chu a ni ve awm e. Chuti chung chung chuan jail te an sa thar zel a, tunah pawh district pahnihah jail sak a ni a. Tin, hmeichhia bik tanna tur siam belh leh zel a lo ni bawk nen chungte thleng chuan kan hmasawwnaah kan chhiar tel lo thei lo a ni. Kan Home Minister zahawm tak hian jail pakhat a hawwnaah, “He jail hi Mizorama jail lun lo ber ni turin ka hawng e,” a ti a. Chutiang chu ni thei se ka ti a, helai hi hmasawwnaah chhiar mah ila hmasawwna atan chuan duhawm loh lam pawl a ni a. A lun loh theihna tur atan erawh chuan tan kan lak zel hi a tul hlein ka hria a ni.

Tin, online-in road tax te, passenger goods te, goods tax te a pek theih a, heng hian mihring tha sen tur tam tak min pumpelth tir a ni tih kan hmu a ni. Youth Commission hmalakna zawng zawngte kan sawi seng lovang. Chanchinbuah te kan hmu thin a, Mizoin skill develop kan ngaihzia te hriain Skill Development Training lamah min kalpui a. Cement mistiri te, aluminium works-ah Mizo thalaite kan thanharh theihna turin theihtawpin hma an la a. Tin, state dangah kan Mizo thalaite thil zirtirin tam tak an thawn chhuak a, hna te an hmuh tir thin a ni tih kan hria a, an hnathawh hi a fakawm em em a ni.

Tin, Referral Hospital-ah Medical College thlenga tihchangtlun theihna turin tunah hian hma an la a. Aizawl Civil Hospital hmasawwna tur an dah belh reng bawk a. Hetianga kan Health Department ten, a bik takin kan Health Minister zahawm takten hma an la hi lawmawm hlein ka hria a ni. Cancer Hospital siam that kan mamawh em em a ni tih kan hria a, inthiarna leh room te a inhlat a, damlo chak lo tak tan pawna inthiara chhuah hram hram a ngai a. Chungte chu a lo reh theihna turin kan Minister zahawm takin Cancer Hospital tihchangtlunna turin vaibelchhe 44.27 lai mai a han sawi chhuak a, hmalak theih tura a awm te hi lawmawm hlein ka hria a ni.

Sawi tur tam tak a awm a, Pu Deputy Speaker, kan sawi vek seng lovang a. Food and Civil Supply hmalakna te chhuanawm tak tak sawi teuh tur a awm a ni. Vawiinah buhfai te, gas te hnianghnar takin kan awm a ni tih kan hre tlang vek a. Heng zawng zawngte hi kan Minister-te leh kan sorkar hmalakna, rilru takzet pea kan hmalakna hlawhtling kan hmuh mek chu a ni tih ka hria a ni.

Tin, a tawp berah chuan, Vigilance Department-in Property Returns tih theihna turin IT hmalaknain online-a tih theih tura an ruahman te hi tha ka ti a. Property Returns tha taka kal tir hi kan mamawh hle a ni, hei hi tha taka kan kal theih ka beisei. Pu Speaker, hun ka la rei ta khawp mai, ka lawm e. He Motion hi i veilam ami te leh i dinglam ami ten kan zavaia lawm taka pawm turin ka rawn move e. Ka lawm e.

DEPUTY SPEAKER : Awle, a lawmawm e. A move-tu, Motion neitu a ni baw a, chuvangin kan han pe rei deuh a, minute 20 chuang hret. Tunge han sawi leh ang le? Er. Lalrinawma.

Er. LALRINAWMA : Pu Deputy Speaker, ka lawm e. Hei, tihdanphung pangngai angin Governor Speech chu sawihona hun kan han nei a. Amaherawhchu, tuntum kan Speech hi, kan Governor thusawi hi a thinrimthlak kan ti dawn nge ni, lawmna tur a awm rualin lungawi lohna tam tak ka nei a ni tih hi vawiinah hian ka sawi duh a ni. He House zahawm takah present a ni a, Zoram mipuiin min thlir a, bial hrang hrang mipuite aiawh kan rawn kal khawm a ni a. Hetianga a mawhphurtuten thil tam tak ti mai ila, a titu chu ka zuk hre lova, amaherawhchu, hemia kutthlaktuten fimkhur lo taka thil an ti erawh hi chu a demawm ka ti a. Hun dangah erawh chuan hetiang a thil pawimawh puan a nih leh hunah chuan, Governor chuan a hre kher lo mai thei, a thil sawi tur chu. Amaherawhchu, kan enpui a, kan fimkhur a ngai a ni. A mawhphurtute hian he hna hi rawngbawl na a ni tih an hriat hi a ngai a ni tih hi vawiinah hian ka sawi duh a ni tih kha a hmasain ka sawi a ni.

Ka'n sawi duh zawr zawr, ka lawm lohnate ka sawi phawt ang a. A hmasa berin Fisheries Department chungchang hi sawi ta ila. Chu chu point 7-naah khan NLUP beneficiaries-ten thla khatah ₹ 1,50,000 atanga ₹ 2,00,000 thleng thla tin an lalut e a rawn ti a ni. Hei hi Fisheries Department ngei te pawh hi zawt ila sangha dil siamtute hian ₹ 1,50,000 atanga ₹ 2,00,000 hi an lalut em tih hi zawt teh u thlatin hian, an la lut lo reng reng tih hi a chiangin ka hria a ni. MLA pawhin ₹ 65,000 vel hlawh kan la a, miin la tam min ti a. Amaherawhchu, ₹ 1,50,000 atanga ₹ 2,00,000 hlawh tur sangha dil siamtute tia kan han chhuah hi chu kan fimkhur loh vang a ni. A chung chiah ah hian metric ton 2,500 a thar a ti a, chu chu kg nuai 25 tihna a ni. Kg nuai 25 chu a chung a NLUP beneficiaries 3,654 hian sem ta ila kum khata an lakluh chu kg 1 ₹ 200 in hisap ta ila, ₹ 1,36,836 vel a chhuak a ni, sangha dil hi kum khatah vawi khat chauh sah thin a nih avangin. Chuvangin, henga rawn siamtute hian hei hi chu fimkhur loh nge ni, a pawm theihah ka ngai lo a, chuvangin, ennawna hun lo kal tawhah chuan heng hi thleng tawh lo se tih hi ka duh a ni.

Tin, No.16-na kha lo en leh ta ila Pu Deputy Speaker, i remtihhain, 'The majority of the population of our state still resides in rural areas.' a ti. Mizoram mipui tam zawk chu thingtlangah kan cheng a, a ti. A hnuaiah thingtlanga ni za inhlawhna chungchang te a sawi a. Tichuan No. 18-na kan keu chuan, 'Mizoram is the most urbanized state in the country with more than fifty percent of the population living in urban areas' a ti leh. A phok lehlamah khan khawpuiah an pem leh nghal vek tihna a nih chu. Chuvangin, hetiang thil fimkhur lo taka kan ti hi chu a dik lo a ni. No. 16-naah Mizoram mipui tam zawk chu thingtlangah kan chen tir a, No. 18-naah khawpuiah kan chentir leh a nih chu. Pem chhung a va rei lo em! Chuvangin hetiang thil kan ti dawn a nih chuan he House zahawm tak zahawmna pawh hi a tihnam ka ti. Midang pawhin an thlir ang, mipuiin an thlir ang, Governor ngei pawh khan nimin khan enchiang se chuan a zak ve ngawtin ka ring a ni. Phok pakhatat thingtlangah mipui tam zawk an cheng kan ti a, a phok lehlamah khawpuiah a tam zawk kan cheng kan ti leh a. Awmzia a nei lo reng

reng a ni. Hetiang thil pawimawh lutukah fimkhurna kan tlachham lutuk hi chu thil pawl tak a ni tih kha ka sawi duh a ni.

A dawt lehah chuan Vety chungchangah hian kal leh ta ila. Kan Minister zahawm tak kha a awm a nih pheih chuan hei pawh hi a lawm ang em aw ka ti a ni. Vety hi lo en ta ila, hetah hian in mi 13,172 beneficiaries in a tarlang a ni. Amaherawhchu, he lehkhabu Mizoram Economics Survey 2014-2015 ah hian mihring chu 37,047 first phase atanga fourth phase thlengin kan khung a ti bawk si. Tichuanin, mihring lo kiam tawhna hi 23,875 in Vety hnuaiah beneficiaries an kiam ta thak a nih chu. Amaherawhchu, session hmasa ah hei March 18, 2015 session-ah khan NLUP beneficiaries January ni 1 thlengin engzat nge paih tawh kan ti a, mi 1,086 tiin min chhang a. Chu chu 31st January, 2015 thleng a ni. Tichuan, nikum kan session-ah khan mi engzat nge paih tawh tih kan zawt leh a, 109 a ti. A paih zawng zawnga chu 1,195 chiah tihna a ni, a pahniha belhkhawmin. Chuti a nih chuan a dik lo chu a awm tih a chiang a ni, 23,875 a rawn paih ringawt mai a ni he lehkhabu hian.

Chu mai a ni lo, kan sa thar chhuah hi ton 8,500 a ti, kan chhuang viauin ka ring. Amaherawhchu, Minister tan chuan a thinrimthlak viau a ni. He lehkhabu ah bawk hian kan en leh chuan Vety Department-ah hian an sa thar chhuah zat hi ton 12,189 a ti 2013-2014 chhungin. Theihpatawpa Department-in hma an lo lak vena ah chuan ton 3,689 in a lo tlem ta a nih chu 2015-2016 chhungin. Chu chu lawmthu sawina tur chi a ni em ka han ti a nih chu vawiinah hian. Department-in kum hei leh chen an lo buaipui tawh a, kum 2013-2014 chhung a phak lohna kha ton 3,689 a nih chu. Kan thawhrimnain awmzia a nei lo reng reng tihna a nih chu. Chuti a lo nih chuanin zaa 30.26 vel zetin, kan thawh ve tang tangna chu a back-in a kal tihna a nih chu.

Chuvangin, he Governor Speech hi lawmthu sawi nan kan hmang dawn nge heng thila mawhphurtute hi engtin nge kan tih dawn tih lai erawh chu House neituten min la chhang turah ngai ila. Hei hi a zahthlak ka ti a, a chhan chu vawiinah public

leader, MLA, Zoram mipuite thlan lal hma ah, House-ah meuh pawh kan fimkhur dawn lo a nih chuan, khawng kan fimkhur tawh ang le? Eng hunah nge kan fimkhur tawh ang le? tih hi ka'n sawi duh a. Helaiiah kan MLA zahawm takten Motion kha an rawn pulut a, a lawmawm viau rual rualin lawmpui viau dawn chuan a buaithlak viau baw si laiah hian thil hi a buaithlak ka ti a. Chuvang chuan, heng Governor Speech kan buatsaih chungchangah hi chuan kan fimkhur a ngai a ni vawiinah hian. Khang kha kan la enchiang hman lo zawk a ni a, Nizanah zankhuain vawi 2/ vawi 3 ka chhiarchhuak a, hetiang thil inkawkalh lutuk, keimahni siam ngei pawh keimahniin kan han vawthla leh a, a mawhpurthu nih chu a zahthlak khawpin ka ring tih hi vawiinah hian ka'n sawi duh a ni.

Tin, a dawt leh atana ka'n sawi duh chu, khang zawng zawng kha ka ngaihtuah thin a. Kan ramah hian project tam tak kan lo nei tawh a, a hlawhchham te pawh a awm a, hlawhtling te pawh a awm a. Heng hi eng nge a chhan ni ang tih te pawh ka rilruah a awm a thin a. Chung zawng zawng chu vawiin hian House-ah, presentation dik lo kan tih te pawh hi neitu rilru kan put loh vang a ni ang a tih te pawh hi rilruah a awm a ni.

Kan Governor speech nen hian a inlaichin chiah em tih chu ka hrelo. Amaherawhchu, vawiinah hian sawi chhuah ve reng reng hi ka duh a ni. Vawiinah hian mitin te hian kan hnaah theuh hian neitu nihna rilru kan put hi a va tha em! Chu chu engtinng kan tih ang? Sikul naupangah te hian tan ila. Sikul naupang tin te hnenah hian neitu kan ni he ramah hian, keinin kan tih loh chuan tumah ti tur an awm lo tih hi i tuh ang u, naupangte hnenah hian. Chuvang chuan, Minister-te, MLA-te, kan vaiin kan kalna apiangah hawh u i sawi ang u kan mite hnenah hian, neitu nihna thinlung pu turin. Kohhran pawh i sawm ang u, biak ina sawi turin. YMA pawh khawhar ina sawi turin. Chung, neitu nihna thinlung kan put phawt chuan engkim mai hi a fel dawn a ni. Tunah hian mikhual cham rei emaw kan inti a, kan lui tui sanghate chu turin kan hraia, ramngaw kan hal a, chung zawng zawng chu ram pawn atanga rawn kal a, rawn titu

pakhatmah an awm lo. Keimahni mi ngeiin Pathianin ram min pek chu kan halin turin kan hrai a ni.

Chung zawng zawng chu neitu nihna thinlung kan put loh vang a ni. Chuvangin, vawiinah hian naupangte thinlungah hian tuh ila, sikul naupangte-ah hian i tan ang u. A au hla tur chu ka phuah thiam chiah lo, amaherawhchu, chu chu kan tuh a nih chuan tun atanga kum 10 a lo kal lehah chuan kan naute kan fate chuan neitu nihna thinlung nen ram rawng an bawl tawh ang a, hna an thawk tawh ang a, kan kal duak duak ang.

Sorkar pawh ministry chu a inthlak thei e, mahse government erawh chu kan vaia ta a ni e, kan inthen hrang thei lo. Amaherawhchu, vawiinah hian sorkar leh mipui kan indahhrang daih a, chu chuan kan hnathawhna min tibuai zo ta a nih hi. Chuvang chuan, neitu nihna thinlung campaign tur hian vawiinah hian tan i la teh ang u. Kan dawhkan tinah Chief Minister pawhin, Minister pawhin, MLA pawhin platform kan hmuh apiangah, hun kan hmuh apiangah i sawi ang u. Kan thusawi pawhin min kang ral ngei ngei ang. Chumi ni atang chuan, kha thil lo irchhuak khan kum 10 hnuah emaw chuan naupangte hnenah a lo lang ngei ngei dawn a ni.

Vawiinah hian puitlingte hnenah pawh sawi ila, keini a sawitute ngei ngei pawh, kan thusawi chuan min kang ngei ngei ang. Chuvang chuan, he ramin hma a sawn theih nan, sorkar hi, ram hi tu ta mah a ni lo, keimahni ta ngei a ni tih hi campaign-in i chhuak teh ang u tih hi Pu Dy.Speaker, vawiinah hian ka'n sawi duh a ni e. Ka lawm e.

DEPUTY SPEAKER : A lawmawm e, i hmang dik chiah e. Tunge han sawi ve leh ang le. A sawi mekin hun hman an pelh lutuk hlaua kan inkhap kan inkhap laiin sawi tur inkoh nan hun hi kan seng leh teuh thin a, chuvangin sawi tum kha chu insum lovin. Kan awm tawh lo em ni ? Aw, Col. Z.S. Zuala.

Lt. Col. Z.S.ZUALA : Kan Governor thusawi hi a famkim hlein ka hria a. Department hrang hrang a hawl kim a. Tin, hun reilote a awm chhung hian thil pawh a hre hle a; tin, a zin pawh a zin tam a, a fakawm hlein ka hria a. A thusawi pakhat, a bul a han tanna kha, “ Tun anga hruaitu in awm zel chuan muanna tluantling leh hmasawna, harsatna hnuaiah pawh in nei zel ang” a tih hi a dik hlein ka hria a.

Hmanni lawk, Zirtawpni kaltaah khan Bengaluru-ah kan Chief Secretary khan lawmman ‘ Public Affair Index’ ti a helai NGO-in State hrang hrang an judge-naah khan a tha ber State-ah, small State zingah khan min han thlang te kha. Kha khan nasa takin, chiang takin Mizoram sorkar administration hi a tha tawk a, tuna kan leadership hnuaiah hian kan Chief Secretary leh a team hian tha takin hna an thawk tih kha India ram pumah khan a rawn puangchhuak tihna a ni a. Chuvangin, tuna kan sorkar kal mek hi a ropuiin a fakawm hle a. Kan Governor thusawi kha practical in kan sorkar kal mek hian a rawn lantir ti ila a dikin ka ring.

Tin, hemi an judgement-ah hian development te, hmeichhia leh naupang an him tawk em tih te leh dan leh hrai (justice) tih ang te leh environment leh transparency (sum hman dan) thleng khan helaiiah hian PAC-te hian an lo judge a ni a. Chuvangin, Mizoram hi State te ho zingah hian a hmahruaitu a ni tih an rawn show hi a ropui hlein ka hria a.

Tin, Department hrang hrang a rawn sawi kha kan sawi vek thei lovang a. Agriculture-ah khan oil palm te kha a rawn sawi a, Bukvannei-a oil palm, North-East a awm chhun a ni a. Tah khuan metric ton 5500 vel hi an her tawh a ni. Heta tang pawh hian State chuan hmalam chu a pan a. Tin, mahni bial chhung lampang hi sawi sawi loh tur kan ti na a sawi loh theih lohin kan sorkar hian hma tha taka min laksak avangin ka’n sawi kai lo thei lova. Mission Veng market kha a rawn sawi chhuak a, khatah khan vaibelchhe 6 dawn kha Mission Veng market sakna turin NEC atang khan sanction a ni a. Hengte hi a lo puitlin hunah chuan sawlai kalkawng hrula mi inzuar tam tak saw kan

nawr lut thei dawn a. Chuvangin, saw saw a pawimawh a, hma min laksak te hi public tan a pawimawh a, tin, hriselna lamah pawh nasa takin min pui dawn a.

Tin, UD&PA ten khang tihchangtlun nan a kalkawng tha zawk a awm theihna turin ram leina tur te pawh min han ruahman sak a. Khangte kha kan sorkar hmasawna lamah a kal zel tih kha a rawn phochhuak a, a lawmawm hlein ka hria.

Tin, Forest & Environment-ah hian nichina ka hmaa rawn sawituin a sawi kha ka thlawp a. Ram kan tikang hi a pawi a, kan ram hi tikang lovin, thing pawh hi phun belh lo pawh ni ila kum 5 chhung hi chuan ramngaw hi a awm thuai mai dawn a ni. Hetah hian kan YMA leh kan civil society ten hma an lakna a rawn sawi te kha a hrechiang hlein ka hria a, a lawmawm ka ti a.

Tin, Wild Life lamah hian kan Minister-te leh hnathawk (staff) ten nasa takin hma an la a. Amaherawhchu, hetah pawh hian public bawh hian mawhphurhna nasa tak kan neiin ka hria. Thingtlangah han zin ila, ramvak a silai pu ngauh ngauh hmuh tur an la tam mai. Hengte hi engtin nge kan tihtawp ang? Tin, sava veh nan air gun tha chi te khawi khawi emaw atangin an la a, hengte hi public hian condemn thei ila a tha ngawtin ka ring.

Tin, he sorkar hi kan hruaitute hi an huaisen hlein ka hria a. Chumi han sawinaah chuan Mizoram Liquor Control Act hi mi tam takin, ‘a tha lo, ti lovang,’ an ti a. Amaherawhchu, kan hotuten, ‘a tha dawn e, kan mamawh a ni, i ti ang u,’ an ti a, an titlang ngam a. Party dang sawrkar ni se, hei hi an sawisel deuh chuan an titlang ngam lo mai ang tih te pawh hi a rinawm a. Mahse, tuna kan sawrkar hi chuan a tha tur anga an rinah hi chuan min hruai ngam a ni tih hi a lang chiang a.

Tin, hemi bakah hian kan sum hmuhna te pawh a lo ni a, kan Governor-in a address a a sawi danah khan, 48 vbch. vel kha tun kum maiah pawh hian Excise atang

hian lakluh a ni a. Hengte hi han ngaihtuah ta ila, tunhmaa sawrkarin Excise atanga revenue a lak miah loh lai te khan, vaibelchhe heti zat hi a ruka zuarte khan a hlawkna an lo la tihna em ni ang? Khangte han ngaihtuah chuan hetiang zel hian lo kal ta ila, Liquor Control Act hi lo ti ta lo ni ila, government tluk thuk thuk hian mafia-te hi an lo dingchhuak thei mai awm mang e aw tih ngaihtuahna mi pe thein ka hria.

Tin, hemiah hian YMA-te leh Excise-te an fakawm hle a. Christmas leh Kumthar festival laite khan kum dang zawng aiin zurui an man kha a tlem a, tin, accident pawh a tlem a hriat a ni, hei hi a lawmawm hlein ka hria.

Tin, kan Governor-in a sawi pakhat Sanitation kha. Sanitation hi kan hmu a, tun hma kum 10 hmalamah khan kan sanitation system kha kan la hriat hlawm ka ring. Aizawl khawpui hmun thenkhatah trailer, bawlhhlawh paihna tur an dah a, khami kha a khat liam a, a rim a chhia a, kawng a tibawlhhlawh a, a huna paih kha a harsa si a. Mahse, khatiang kha tunah hi chuan han zawt ta ila kan naute ho leh naupang hote hi, a hriat pawh an hre pha tawh kher lovang. Khati khawp khan tuna kan sawrkar hian sanitation-ah hian PPP Mode-te in an han ti a. Hetiangte hi a tha a, kan khuate pawh hi a fai tawh a. Za zinga khaw fai ber kan han ni te pawh hi a ropui a, kan sorkar hmalakna kan Governor-in khatiang a han sawi chhuak te kha a lawmawm hlein ka hria a.

Tin, food security-ah kan sorkar-in hma nasa takin a la tih te kha kan hmu a. Hengah te pawh hian kan sorkar hmalakna kan Governor-in a rawn sawi chhuah hi a tha ka ti a, a motion hi pass ngei turin ka han sawm che u a ni e, ka lawm e.

DEPUTY SPEAKER : Tunge han sawi ve leh ang le. Pu K Sangthuama.

Pu K. SANGTHUAMA : Pu Deputy Speaker, ka lawm e. Kan Governor thusawi hi a sei angreng khawp mai a, darkar 1 leh a chanve sawi kha a ngai a. Mahse, a chipchiar leh angreng lutuk a, hetiang lo deuh, hlawm deuh hlek hlawk, tha deuh hlek hian buatsaih thin ni se chu a tha zawk mai awm mang e aw ka ti a. Hetianga thil tih zawng zawng ziah vek mai hi a chhiartu tan pawh khan a ninawm awm angem te kan ti deuh hlek a.

Tin, nichina Er. Lalrinawma rawn sawi ang deuh khan engemaw, han en hian dik lo deuh ni awm a tam riauvin ka hria a. Hei 3-naah pawh hian hetiang hi a kal chhoh dan a nih chuan tunah NLUP hlawhtling takin kan kalpui e tih a nih lai khan cultivation area-ah hian 39.04 hian a lo pung chhova, kum 2010-ah hian 14.23 in a lo pung a, a ti a. Tin, hetah hian 22.21 hian a lo pung chhova a ti leh a. Khatiang tete khan agriculture-ah hian NLUP a nih hian a tlangpui thuin buh lam hi chu kan kalpui lo angreng viau a. A leilet lamah hian engemaw chen chu kalpui a nih rualin, lo neih ngawr ngawr, shifting cultivation-ah hian kan bansan a. Thenkhat phei chuan lo nei mang lovin a khawtling an awm deuh vek a. Chutih rual chuan a pung tam viau mai hi chu a endiktu leh a lo collect tu hian a tusual deuh a ni ang a tih ngaih theih a ni a. Heng hi fimkhur a tha viauva. Chutih rualin kan ration buhfai lei hi a tlem lam aiin a tam lam zel a lo la ni bawk si a. Heng hi chu tlema Governor speech-ah hi chuan fimkhur deuh hlek a tih chu a tha khawpin ka hria a. Kha kha pakhatatah chuan ni ta phawt se la.

Tin, sangha hi kan thar tam viau va, sangha thar tam hi a lawmawm a, sangha dil siam pawh an tam a. Amaherawhchu, kan thar tam ang ai hian kan lei chhuah a tam thei lo hi a pawh hle a. Chumi awmzia chu a hralhnaah hian a mumal hleithei lo va. Khawthlang lamah khuan an thar tha viau va, ka u pawh hian tam tak tak a lei a. Mahse, kumin te kha chuan vaiho an lo kal hianin, an han tih khanin, an lei tha duh mang lova, tlawm te te khan nuai tam tak lei thin khan nuai tam tak kha a lei thei ta lova, entirnan kan sawi mai a nia, ka u dilah pawh.

Chutiang ang deuh chuan Fisheries ho hian pawisa tam tak an nei thin si a. A dah vawhna kan tih ang chi hi ngaihtuah berah chuan nei ula, in pawisa neih ang chi kan chhut hian a daih tho mai a. Aizawl-ah hian emaw a dah vawhna tha deuhhlekk dah ila, chuta tang chuan to deuh zawkin sangha khawitute pawh hian an tih theih a beisei awmin ka hria a. Chung chu Fisheries lam khan rilruah lo dah deuh hlek ula a tha awm mang e aw ka'n ti a. Tichuan kan thar chhuah tam ang hu khan an lei tam thei dawn niin ka'n hre deuh a, chu chu rilruah lo awm ta se a that ka'n ring a.

Tin, 12-na ah AH & Vety chungchang an sawi te leh Horticulture College kan din tur te hi a lawmawm khawp a. Amaherawhchu Vety-ah hian College kan nei tawh a, Manipur University hnuaiia awm kan ni a. Hei hi kan House Leader pawh hian lo chhinchhiah ngun se ka'n duh deuh hlek a. Vety-ah hian kan ramah lehkha thiam tam tak an awm tawh a. Advertisement an chhuah te hian tribal tan te, general tan te hian an titha duh mang lova. Schedule Caste tan leh enge ni khami atan khan an ti deuh ber a. A tlangpuiin hei a lehkha eng eng emaw min rawn pe vek a, nakinah chuan ka la sawi chhunzawm zel ang. Khitilaiah khian mithiam tam tak kan nei ve tawh a, heng ho awm theihna turin a faculty lamah te khian kan Chief Minister hian ngaihtuahna lo hmang se ka'n duh khawp a. A chhan chu Manipur University a ni a, an duh duh khilaiiah khian thil an ti nimaia hriatna ka'n nei deuh a, chu chu khawngaihin min lo enchiansak sela.

Chutiang bawkin Horti-ah pawh kan din leh mek dawn a ni a, Manipur hnuaiiah tho kan awm leh dawn a ni a. Khatiang bawka min sawisak leh chuan din leh tlak pawh hi a ni dawn emaw ni aw tih ngaihdan min neih tir a. Chuvangin a chinchhuak khan vawiin a sawina hun a nih loh avangin ka lehkha neih ang pawh sawi turin helaiiah ka rawn keng lova, a tlangpuiin kha kha a

lawmawm rual rualin heng hi kan House Leader hian rilruah lo nei deuh hlek se tih kha vawiin ah ka'n sawi chhuak ve duh hrim hrim a ni.

Tin, Forest chungchang 15-na ah hian, forest in a khuh hi sq.km 19054 tih a ni a, hei hi sq.km. 20000 vel ram kan nei a, hei hi a dik chiah em aw, eng angin nge an chhut ka hre chiah lova. Forest a ni deuh vek mai a, kan khua lo hi chu, kan khua lo hi chu forest-ah kan chhiar deuh vek nge ni dawn. Helai te pawh hi a dik chiah em aw ka'n ti a. 91.47 kha forest in a cover ta a nia, hengte hi thil ni thei a ni ang em? Nge ni kan ralkhat tih mai mai zawk tih te pawh thil awm thei a ni a. Chuvangin Governor statement te hi chu a zahawm a; tin, thil dik tak sawi tura ngaih a ni a. Chuvang chuan a buatsaihtute hian zan kal mai mai hian an ti thin nge ni ang tih te pawh ngaihtuahnaah awm thei a ni a. A ni chiah e phei chu ka ti lo naa thil awm thei a ni a, heng hi tunhnu zel atan chuan fimkhur deuh chu a tha khawp mai. A dik chiah chuan kan Minister-te, kan Chief Minister te pawhin an enpui vek hman lovang a, kan official-te buatsaihah hian an fimkhur deuhhlekin chu a ngai chuan ka hria a.

Tin, kawng te pawh hi 23-na ah khan km 62.440 chauh hi formation cutting tiin a rawn chhuah a. Black topping-ah hian km 109.942 a rawn ti a, heng hi a dik em ka hre lova. Km 62 chauh chu laih awm loh tak a ni a. Hei hi reilote chung a ni lova, hman deuh atanga ruahman tawh a ni a, hengte pawh hi a dik chiah em ka'n ti leh zel a ni.

Tin, retaining wall te pawh hi a metre zawng hian an chhut mai a. Retaining wall a sei zawng 1,79,569.82 metre-a kan chhutin per running metre a lo ni a. Heng hi a nih phei chuan per running metre-ah chuan a tam hle mai a, 1,70,000 metre 1 a hman zel tur a nih chuan. Hetiang an chhut dan hi kan zuk hrethiam chiah lova, chuvangin heng hi tun hnuah chuan tun aia chiang zawk leh tha zawk deuhhlekin, figure te pawh hi uluk deuhhleka tih chu ni thei sela a that

ka'n ring a. A tlangpui thuin hei hi sorkar hnathawh tawh ziahna a ni mai a. A sorkar hnathawh chu engkimah a chhe famkim bik lohna lai te pawh a awm tho ang a, thatna lai te pawh a awm tho ang a. Chuvang chuan a figure a awm chi ang hi chu kan fimkhur lehzuah loh chuan min an chhut thiam ve vek mai si a. Sorkar anga mualpho theihna pawh thil awm thei tak a ni a. Chuvangin hun kal zel tur atan hengah hian fimkhur lehzuah kan tih hi a tha awm mang e aw ka'n ti a. Sawi tur tam tak chu a awm ang a, kha kha a tlangpuia ka'n sawi chu ni mai selangin, ka lawm e.

DEPUTY SPEAKER : A lawmawm e. Tunge han sawi ve leh ang le? Aw, Pu Chalrosanga Ralte.

Pu CHALROSANGA RALTE : Pu Deputy Speaker, ka lawm e. Hei vawiina kan Governor Speech hi kan MLA zahawm tak Er. Lalrinawma rawn sawi kha kei pawh ka lo chhiar a, ka lo chik ve viau a. A thusawi hmasa lampanga a lungawi lohna kha ka lo pawmpui riau a. Tin, pakhat leh ka han sawi duh riau chu keini sports mite kan ni bawk nen. Niminah khan sports chungchang kha pakhat mah a sawi lang lo kha ka lung a awi lo deuhhleik a. Hmanni lawka North-East Games-a kan Athletic Association hote leh kan contact sport players ten an medal lak te kha a rawn tarlang lo hi a paw ka ti hle mai a. Kha kha kan Department-te hian kan Governor zahawm tak hi an feed lo a nih ka ring a.

Engpawhnise Pu Deputy Speaker, khatiang bakah khan lawmthu sawina tur tam tak a awmin ka hria a. A bik takin PWD kan han tih hian, a chhe lampang ringawt hi kan han sawi thin a. A chhiatna lai ringawt hi kan han zawng thin a. Amaherawhchu, vawiina kan Governor Speech atanga kan hmuh hian kawng kan siamna tur leh hmasawna chi hrang hrang NABARD atang te, NLCPR atang te, khawi khawi emaw atang te a pawisa kan hmuh a kawng tha

kan siamna tur tam tak mai hi a lo awm a, hei nimin khan a rawn tarlang a, hetiang hi a lawmawm ka ti takzet a. Hetianga sorkar hmalaknate hi a chhe lampang ringawt sawi lovin a tha tur zawk kawng kan siamna tura hma kan lakna te a rawn pholang hi lawmawm ka ti takzet a ni.

Tin, Pu Deputy Speaker, Taxation chungchang hi tlem te han sawi ka duh a. Niminah khan kan Governor khan a rawn sawi a, chhiah kan laknaah te pawh hian hma kan sawn a ni a rawn tih hi a lawmawm ka ti a. Kan sawi thin a, khua leh tui kan nih chuan chhiah pek hi kan mawh a ni. Development kan duh a, infrastructure tha kan duh a, kawng tha te pawh kan duh a. Amaherawhchu, chhiah kan pek hi chuan development-te, infrastructure tha takte hi mipui hnen atanga kan lak tlingkhawm atanga kan sorkarin hma a lakna tur sum anih avang hian chhiah kan peknaah te pawh hian, politics-a in chirhthehna mai mai ni lovin, zirchiang zawka chhiah kan pek turte pawh hi kan tih tur a ni, kan mawh a ni, tiin kan inzirtir mawlh mawlh hi a ngaiin ka hria a, hei hi a pawimawhin ka hria a.

Tin, Pu Dy. Speaker, Mizoram hi chu kan la vannei a, income tax te kan la chawilo a ni. Chuvangin, tuna chhiah tlema zawng kan pekte pawh hi a phun zawng ni lovin, hetiang hi kan tih tur a ni tih hi inzirtir nawn leh ila thain ka hria a. Hmanni lawkah Guwahati-ah ka zuk kal a, ka thil hriat thar pakhat chu income tax hian Aizawl-ah hian office an rawn hawng tih ka hre thar tlat mai a. Hetiang a rawn nih chhoh zel chuan hma rawn lak te hi an tum dawn emaw ni aw tihna rilru hi ka nei deuh hlek a. Hei hi kan hotute hian min zirchian sak se, income tax te hi nakin lawkah hian tribal kan nihna ang a min exempt a nihna ang hian, nakin lawkah hetilaiah office-te an rawn dah chho te a nih chuan pek tir tur hian hmalaknate hi an nei ang tihte pawh hi a hlauhawm riau mai a, hei pawh hi zir chian hi a va ngai dawn em tih hi ka rilruah a rawn lang a ni.

Pu Dy. Speaker, Education chungchangah khan hmasawna leh hmalakna tur chi hrang hrang kan Governor khan a rawn sawi a, a bik takin zirtirtu kan lak chungchangte a rawn sawi thar leh a. Tin, Science leh Mathematics bikah khan 33.33% kan reserved tawh a ni a tih te hi a lawmawm ka ti a. Ka'n sawi leh duh chu, harsatna hi Mizoram hmun hrang hrangah hian kan tawh a ni, tunah hian school hrang hrangah a bikin thingtlangah hian Science leh Mathematics teacher an awm loh chuan khami khuaah khan school kal duh lo kha an awm tlat mai a ni, khawpuia indah dawn a harsa tak takte hi an awm thin a. Chuvangin tunah hian Science leh Mathematics teacher tana reservation kan hotuten an dah te hi a lawmawm ka ti takmeuh a ni.

Tin, Training Centre-te, Guest House-te, Hostel-te siam kan tum te leh siam a awm mekte hi a lawmawm ka ti a. Tin, Teachers Quarters Unit 15 sak a ni an rawn ti a, hei hi ka rilruah a rawn lang phat mai a. Zirtirtute tana quarter kan sak hi a pawimawhin ka hria a, a bik takin thingtlanga zirtirtute tan hian a pawimawh lehzualin ka hria a ni. Hei hi a chhan chu, tuna kan buaipui em em mai transfer and posting-ah hian zirtirtute tan quarter kan sak sak a nih chuan an awmna tur thingtlanga mi in hnuai luah mai lovin kan zirtirtute hian quarter tha tak an neih chuan thingtlang-ah pawh hian awm se hrehawm an tih ka ringlo a ni. Chuvang chuan kan Governor-in a rawn sawiah hian quarter 15 kan sa a rawn ti hi nakinah chuan 15 mai ni lovin thingtlang hmun hrehawm tak takah te pawh hian hetiang quarter hi kan sak belh leh zel theihna turin kan hotute hian hma an la chho zel turah ngai ila.

Pu Dy. Speaker, a tawp ber atan chuan Health chungchang kan Governor-in a rawn sawi hi a pawimawh ka ti a. Sorkarin nasa taka hma a lakna a rawn pholang hi a ropuiin a lawmawm ka ti a. Falkawn-a State Referral Hospital-te pawh Medical College-a hmalakna tur a awm a rawn ti te hi a

lawmawm ka ti a. Kan Health Minister te, kan Chief Minister-te hmalaknaah pawh hian lawmthu sawi tlak a niin ka hria a ni.

Tin, Pu Dy.Speaker, niminah khan Governor-in a rawn sawi a, a rawn sawinaah khan ti hian i phalnain - “Ensuring the health of the people of Mizoram in both urban and rural areas is another key aspect in which my Government has focused its energies on despite financial constraints” te a rawn ti a ni. Mizoram-in sum leh paia kan harsatnate hrechiangin vawiinah hian Mizoram mipui tan hian Health chungchanga hma nasa taka kan lakna nimina a rawn phochhuak kha a lawmawm ka ti a.

Tunah hian Saiha-ah 100 bedded District Hospital te, Lawngtlai-ah 50 bedded District Hospital sak tumna te a awm a, heng hi a lawmawm ka ti a. Tin, hemi bakah hian Lunglei Civil Hospital te saw la tihchangtlun leh theih a nih pheih chuan Pu Dy. Speaker, vawiina damlo tam takin Aizawl Civil Hospital kan indaih lohna saw Saiha-ah te, Lawngtlai-ah te, Lunglei-ah te kan siam a kan tichangtlung a nih chuan vawiina Aizawl Civil Hospital rawn pan 30% vel hi chu mahni District-ah hian kan enkawl thei tawh dawn a ni. Chuvang chuan hetiang a hma Sorkar-in hma a la hi a lawmawm ka ti a, District Hospital hrang hranga hma kan lak chhohnaah hian kan Aizawl Civil Hospital-te pawh kan chhawk zangkhai zawk dawn a ni. Hei vang hian a lawmawm ka ti takzet a, kan Governor thusawi rawn move tu in a rawn dil ang khan keipawhin he kan Governor Speech hi a lawmawm ka ti a, ka thlawp a, pawmpui tlak a ni tih Pu Dy. Speaker, ka rawn sawi ve a ni e. Ka lawm e.

DEPUTY SPEAKER : A lawmawm e, hun i hmang thiam hle mai. Tunge han sawi ve leh ang le. Pu Lalthanliana ilo sawm ang.

Pu LALTHANLIANA : Pu Dy. Speaker, ka sawilo mai dawn emaw ka ti a, amaherawhchu, a lawm lo ka ni ang tih kha ka hlau deuh si a. Hmalakna a nih hrim hrim hi chuan a lawmawm ka ti hle mai zel a. Kan kalkawngah hian harsatna te, buaina te tawklo chuan ringtu nihna pawh hi a hriam tak tak thei lova, churang chuan sorkar-in harsatna an tawk zeuh zeuh te pawh hi sorkar lo pawhin a tawk thova, hriatthiamna chin hi a awmin ka hria a. Amaherawhchu, kan Governor Speech hi nichina Er. Lalrinawma sawi ang deuh khan thil uluk lo deuh hlek hi chu a awmin ka hria a, a sawilang tawh a, ka sawilang lo mai ang a. Tin, a lawmawm lo lampang ka sawi leh duh chu, financial year chung ami ni lo, thil kal tawh, hlui tawh, hetia kan han pawrhchhuah zel hi kan tan a tha ang nge tha tawh lovang aw tih kan rilru chawk thar tur, min lo ngaithiam se, a ngaithlatute pawhin ka sawisual a nih chuan.

Entirnan, chhungkua han inthah deuh bawihna te leh khilai Zokhawthianga ambush chungchangte pawh kum hlui tawh lampanga mite kha a ni a, tharthawh zel tawh lo mai ila a case kha a kal zel tho bawk a, a tha mai ang em aw, tih te kha ka ngaihtuahnaah a lo awm a, hei hi kan sawifo hianin kan sawi atanga tha chho zel tur hi thil a awm a, tul tawh lem lo thil pawh hi a awm em aw tih te ka ngaihtuahnaah chuan a awm deuh a.

Hei, ka sawi hmasak ber duh pakhat chu Animal Husbandry & Veterinary department hi a ni a. Ran chaw chungchangah hian tunhma khan sorkar-in ran chaw a siam a, a hlawhtling lo angreng khawp mai a. Revolving fund te an nei tha tawk lo mai bakah, mahni leh mahni intodelh hlei thei lovin an awm a. Chutih lai karah chuan ran vulh kan uar tawh si a. Ran chaw tam tak ram pawn atangin kan lalut a, chumi karah thar thawhin khulai animal feed plant te, meal (ranchaw) te, her thar leh siam thar tura kan minister-in hma a la hi a tha ka ti khawp mai a. Kei ka la duhthawh a, hei aia nasa hian la ti se ka duh a. Kan ranchaw rampawn atanga kan lakluh hi a tam em em mai a, heti

chung chung hian a quality-ah vaiho siam, lo expert tawh te ho siam te kan pha lo hret a nih pawn mipui pawh hianin lei a, hman tangkaia, kan ranchaw siam, kan ram (state) chhung ami kan sorkar-in a siam te hi lei hram hram a. Kan ran te pawh hi chumi a han chawm puitlin ve te chu han tumna rilru te hi nei ta ila a thain ka hria a. Hei ai hianin a lawmawm ka tih rual hian duhthawhnaah hei aia nasa hian la ti zel se tha ka ti a.

Tin, No.13-na ami Horticulture College, Thenzawl-a din tum hi a tha ka ti khawp mai a. Ma'rawhchu, nichina kan ngaihthlak thuak ang khan zirtirtu chungchangah hian kan inrawlh thuk ve hi a pawimawhin ka hria a. Kan ram chhungah kan officer-te zingah pawh qualified teacher zirtirtute an awm chuan khang ho kha ngaih pawimawh kha a ngaiin ka hria a. State kan ni a, hei hi kawng hrang hrangin tih theih lohna tur kha awm chuangin ka hre lova. Huaisen takin keimahni mi leh sa kan induhsak khan a sawifel leh te chu sorkarin a sawifel leh mai ang a, a tih theih deuh maiin ka ring deuh a. Kha kha ka'n sawi duh a.

Tin, No.20-na ah hian tawite kan sawi ve duh chu ruihtheih thil chungchang a rawn tarlang a. Min thawngtute, min tihthaihtute chungchangah sorkar hmalakna te, civil society organizations leh NGO te hmalakna te pawh an sawi a. Kan chhiah hmuhna tur atana zu zawrh hi hei kan hmu tha khawp mai a. Chumi rual rual chuan ka ngaimawh deuh hlek thin chu, krismas bawr vel leh kumthar bawr vela kumdang aia kan veng ta kha kan chhuang viau va. Heng hi fak tur ni a ka hriat chu kan YMA te a ni a. An fakawm an hmalakna hi vengtinah kan duty a, keini ang te pawh kan duty a ni a. Veng chhungah kan duty a, chuvang chuanin, veng kha a thianghlim a. Chuti chung chung chuanin, kawngpui ana awm kan ni bawk a, a buaithlak khawp mai. Kan fel fihlim hle ta ang a kan han sawi zeuh hi chu ka'n ngaimawh deuh a. Kan nih ang ang hian lang ngam ila, duhthawh a la na khawp mai. Kan la thiampui vak lo a ni tih erawh hi chu inpawm ngam ila, hma kan sawn zel turah erawh chuan inngai ta ila. Chutah chuan a bul tumtu pakhat sorkar bakah chuanin kan YMA te hi an ni tih hi sawinawn fo hi tulin ka hria a, ka'n sawi thar leh duh a ni.

Tin, 25-na hi hei session apiangin kan ngaithla thin a. Budget-ah pawh kan la ngaithla thovin ka ring a. Power lampang hi duhthawh a na khawp mai a, chuti tak chuan kan hlawhtling ta tih tur hi a awm lo hle mai a. Tuirial hydel project-a 12% free core kan hmuh tur chungchang te kan zia ringawt a. Tin, Tuivai hydel electric project 2010 megawatt kan hmuhna tur atana MoU kan ziah tawh te; hei chu thawnthu hlui chu a ni lo nain kan ngaithla zing ta khawp mai a. statutory clearance heng ho hi ka ngaih pawimawh chu a ni a. Hemi danin a phut clearance ho hi a har viau a nih ka ring a. Session hmasa ber atang tawh khanin tiang ho hi kan sawilang reng mai hi a ni a. Hemi inkar hi zawhna ka zawt a, ka sawithui lo ang a. Helaiah hi chuan thil thar tehchiam hmasawna lutuk hi chu a awm lo hlauh mai a tih kha ka ngaihtuahnaah a awm a. Hmalakna hi chu a awm nain, keimahni ramchhung takah hi chuanin duhthawh a nat em avangin ka duhthawh deuh hlek avangin ka'n sawilang a.

Tin, 24-na hi nichinah khan a chhe lampang hlir kha kan tilang a, kan ti a, a tha lampang tur kan beisei financial year thar next financial year atana hmalakna tura hmachhawp hi hei a tha hle mai a, lo thlir ila, hetiang ang hi kan tihlawhtling thei ang em aw? Tihlawhtling thei chu ni ila, nakinah a tawp lampangah te pawh kan la fak leh turah ngai ta ila. Point 13 ngawt mai hmalakna chi hrang hrang kumthar ami tur chhawpchuah a ni a, tah hian, a lawmawm ka ti a, lawmthu ka'n sawi lawk duh baw a. Khang ho te te kha sawi tur a tam khawp mai a.

Chutah chuan ka rilrua tunlaia thawk na deuh pakhat chu sangha lampang hi a ni a. Sangha hi hei kan thlir kan thlir a, Mizoram chhungah hian sorkar leh mimal pawn sangha chi siamna kan lo ngah hle mai a. Tin, session a zawhna chhanna vel atang te pawh khan tam takah chuan kan ramchhung atang hian sangha chi pheih hi chu ramchhungah hian kan intodelh ta ni te pawhin a hriat a, thil lawmawm tak niin ka hria a. Amaherawhchu, kan ei hi a tam ta, kan fing tawlh tawlh a, Sangha ei nachang kan hre tawlh tawlh emaw ni? Kan lakluh leh kan tharchhuah hi inmil tur khawp hian hma la leh

ta ila a thain ka hria a. Chumi tur chuan Fisheries department-in hma an lakna hi hei point 4 lai a rawn ziaak a, NLUP ah te, RKVY atang ten a ropui ka ti khawp mai a. Hma an lo la nasa khawp mai a, hei aia nasa hian han ti thei se chu a duhawm khawp mai a. An tih tawh chin chinah hian lawmthu han sawi ka duh khawp mai a. Ma'rawhchu, duhthawh thilah sanghate hi kan la ei nasa tawlh tawlh ang a, kan mamawhna hi a la sang tawlh tawlh dawn a ni tih hria a, rampawn atanga kan mamawh te lakluh tihtlem hret hret a, ramchhunga kan tharchhuah tihtam hret hret dan hi tan lak thar leh theih chu ni se chuan a duhawm khawp dawnin ka hria a. Thil tam tak sawi tur a awm a, ka sawi duh thenkhat kan ngaihthlak tawh avangin ka sawi nawn tawh lo mai ang a, khang te kha Pu Dy.Speaker kan sawi ve duh a ni e. Ka lawm e.

*Speech not corrected

DEPUTY SPEAKER : A lawmawm e, pakhat tan chuan hun ala awm a. Aw, Pu T.T.Zothansanga ilo sawm ang.

Pu T.T. ZOTHANSANGA : Pu Dy.Speaker, ka lawm e. Kan Governor thusawi hi ka hriatsual loh chuan tha deuh khan kan bind thin khan ka hria a. Kumin hi a both sides in min rawn pe zauh mai a, a leh pekah chuan both sides ni lovin ni thei se a tha awm mang e ka ti a, chu chu kan sawi hmasa duh a.

Pu Dy.Speaker, ka sawi duh chu Horti sector kha para 13-naah khan a rawn sawi lang deuh nual a. Horti hi Mizoram-ah hian an pawimawh khawp mai a. Thingtlang lama kan inngahna nasa ber te zing ami a ni a. Sorkar hmasaah te pheih chuan kum 3 kan intodelhna tur source a ni kan han tih thin kha a ni a, a pawimawh lah tak a. Helaiiah pawh hian kan Governor speech a a rawn lannaah pawh hian sapthei te, pineapple te, orange te, tung te a rawn sawi deuh duah mai a, a lawmawm ka ti khawp mai a. Heng hi kan zo khaw nu leh pa te inngahna thui tak a ni thin a ni.

Chutih ruala ka sawi duh chu, sapthei hi kum thum kum li velah hian a tar deuh mai thin a. Tin, pineapple pawh hi kan sorkar hmasak khan company lam khan a example tur quintal 5000 min rawn pe rawh u an ti a, kan pe thei lo kha a ni a. Tin, serthlum lah a tam fo mai si a, tungte thing anchhedawngah kan han dah bawk a. Tichuan chiang taka hlawhtlinna kan neih pakhat chu grape hi a ni. Tunah khawchhak bialah grape hi a hlawhtling em em a, hlawhtling turin nasa takin sorkarin kan pui a, ama'rawhchu, tunah hian harsatna hi kan tawk chho leh mek a a ni. Zep thu a awm lo, MLPC Act kan han tih chhoh hnu ah pheih hi chuan kan hnawng a ni ta deuh ber mai a, a kawng hi sorkarin min zawnpui a nih loh chuan khilaih mi an taima a, theihtawpin hna an thawk a thlan tlain, an hlawhtling a ni kan tih mek kha tunah hian mangangin an awm mek a ni. Project lam te pawh kan la rawn siam ang a, khangah khan kan sorkar hotuten kan kut hnathawktute hamthatna tur leh an thawhrim rah an tel vena tur a ni tih hria a zau taka kawngka min lo hawn theih kha a tha dawnin ka hria a ni. A hlawhtling lo buaipui buaipui aiin a hlawhtling tawh te tan hian han pe hnem leh deuh ila kan hlawhtling leh thei ang tih kha ngaituahnaah a awm a ni.

Tin, Pu Deputy Speaker, para 19-naah khan New Urban Era-ah kan lut tawh e kan han ti mek a, tin, 5 Key Central Sector tih te kha a rawn tarlang nual bawk a. A 4-naah khan Housing for All Urban a rawn tih lai tak kha ka rilru a rawn hnaih khawp mai a. A chhan chu, 40 crore kha an rawn dah bawk a. Sorkar term hmasa khan UD & PA hnuaiah in engemaw zat sorkarin min sak sak tawh a. Champhai bikah chuan in 450 min rawn sak sak a ni. Thingtlang lamah eizawna a harsa ta em em mai a, thingtlang lo neih bansan turin kan inzirtir a, tichuan annin an bansan chuan thingtlangah eizawna a lo awm mai si lova, tichuan kan trend alo danglam ta a. Migration from rural to urban hi a tam ta em em mai a. Khawpuiah kan pem lut a, in leh lo din kan harsat tlang si a, chulai karah chuan helai para hi a pawimawh ta riau mai a “Housing for All Urban”

kha. Kan sorkar hian ruahmanna lian leh zual hi a neih leh theih hram kan beisei a, tun tuma 40m crore a rawn dah hi a lawmawm hle a ni. Kan migration trend hi thingtlang atangin khawpuiah kan pem kan pem dawn a ni, chu chu thil chiang sa a ni a. Helai ah in leh lo benbel maina tur hre lo tan an chenna tur ruahhman sak hi kan sorkar chak takin ngaihtuahna thuk leh zual a neih a th in ka ring a ni. A bik takin District Headquarter ah te kan lut nasa em em an tih kha rilruin min hriat sak sela a tha awm e.

Tin, Pu Deputy Speaker, 11-naah khan Minor Irrigation chungchang a rawn sawi a. Kum 2017-2018 chhunga zawh hman ngei turin project 25 lai kan neih thu a rawn tarlang a, a lawmawm ka ti khawp mai a. Khawvel hmun dang te ang bawkin Mizoram-ah hian tui hi a vang ve tual tual a, kan water ground resources hi a phai tulh tulh mai bawk si a. Nikuma lo kan neih theih kha kuminah kan nei thei ta hauh lo mai a, khatiang a nih avang khan MI hi a pawimawh ta zual khawp mai a. Helai ah a rawn tarlan ang hian hectre 118 kha cover a ni dawn a, chhungkua 791 in an hlawkpui thei dawnin a rawn sawi a ni. Helai project 25 hi ka nghakhlel khawp mai a, Zoramah Lo neihna tur hmun tha tak tak tam tak kan la nei a, ruahtui leh tui that tawk loh avanga neih theih loh tam tak a awm a ni. Khami kan neih theih hun kha intodelhna kawnga kan rilru put hmangah hian kan hma thlir a ni tih ka sawi duh bawk a ni.

Tin, para-12 ah khan NLUP chungchangah Vety kha a rawn sawi a hei hi a lawmawm ka ti khawp mai a. Mahni bial han sawi hi a nalh lo na a, Champhai-ah hian dairy-ah hian hma kan sawn nasa a, nitin litre 900 vel kan thar chhuak a. Sorkarin NLUP kan pe a, an hlawhtling tha em em a, an tui a, theihtawp an chhuah a, kumpui lingletin an ngaihtuah a, an thawk rim a, ei sen loh an thawk chhuak a ni. An thawhchhuah tawh khi enkawl leh turin NLUP board lam atang khan tlema inpuih theihna kha awmin ka ring a. Serchhip lam pawhin 'min han pe ve mai rawh u' an han ti a, transport kan nei chiah si lova,

Champhaiah chuan Chamul kan ti a, bawnghnute buaipui khi, khi khian harsatna kan tawk a, NLUP atangin tam tham lo taka min rawn dawm kan leh mai thei tur kha a ni a, kha kha min hriat sak leh thei ula ka duh khawp mai a.

Tin, NLUP atangin ranvulh kan thahnem a, tichuan Horticulture lam te, Agriculture lam te, kan ti nasa bawk si a, inchawhpawlh lutuk kha a rem silova. Chuvang chuan fencing tha deuh hi kan siam a ngai a ni. Vety lam atanga fencing te hi min rawn ruahhman sak loh chuan Horticulture lama kan hlawhtlinna te khian Vety ava ti chhe thin dawn a ni a, kha kha ngaihtuahna thar tha tak kan siam loh chuan kan ran vulh te hi mi pawisawitu, court thlen tamtu a ni dawn a ni. Court a thlen tam chuan jail luh te hi kan hreh viau mai si a, chuvangin pakhata kan hlawhtlinna hian pakhat va nek lo se, a nek lohna turin fencing te kha a pawimawh a ni ka han ti a.

Tin, chutih ruala thil lawmawm deuh mai chu Rural Animal Health Centre min han pe thluah mai a, kan bialah pawh kan lawm khawp mai a. Hetih lai hian Finance lamah VFA (zawhna leh chhanna term hmasa khan 36 kha a ruahmanin ka hria a) kha la clear theih loh kan neih kha rawn clear thei hram sela. Rural Animal Health Centre min sak sak te hi VFA te hian min rawn awp thei sela aw, tih kha kan hma thlir a la ni bawk a ni. A chhan chu ran an pung a, a enkawltu kan neih si loh kha chuan vawikhat a pulh hian na tak a ni. Nikum hmasa khan Hnahlan bial chhungah ran 400 vel an pul a, buaithlak ve tak a ni. Chuvangchuan, a vengtu tur VFA hi kan mamawh ngawih ngawih a, kan neih theih hun hi kan nghakhlel hle a ni tih kha ka'n sawi bawk a ni.

Tin, para 15-naah khan Governor zahawm tak khan Forest chungchang kha a rawn sawi a. Kan forest cover kha a zau khawp mai a, ama'rawhchu thlawhna te kan chuang thinin ka ring a, tar sam ang deuh hian hnuai lam hi a kawlh rul mai a. Forest a kan puan tak hi chu a reliable lo deuh em aw tih hi

ka ngaihtuah a, a percentage tam zawng ang hrim hrim hian kan rilru a lo tang palh ang tih ka hlau va. Forest kan han tih tak tak hi a chhah tam lem lo a ni. Chuvangin helamah hian kan tan a ngai khawpin ka hria a ni.

Hemi 91.47% forest kan nei a ni han tih tak hi chu a hre chiang deuh zingah chuan rilru hi chu a inthlahrung deuh a ni, kha kha kan dinhmun a ni a. Khawilai forest emaw kan tihah pheih hi chuan thinglukham tur ringawt pawh lak tur awm lohna hi a tam tawh a ni. Chutih rualin Wild Life Preservation, Wild Corridor a rawn tarlang te hi a pawimawh ka ti khawp mai a, thing hi kan nunna a ni a.

Hetih ruala ka sawi zauh duh chu, kan senior rual ten 'Zo Thei Huan' an ti a. Mizoram hmun hrang hrangah hian YMA te leh MUP te nen in co-ordinate in Zo thei huan hi hmun hrang hrangah an siam a ni. Chu chu kan khawtlang hian hmun tinah hian an vawngnim tha tlang em em vek mai a, tawng mawi lo nilo sela, Forest ai hian an humhim tha em aw kan ti hial a ni. Hengte hi sawrkar atang te hian ngaihtuah sak a puih theih dan te hi a awm thei turah ka ngai a, kha kha rilruah lo awm bawh sela.

Hei hun a tawp a, pakhat chauh Pu Deputy Speaker, ka'n sawi leh law law ang a. Sawmpariatnaah khan ka sawi duh a. (DEPUTY SPEAKER: Ngawi rawh aw lawk, pakhat chauh a ti a, dar khat a pelh deuh hret pawn sawi zawh tir lawk mai ang u aw. Amaherawhchu chumi pakhatah chauh chuan tawp tum la.) Ka lawm e. Para 3-naah khan a rawn sawi tha deuh mai ka tih chu, nichina ka sawi ang khan ka bial angah te chuan ran te kha an han pul nasa khawp mai a. Lo nei theilo te kha kan tam em em tawh mai a, chutih laiin kan sorkarin remhre tak maiin tractor te min han pe a 'Customer Hiring Centre' an ti a. A huho khan tractor intawm ang te ruahmanna sorkarin a rawn tichhuak a, 'Customer Hiring Centre' hrang hrang hmun hrang hrangah an siam a, a community in tractor nei thei anga min siam kha a lawmawm ka ti a. Chutihrualin power tiller kan mamawh em em thin mai sorkarin an sem an sem thin kha keini ang lonei mi

tan chuan a hlu em em a. Khatiang te kha sem leh ni hi awm thei sela tih kha tunah hian nghakhlel takin kan thlir a ni.

Kan Governor thusawi hi a tlangpuiin a tha ka ti a, a lawmawm ka ti a. Kan sawrkar pawh hian hma a lo va la nasa tehreng em tih te ka ngaihtuah a. Tin, opposition lamah an han sawi an han sawi a, dukhawp lohna lai te pawh kha, a landanah chuan a thawktu official te kha an dem em maw ni chu aw tih tur te kha a awm a. Engpawhnisela, kan Governor thusawi hi a lawmawm a, lawm takin ka rawn thlawp a ni. Ka lawm e.

DEPUTY SPEAKER: A lawmawm e, i pel lo hlah e. Dar khat a ri chiah a kan chawlang a, tichuan dar hnih ah kan thukhawm leh dawn nia. Recess till 2:00 P.M.

2:00 PM

DEPUTY SPEAKER : Chawhma lam khan member pasarihin kan sawi hman a, chawhnu lam hi chuan dar 4 hma a kan sawi zawh leh kan bang hma a ni mai a. A sawi tur kha innghak lovin inchuh deuh phat phat ila, ka phar hmasa ti vel tak tak ila sawi tum chuan. Amaherawhchu, sawi ka tum lem lo ti erawh chu phar pawh a ngai lem chuang lova. Pu R.Romawia a phar hmasa ber a, i lo ko ang.

Pu R. ROMAWIA, MINISTER : Pu Deputy Speaker, ka lawm e. Ka din ve chhan chu hemi a lawmthu leh lawm loh thu sawi tum pawh ka ni lova, ka sawi duh chu Urban Area kan tih dan, kan rama kal khata la kal lo lai tak hian kan member te zingah confusion a siam deuh niin ka hria a. Tichuan, tuna budget atanga kan han ngaihthlak urban sanitation, urban governance, urban infrastructure, urban planning tih ang te hi chu khawpui lian kan tih ang deuh tak tak ho hi a ni a; urban chu a ni vek mai a. Amaherawhchu, ni za inhlawhna chungchangah te kha chuan rural anga kal leh baw si area tam tak kan nei leh ta a. Keini Revenue ngat te phei chuan hetilaia urban anga kan pawm hi an tam khawp a, a chhan chu ram kha LSC te a lo ngai ve a, bank-ah loan te an lo duh ve avang khan. Chungah chuan LSC kan operate theihna tur khan urban area ang kha kan lo nei nual mai a. Tin, chutiang chuan ni za inhlawhna lampang kan han thlir ve

leh erawh chuan ni za inhlawhna khan RD department lam te, LAD department lam te, VC la nei si te khatiang ho zawng zawng kha rural-ah khan an lo chhiar ve leh lo thei lo va. Chuvangin, kan member zahawm takin 'more than 50 ni ve ve awm thei tlat mai, a chhiarkawp a dikthei lo' a tih kha a dik theihna lai kha a awmin ka hria a. A sawizawm zelnaah hian hetilaia 'khawpuiah zaa sawmnga aia tam lai kan lo awm ta a' a tihah khan hetilai a khawpui tak tak enkawl na tur atana thil lo kal ho te a sawi zawm a. Tin, rural ah hian a ti ta a 'rural-ah hian mihring hi kan la tam zel mai a' tihah khan ni za inhlawhna lampang te leh khang kha a sawi zawm a. Chung anga operation area lam zawngin a zuk sawi a, khami operation area population sawina a ni tih ang khan a chhiar dik theihin ka hria a, chu te chu ka han sawi ri duh a ni. Ka lawm e.

DEPUTY SPEAKER : Hun i hmangthiam khawp mai. Tunah tunge han sawi ang? Dr. K. Beichhua

Dr. K. BEICHHUA : Pu Deputy Speaker, ka lawm e. Tun kan session neih hi a lehlam takah chuan vanduaithlak ka ti dawn nge ni, ni chhinchhiah tlak tak a niin ka hria a. Minute riatin kan session tan hun tur kha Governor lokal tlai avangin kan tan tlai phah a ni, chu chu number one a ni a.

Pahnihna ah chuan nikum Mizoram Election chungchang kan Governor zahawm takin a sawiah khan bye-election chauh kha a sawi a, AMC nen LADC kha engatinge a sawi tel ve tlat loh? Ama discretionary power a awm ngawih ngawih a telh loh kha enge ni tih kha keimahah ngaihtuahna min siam sak a.

Pathumna ah chuan Fisheries kha ka hma amite pawh khan an sawi nual a, beneficiaries chhungte income-ah khan atleast 1.5-2 lakhs monthly income a ti a. Kha kha a tak a nih chuan a tam lutuk hi engtia ngaihtuah tur nge ni tih hi ka rilruah a lian viau a. Thla khata sum lakluh zat kha kan chhut a cheng nuai sangsarih zathum pariat a ni a, kumkhatah cheng nuai singriat sangsarih zaruk sawmkua paruk lai a ni dawn a ni. Chuvangin kan Minister zahawm tak hi hma ava la nasa em kan ti dawn nge kan Minister

zahawm tak hian a department a enkawl dan hi eng angin nge kan comment ang tih hi ka rilruah a awm a ni. Chuvang chuan, khanglai kha a pawimawh hlein ka hria a.

Tin, state-in flagship programme kan neih mek kha National Land Use Policy tihin a rawn thlak daih mai a; kha pawh kha Governor leh sorkar inkarah hian enge awm ta tih te pawh min ngaihtuah tir ta a ni. Sorkar flagship programme khatia a rawn thlak mai kha a ngaihpawimawhawm hlein ka hria a.

Minor Irrigation-ah khan kum engemaw zat project kan lo nei tawh lova, hetilai a 2015/2016 a project thar 25 kan nei kha lawmawm ka ti a.

AH & Vety-ah hian NLUP ah khan chhungkua singkhat sangthum za sawmsarih pahnih, Governor tawngkam ka hawh a nih chu Pu Deputy Speaker, dairy, piggery, mithun leh poultry pek an ni a. Saiha chhak ‘chhulo’ kan ti a, tunah chuan hming thar deuh vek angin lo sawi ta ila min lo hrethiam ula. Chutah chuan NLUP hmalakna sial kha T.V-ah an rawn tilang a ni. An sial kha a tha hlawm angreng khawp mai a, an nei tam angreng baw a. Chu chu anmahni interview tute kha Chhuanlung a ni a, ka han kal khan ka zawh chuan ‘a hma a kan lo neih daih tawh alawm, LPS ho in interview ang min ti a, kan interview ve mai mai alawm’ an lo ti a. Khangte khan ngaihtuahna min siamsak viau a. Chutih rual chuan Vety Minister hmalakna hi fak loh theih chi a ni lovin ka hria a, tin opposition te pawh vawkte te pawh min sem ve vek a.

Chutih laia ropui deuh mai chu artificial insemination kan han ti thei mai te pawh kha a ropui hle a. Khatia kan tih theih rual rual a ka rilrua lo lang chu engatinge ni vaw kahrail theih a nih chuan vaw man to, a naute singkua sangriat a kan lei kha a frozen sperm khan lalut ila man tlawm te in a tih theih mai lo maw tih te ka rilruah lian takin a awm a. Hei hi kan hmalakna zelah pawh kan ngaihtuah a thain ka hria a.

Horticulture hmalaknate pawh a rawn sawi a, NLUP atanga kan hmalakna tam tak trade sawm a then anih dan te a rawn sawi a. Tin, kan pawisa sanction crores 205.16 ang chi te pawh a rawn sawi a, NEC leh NLCPR atanga sum kan hmuh tam tak te pawh a rawn sawi a, a ropui hle a. Chutih ruala ka rilrua awm chu hmanni lawk khan kan hotute duhsaknain Bangladesh-ah kan zuk kal a, sawhthing kg-ah ₹80 in China atangin an lalut a ni. Chu chu anmahni Bangladesh Trade and Commerce Union te nen kan han sawi khan Mizoram hian kan duhtawk min supply thei dawn em ni tih kha min zawhna a ni. Tlabung atanga darkar hnih/thum lek kala trade tha tak kan neih theih reng lai hian engatinge ni vawiin thleng hian hei hi kan bawhzui loh a, theitawp a hma sorkar hian kan lak loh tih hi ka rilruah lian takin a awm a. Chu chu sawrkar pawh hian bawhzui ran a hmalak a va tha dawn em. Hei hian kan economy dinhmun hi nasa takin min khaichhuah ka ring bawk a ni.

Tin, National Agro-Forestry Bamboo Mission (NABM) chungchang a rawn sawi phei khan chuan, MNF President-in Mau a tuipui em em hi, ka piangthar ve tain ka hria. Zoram economic din chhuahna tur a nih tur zia Governor speech atang khan a lang Chiang Hlein ka hria a. chuvangin, mau hi tuipui ve chi a ni, mau a tui te tan chuan MNF a awm hi a van chi tak em tih te pawh hi rilruah te pawh a awm a. Trade chungchang a sawi a, Mizoram hi international boundary a awm kan ni a, boundary bula awm kan nih avang hian kan economy nasa taka han in develop chho tur leh, Delhi atanga engkim mai dil reng lova mahni kutkea kan din chhuah theihna tur chuan, heng International Boundary kan nihna, Border Trade hi tun aia chak zawk hian hmalak theih ni se, chu chuan nasa takin kan state hi hmasawna min thlen ngei ang tih hi beiseina ka nei bawk a.

Tin, sorkar-in ram chhunga infrastructure leh construction leh maintenance a ngaih pawimawhna leh hmalakna te pawh a sawi a, kan inkalpawhna kawngte leh leilawn te pawh a rawn sawi bawk a ni. Leilawn

chungchangah hian kei chu ka dinna ngaiyah ka la ding a. Nikum lama ka Private Resolution, 2014 ah pawh khan “Tun aia chak zawka hmalak ni rawh se” ti a ka rawn sawi kha, a then chuan hei aia tha tur chuan condition kan feed loh chuan tih te pawh kha tawngkam kan hria a. Chuvangin helaiah hian engpawhnise, nangni, keini inti lova, chak zawka hma kan lak hi a tha hle a ni.

Department tam tak hmalakna a rawn sawi a, chutih lai chuan Sports Department kha a rawn sawi tlat lo mai a. Engvanga kan Governor hian Sports Department hi rawn sawi lo nge a nih, football a kan hmingthat tehreng nen, teakwando-ah te, boxing-ah te leh discipline dang dangah te pawh, chutiang dinhmuna kan awm laia a rawn sawilo hi paw ka ti a. A rawn sawi lohna chhan awm ang deuh a ka ngaihtuah chu chhimlamah sawn sports infrastructure hi hmalakna a awm mang lova, chuvanga sawi lang lo nge maw a ni tih kha ka rilruah a awm a ni.

Pu Deputy Speaker, Tourism chungchangte pawh a rawn sawi a. Tourism chungchang hi a pawimawh hle a, kan ram hi mifate, ramdang ami te hian kan ramah hian cheng ta se, Tourist hip-na tur hian hmalakna tur tam tak hi a awmin ka hria a. Hei hi nasa taka hma kan lak hi a tulin ka hria a ni.

Tin, Health Department chungchang hi a rawn sawi a, lawmthu sawina tur tam tak a awm rual in, helaia ka rawn sawi duh pahnih/khat chu kan Civil Hospital, Aizawl tuna kan dinhmunah hian specialist bakah hian M.O. hi kan neilo a ni. Chu lovah chuan Post Graduate zirlai saw 10 rual vel an awm a. Sawng ho saw hlauh thla 6 lai pek loh an ni a. Internship ti te saw 40 rual an awm a ni, anni saw hlauh kan pe thei lo baw k a. Hei hi ka rilrua ka ngaihtuah chet chet chuan kan Medical College, tuna kan hmalakna darthlang a ni palh ang tih hi a hlauhawmin ka hria a. Helai hi sorkar hian theihtawp chhuahin han tang deuh se ka ti baw k a.

Tlemte ka'n sawibelh hlek ang a. Autonomous District Council chungchang a rawn sawi bawk a. Autonomous District Council pathum an control-na area a development hnathawk tur an nih zia a rawn sawi a, a dik viau a ni. 2015-2016 chhungin sorkarin crore 148.18 leh 159.92 plan leh non-plan atangin allotment development leh administration improve nan a release tih a sawi a. A bik takin Mara District Council chungchang hi han sawi ta ila. Heng atangte hian 95 leh 96 percent hi chu hlawhah kan inpe a ni. Chuti zat hlawha kan inpe a nih chuan development chu beiseiawm vakin a lang lova. Chutih lai chuan thla 2 hlawh te pawh inpe thei lovin kan awm thin a. Saw saw Governor, ama discretionary power hnuaiawm an nihna angin Governor hian sawlai saw min chinfel sak se, a pawimawh hlein ka hria a ni. (DEPUTY SPEAKER : I hun i hmang pel hret tawh a nia)

Pu Deputy Speaker, pakhat te chuah Excise & Narcotic chungchang kha a rawn sawi a. Zu chhiah atanga kan target kha 35.51 crore a nih laia 47.75 crore kan hmu ta mai kha, lawm tur chi nge ni ang a, lawm loh tur chi tih keimah ka inbuk a. Keima ngaihndan leh keima rilruah chuan Mizo mipui hian zu kan va han in nasa tak em, hei hian engnge ni a consequence tur a thim hlein ka hria a ni. Kan Governor thusawi hi Governor meuh he House zahawm taka thusawi atan chuan a zia lo ka ti a. ***He motion a rawn move-tu zahawmtak rawn move a hi kei chuan House zahawm tak tihbawrhanna speech-ah ka ngai tlat a ni. Pu Deputy Speaker, ka lawm e. (This portion of speech is expunged from the record)**

* Speech not corrected.

DEPUTY SPEAKER : Pu Lalrobiaka.

Pu LALROBIAKA : Pu Deputy Speaker, ka lawm e. Hei vawiinah Governor speech lawmthu sawina kan han sawiho a, a lawmawm hlein ka hria a. Governor speech-ah hian thil engkim a lang fiah em em a ni. Amaherawhchu, a lan fiah em em rual hian Mosia hunlai pawh khan thlaler ah rul khaikan a ni a, a en duh zawng chu an dam a, a en duh lo kha a then entir an han tum a, an maimitchhing luia an thi ta nge nge a ni tih te pawh kha kan hmu a ni. Chutiang deuh te pawh kha kan niin ka hria a. Kan opposition lam hi hrereng siin an sawichhe kual vel a ni a, a pawl khawpin ka hria a. Amaherawhchu, a spirit-ah tak tak chuan anni pawh hi an chiangin ka hria a ni. Ka hmaa rawn ding pawh kha a chiang hle mai a.

Ka'n sawi hmasak duh chu hei kan sorkar, Mizoram sorkar-in bye – election a lo face chhoh a, Election Commission ten an han puahchah a felfai zia han sawilan te hi a ropui ka ti a. Ka sawichhuah duhna chhan kher chu, hemi atanga kan YMA te an tangkaizia te, nu leh pa an tlin zia te an rawn sawichhuah hian min tilawm lehzual a. A dik a, anni hi neilo ta ila, kan state thenawmte han ngaihtuah hian kan vanneih zia hi a lang chiang em em a ni tih ka'n sawi duh a.

Chutih rual chuan lawmawm ang reng deuh si kan sawichhuah leh duh chu tlin changa sawiselna awm si lo, tlin loh changa engemaw ni, an rig leh ta, a khawl a tha lo a ni tih vel eng eng emaw han sawisel kha AMC ah a awm ta miah lo te pawh hi a lawmawm ve hrim hrimin ka hria a. Heng zawng zawngah hian hma la tute an fakawm ka ti a. Amaherawh chu, helai point no. 3-na ah hian National Land Use Policy han tih lai printing mistake an awm te hi a pawl hlein ka hria a, hetiang chi hi hmundangah chuan awm tawh lo thei se a tha khawpin ka ring a.

Ka sawi leh duh chu, Agriculture & Allied Sector bikah hian a figure a sawi lovin kan changkan nasat zia a rawn sawi hi a ropui hlein ka hria a. Tin, hemi bakah hian NLUP avanga kan ramngaw Jhum System kalsan a, permanent a lo kan han neih tak avanga aforestation lo awm chho zel, forest kan han neih chhoh belh zel te hi a lawmawm hlein ka hria a. Heng avangte hian midangte pawh hi lo tel zel an la chak ang tih ka ring a ni NLUP chungchangah hian tin, forest kan rama a that avangin 14th Finance Commission-ah pawh khan pawisa 7.5% kha pek belh kan ni nghe nghe a ni. India ramah phei chuan pakhatna kan ni nghe nghe a. Tin, satellite atanga laka tih a ni a, helaiah kan Governor emaw, sorkarin emaw tih mai a ni lo. India Forest Report, 2015 atanga he forest chungchangah pawh hian lak a ni tih hi Zoram pawh hian kan hriat a thain ka hria a. Chuvangin heng kan hlawhtlinna tam tak hi kan sawi seng lovang a. Amaherawhchu, kan sawi ang khan kan hlawhtlinnate kan kut atanga chhuak a nih loh mai avanga ni ta lo tura han dah rikngawt chi ang te hi thil vanduaithlak tak niin ka'n hria a.

Hei, RKVY atangte leh thil chi hrang hrang atangtein Agriculture-a kan dehchhuah tam tak te, tin, WRC I & II atanga kan lak te, Oil Palm atanga kan lakchhuahte hi keini anga thang chak state hi a bik takin North East-ah phei chuan an awm lo a ni tih hi tlang hriat a ni a. Chuvang chuan, a percentage a han chhut te, tin, area leilet kan neih zau zel dante leh kan production te han en hian kan vannei em em a ni. Hemi atana ngaihtuahna sengtute, sorkar, an rilru leh an thawh hahna nasa takin mipuiin kan chhawr chho mek a ni tih hi zep thu a cheng lo a ni tih ka'n sawi duh a.

Tin, Animal Husbandry & Veterinary-ah khan han sawi leh zawk ka'n duh chu, hei keipawh, han ti ve khanglang ila, ran khawi chi, ngaina chi leh vulh reng mai ka ni ve thin a. Ran enkawlte hi a nuam em em a, nun a tihlim a. Vety-ah pawh hian NLUP atanga hlawhtlinna kan hmuhte hi a tha em em a ni. Wawiin chuan mipuiin sa hrisel tha tak takte, tunhmaa kan ei phak loh tam tak kan ei tawh a. Chumai ni lovin tunah hian NLUP atangin mi tam takin hlawhtlinna an nei tawh a ni. Kan member thenkhat khan an

hrethiam lo lek lekin ka hria a. Economic Survey 2014 -15 ah sa 12525 ton kan thar chhuah thu report leh Governor speech-ah 2015 chhunga ton 8000 chuang chauh thar leh si, a sa thar a tlahniam anga sawi hi April, 2015 atanga October, 2015 chhung, thla 7 chhung data chauh a ni tih hi kan member-te khan hria ila a tha ang a. Data kan lak te hi a chiah chiah lai kha kan sawilan loh chuan hriatthiam a har duh fo va. Chuvang chuan khalai inmil lo kan tih te pawh kha khalai a data kan lak lai period kha a ni tih hi kan hriat a pawimawh khawp a.

Tin, NLUP beneficiary-ah hian kan engineer lamte pawh khan an chhut nasa khawp a, a chhut chi an ni bawk a. Khatiang kha ni lovin a vaiin 37047 a la ni reng a. Governor speech-ah khan Department-in NLUP beneficiary-ah a cover zat hi kum 2015 chhung chauh a cover a ni, total NLUP beneficiary nen ngaihrawlh loh chi a ni. Khalai te kha lo hriat a thain ka hria a.

Tichuan hei kan bawngnhnute thar chhuah te pawh nasa takin a lo pung ta a. Tunhmaa kan inchuh thin, mipuite pawh huatthu lovah Gurkhali hovin an rawn sem a, kan inchuh a, a chuang a awm lo, kan tih thin kha, tunah chuan, ‘in duh em? i duh em?’ tih a ni vek tawh a ni. Chutiang chu kan ni a. Sorkar kal chho leh NLUP a awm atang hian nasa takin hma kan sawn a ni tih hi hriat tur a ni.

Tin, Horticulture-ah te hmasawna tam tak kan nei a. Tin, vawk note chungchangah khan ram pawn atanga lak luh, tih kha nichin khan sawi ni a. Hemi chungchangah hian minister-te pawh kei pawn ka lo zawt ve a. Chungah te pawh chuan a chi, frozen sperm kan ti nge ni, khatiang zawnga lakluh tur kha ni awm tak a ni tih kha ka’n sawilang ve leh duh a ni.

Tichuan, hei infrastructure lian pui puite din chhoh a ni zel a. Kan infrastructure tam tak te hi hun hmasaah khan tihchhiat te a lo ni tawh thin a. Kan hriat angin power-ah pheih chuan Tuirial Hydel Project-te pawh mimal, chhungkua leh tute

emaw bik induhsakna avangin abandoned a ni tawh a ni. Amaherawhchu, he sawrkar a lo din leh hnu hian chu chu chhunzawm lehin vawiinah chuan hawn theih mai tura peih tep a lo ni leh tawh a ni. Hengte hi tuman kan haiin a rinawm lova. Tin, Tuivai te, Tuirini te, hmun hrang hrangah a awm thei ang ang, kawng te, hmalak theihna awm zawng zawngte chu he sawrkar hian a la a ni ber a. Helaia ziahah te hian kan hmuin ka ring a.

Tin, chumai ni lovin khung khawthlang lamah te pawh W. Phaileng, Marpara kan han tih te pawh a hma lamin lo siam tawh a ni a. Chutih rual erawh chuan a kal zel theihna tur leh a that zawkna turin ₹ 11.90 crore kan han neih belh leh dawn a ni a, khatiang khan hmun hrang hrang, Chhipphir Road tih te, hmun hrang hrang a ziahah khan kan sawi vek hman lovang a. Khatiang khan hmun tam takah vung thar a chhuak serh surh a ni tih kan hria a.

Hei, kan hriat angin tuna Sairang atanga Tripura tlawh tur te, Tut bul te in kal chuan in hriain ka ring a. Vawiinah hian a hlawhtlinna kan hmuh hun chuan Phaileng emaw, Mamit emaw reiloteah kan thleng mai dawn a ni. Chutiang chuan World Bank Project-II kan han tih te, thil chi hrang hrang sawi tur hi a tam em em a ni. Chuvang chuan kan Governor speech hi a tha thlawtin ka hria a, sawi tur pawh a tam.

Tin, sawi hmaih hauh loh tur chu Handloom-a kan hmasawna a rawn sawilan te, Handloom-a mi tui mi te, Industry neiten an hlawkpui zia te, tin, chumai ni lovin tunah pheih chuan America ramah te, Australia ramah te export kan nei ve ta hial a ni. Chutiang dinhmunah chuan he NLUP, kan flagship programme hian result a chhuah mek a ni.

Tin, pakhat lehah chuan sawi hmaih hauh loh turah chuan hei kan sawi thin a, mipui, chungkaw tin thleng phak leh chungkaw tinin kan mamawh gas chungchangah te kan hria a, mega block te a awm a ni tih kan hria a. Amaherawhchu,

mega block a awm a ni tih hre lo hial khawpin vawiin thleng hian chhum lo chat lovin mipuiin gas te pawh hi kan nei a ni tih hi kan hriat a tha a. Kan hun kal tawhte kan hria a. Bhavan hnuaiyah sawn tunhma chuan sem a ni thin a, Bhavan-a nitin kal kan ni. Chumi a nih avang chuan lungte an dah thin a nih kha. Tunah chuan Rel a lo kal lo chung pawhin kan sorkar chak takin hma a lakna avangin hetiang hian kan awm thei a ni a. Sawi tur a tam khawp mai, Pu Deputy Speaker. Chuvang chuan heng zawng zawng kan Governor-in a rawn sawi te, Governor speech kan han tih hi rilru tak takin ka support a ni tih ka han sawi a ni e. Ka lawm e.

DEPUTY SPEAKER : Awle, a lawmawm e. Tunge sawi leh ang le, Pu R.L.Pianmawia.

Pu R.L.PIANMAWIA : Pu Deputy Speaker, lehlama mite ka han kian deuh a, an ti mai si lova, sawi tur a tam si a. Kan Governor pawh hian hei, a thusawi hi a famkim lo chung hian a tawpna siam a ni lo thei lova, a tawpna siam dan te hi a mawi em em mai a. Hetianga Governor speech a bul tanna leh a tawp kharna mawi hi a la awm loin ka hria. Helaia thu tanna sentence hmasa “I am sure that under able leaders such as you”, a tih te hi keini mi mawl, sap tawng thiam lo pawhin a mawi kan ti ve ringawt phawt mai a, min chawimawi tha ve hlein ka hria. Tah hian lawmthu sawina tlak niin ka hria.

Kan thiante khan an hrethiam lo deuh a. New Land Use Policy tih kha, National Land Use Policy tiin an thlak ta em ni an ti a. Kan Governor hian national tia a rawn tihna chhan niawma ka ngaih dan ka han sawilang duh a. New Land Use tih ringawt khan party mal ta bik ang khan min puh deuhin ka hria a, khatiang kha a ni tawh si lova. Rampum huapin oppsition party leh party lo pawh a sawi tawh loh avang khan national tia sawi pawp mai khan a dik ber e ti khan a sawi ta mai niin a lang a. Chuvang chuan kan Governor rilru zau zia hi a tawngkam hman duh dan hi a ropui mang e aw ; lawmthu sawi tur kan va ngah ve tih kha ka rilruah a awm a ni.

Tin, election chungchangah By-election leh AMC inthlan kha a bu ang thlapa zawa nih thu a tarlang kha kan nihna nen pawh a inhme hle mai a. Krtistian rama inthlanna felfai taka zawh a nih thu, mawihnai taka a rawn chhawpchuak leh a rawn tarlang kha a lawmawm ka ti a. Tin, khami mai bakah pawh Y.M.A. in nasa taka an thawrimna thin te tarlan dan remchang tak mai National Civil Society Organization Award Y.M.A. in a dawn thu a rawn tarlang te kha a lawmawm ka ti a. Y.M.A. sawichhuahna remchang tak khatianga a rawn dap thiam te kha a fing mang e aw ka ti a.

Governor speech-ah khan, Fisheries Department hmalakna a rawn sawiah khan kan hriat ngai loh a rawn sawi tel kha a awm a, a ropui ka ti khawp mai a. Community Hall pathum, Welfare of Fishermen Programme hnuai ah an lo sa ve reng mai hriat te kha lawmawm ka ti a. RD atanga Social Education-ah sum awm thei tawh si lo Hall sa thei lo te tan pawh khan bial chung sangha khawi te an lo awm khan chuan he welfare programme atang hian Community Hall an sa thei dawn a ni tih te kha min rawn kawhmuh bawka, kha khan beiseina eng min pe nual mai tih ka sawi lang duh a.

Tin, Chhanchhuahnakhawpuiah Aloe Vera chinna leh hmalakna atana ₹ 32,00,000/-(nuai zathum leh sawmhnih) lai mai, central-in a rawn pek tawh thu a rawn tarlan te kha a lawmawm hlein ka hria. Hetiang hi hmun dangah han tarchhuah pawh kha a nei lem lova, Aloe Vera hi thil hlu tak a Faina Sahbawn a lo chhuahna bul a ni a a ropui hle a ni. Chhanchhuahnakhawpuiah hetiang ruahmanna a awm thei te hi hmun kilkhawr ber pawh kan sorkar hian thlahthlam a tum loh zia, in 34 bawr vel awmnaah pawh khatianga sum leh pai tam tak sengral tura ruahmanna a siam duh hi he Sorkar ropui zia a rawn tarlangin ka hria a, ka han sawi lang duh a.

Tin, Housing for All hnuai crore 40 lai mai dah a ni kha alawmawmin ka hria a, District Head quarter chauh lo pawh a huam thei dawn a ni tih a hriat theihna chu City & Town tih kha a ni kher mai a. Khalai khan miretheite thleng phak programme,

khawpui tan chauh ni lo a nihzia Governor speech atang hian a hriat theih a, a lawmawm hle mai a.

Tin, chawhma lam khan Pu Thanliana, MLA khan tarlan chi pawh a ni dawn emaw ni le a tih kha, Dt 28.3.2015 Assurance Committee-in Zokhawthiang daia beihna an tawh a Police pathum ten nunna an chan thu a rawn tarlang hi a lawmawm ka ti hle a. Hnam chhantu, hnam chhana huaisen taka nunna hlantute chungchang sawilanna remchang a rawn ruahman thei kha a lawmawm ka ti a. Kan ram leh hnam tana beitung, nunna hlantute a rawn hrechhuak a, a rawn tarlang leh kha ropui ka ti a. Sawilan fo tlak a ni tih kha a hre chiang a, a rawn tarlang hi a lawmawm ka ti hle a.

Tin, kan Governor speech-ah khan, kum 2015-2016 chhunga sorkar building 13 lai mai sak zawh a nih thu a sawi kha a lawmawm ka ti a. Tunhma hun sorkarah te kha chuanin sorkar building nei thei tura hma han lak rap rap a nih pawhin a pawimawh chin a te biakthiamna avangin sorkar building kha sak lohvin a awm fo thin a. Mimal in luaha hlawkpui duh te rilru avangin. Tunah erawh chuan khatiang rilru kha kan hotute-ah a awm lo a ni tih a chiang em em a. Mimal in luah a sum tam tak hailuh theihna tur kha a awm tawh loin sorkar building 13 lai mai sak zawh a a awm kha a lawmawm hlein ka hria a.

Tin, kan sorkar inpuahchahna a ropui zia lawmawm ka tih em em chu state matching share, NLCPR leh NEC atan state matching share an dap thlap mai te hi a ropui ka ti a. Tin, chibai aw, an ti a, pek ve tur ban ve nachang hre lo ang kha a tha lova. Chuvangin chibai aw, ti a lo chibai ve thei nghal tura a lo inralring kha a ropuiin a fin thlak hlein ka hria a.

Tin, kan la hriat ngai zen zen loh PHE Department-in revenue crore 24.6 lai mai December, 2015 thlenga an han chhunluh thu a tarlang ve hi a mak hle mai a, a seng ral chi department kha niin a hriat a, hetiang a kan hotute kaihhruaina hnuaiah sum

lakluh an awm thei ta zawk mai hi a mak mang e aw, mumang te pawh a ang thei rum rum mai tih ka ngaihtuahnaah a lang a. Hengte hi kan Governor speech atang khan kan han hmu thei hi a lawmawm ka ti takmeuh meuh a

Tin, Handloom lamah sorkarin hmathar an la thei te hi a lawmawm hle mai a, a zar zo pha chinah te kan tang ve a, training te buatsaihin tunah hian bul tan tak takna tur a chi minrawn tuh sak tawh bawk a. Tin, ram pum anga hmalaknaah pheih chuan Handloom a eizawngtute tan inngahna tlakin sorkarin ruahmanna a kalpui chho mek te hi a lawmawm em em a. Tun aia nasa zawk hian la kalpui leh sela a duhawm hlein ka hria a.

Le, a tawp berah chuan Pu Deputy Speaker, nichina thuhma kan sawi ang deuh khan kan Governor speech-a a thu tawpna sentence-ah khan arawn tarlan leh kha ka'n sawi lang duh a. I remtih nain ka'n chhiar chhuak ang a "I hope that My Government will receive the continued co-operation of honorable members of the House and citizens of this wonderful State" a ti deuh kher a ni. Chuvangin a bula mawi taka arawn tan a kha a tawpawh pawh a khar mawi leh hle a, chuvang chuan kan Governor thusawi hi a lawmawmin a chhuanawm ka ti tak meuh meuh a, ka thlawp a ni e. Ka lawm e.

DEPUTY SPEAKER : Ngawi ru aw, kan debate kan titawp lawk ang a, kan debate hi Rules of Procedure and Conduct of Business in Mizoram Legislative Assembly anga kaihruai a ni a. Hemi kan rules 338-na hmang hian nichina kan member zahawm tak Dr.K.Beichhua thusawi tawp lam "Governor Speech hi House tihbawrhannaah ka ngai a ni" a tih kha Speaker thuneih nain expunge turin order ka pe a ni. Kha kha expunge tur a ni e. Kan dan 338- na hmangin unparliamentary, undignified, indecent a ni, House tihbawrhannaah Governor speech ngaih kha.

Le, kan debate kan chhonzawm leh ang a, tunge han sawi ang le, Dr. Ngurdingliana

Dr. NGURDINGLIANA : Ka lawm e, hun rei ka la lo ang a, department thenkhat ka rawn sawi ve dawn chauh a ni. Tukinah khan ka zawhna kha vanduaithlak takin ka zawt hman lova, chumi zulzui deuh chuan ka kal mai ang a.

A hmasa bera ka sawi duh chu tun kum 2 kum 3 kal chho hian sawrkar pawn tan a la; tin civil Society te leh forum hrang hrangah kangmei laka invenhimna kawngah leh faina kawngah hian hma kan sawn em em a, a lawmawm ka ti. Kumina kangmei venhimna hapta hawna kan Chief Minister, House Leader zahawm takin mipuite hnena ngenna a rawn tarlan pheih kha chu a inthlahrung mah mah emawni chu aw ka ti a.

Global warming kal chho zel hmahlir chhui pha chin chuan a thu chah pawh kha an khawngaih khawpin ka hria. Tunah hian indication-a a lan danah chuan social media-ah te, whatsapp/ face book/ internet-ah te tun kum 2 kum 3 chhunga mi thahnemngai ten thahnem ngai taka he khawvel lo lum kalchho zelin a nghawng hre si hian statistic/ data rinawm tak tak kal tlanga thahnemngaia mipuite min rawn zirtirna hi a tam lutuk. Kan lo haw hnu kumin kum tirah newspaper clipping hi ka chepthla thin a, chhah tak tunah hian a ni tawh a ni, a lawmawm lutuk. Heng zawng zawnga an khamkhawp lohna angle area ka hmuh chu, a hremna nep lutuk hi an sawilang vek mai a. He House zahawm takah kan sawrkar thuneituten session lehah chuan a bik takin fire prevention lamah dan khauh tak rawn siam thei sela, ihe lovin House member te pawhin kan pass ka ring a. Tun dinhmunah chuan Mizo kan ninhleina thin, kal paha kan bula thingte kan sah thin te pawh kha a tlem sawt tawh khawp mai.

Zirtirna awareness hi a tam tawh a, school level-ah a ni emaw, NGO level-ah a ni emaw, public meeting level-ah a ni emaw, Gramsabha-ah te emaw, mipui kan

fing telh telh a, ramngaw humhalh a tul zia pawh tunah hian kan inhre fiah, chutih karah mawl vang nge pawh ka hre lo va, engemaw vang chu a ni ang, ram tihkan a pawizia te hre miah lova inthlahdahte tam tak an la awm hi chu hremna tha fek fawk vawi hnih khat han ti ila chu an sim mai chuan ka ring. Chuvangin hemi zawng hian kan sawrkar chak tak hian engemaw dan khirh deuh rawn siam sela. Kan Governor speech-a a rawn hailan ang hian kan forest total cover geographical area pawh 91% a nih rual rual khan a khamkhawpawm lohna lai tam tak a awm a. Thingkung awm leh awm lohna te mau hmunte a la tam em em a. Chutih rualin kan sawrkar a Forest Department ten hma la-in tunah pawh wild life sanctuary tur propose pawh in nei tih kan hria a, a lawmawm lutuk a, a thlamuan thlak. Keini pawh kei mahni area-ah khi chuan ram sanctuary tur emaw, National Park tur emaw te pawh kan nei. Amaherawhchu hetah hian kan Forest Department leh hotuten hriat tur chu hetia khua emaw, vengin emaw ram awl kan nei a, department-a kan rawn offer che u hi department-in in enkawl ai chuan NGO, YMA emaw, engemaw MUP te kuta kan hlan thiam hian a khawtlang mipuite hian kha pawl hmalakna leh kha pawl nih phung kha an zah avangin discipline leh enkawl zuina zelah pawh an fimkhur phah zawkin ka hria a.

Amaherawhchu tanpuina enggemaw, backup support kha chu a department atang chuan inpek chu tha ka ti a, chutiang chuan tunah hian kan ram chungah pawh hmun tam takah khatiang ram pe phal khua, veng kan nei a ni tih kha kan hotuten lo hria ula ka duh a ni.

Tin, hemi piah lamah Pawlrang sanctuary Kolasib District chungah lo awm tur proposal lo awmte kha ngaihthlak a nuam khawp mai a, kan duh dan chuan kan ram hi hring dup sela, chung chuan a ken tel hi a tam lutuk a, vawiina sawisen pawh a ni lo, nihliap hnuai leng vek ang hi a ni mai hriselna, hmasawna engkim a keng tel a ni. Nimina kan Governor thusawi dik em em chu Pu Deputy Speaker, i phalnain hei hian a khaikhawmin ka hria a, keini tawngkam thiam vaklo tan chuan “ It also accept that economic growth at the expense of the environment is not what this state and this country need but rather a synergy between the two” a rawn ti a ni. Chumi kawng chuan

tunah hian kan department leh sorkar, NGO zawng zawng leh civil society te hian hemi awareness hi kan nei tawh a. A bak chu kan sawi ang khan dan tha deuh rawn lek chhuah a ni.

Tin, faina kawngah pawh hma kan sawn, chanchinbuah te, TV ah te kan lo hmu a, India ram khawpui fai thlan chhuah zingah Aizawl tih lo chhiar a lo ngaihthlak te kha hmasawwna tha a nih avangin ngaihthlak a nuam lutuk. Khatiang dinhmuna min thlen tirtu, mawhphurtute zawng zawng chungah pawh khan lawmthu sawi kan ba a ni.

Tukina zawhna ka rawn pekah khan kum tin a kan puan thin Faina Hapta kan tih te, kangmei laka invenna-te, heng a veng/district tithate hi citation leh lawmman pek piah lamah special development package pek dan a awm em tiin ka rawn zawt a. Ka rawn zawhna ki zawk chu helai tuna ka sawi ang kha a ni a bul thut chu. Kan ram hmasawwna tur, nakina kan tu leh kan fate tan boruak tha, boruak hrisel kan hip tlan theihna tura tuna kan sorkarin chak taka hma a rawn lak vang hi a ni. Chumiah chuan a ken tel special development package a tam thei ang ber ruahman ni thei se. Tunah phei chuan central sorkarin key sector paruk a rawn thlang chhuak a. Swachh Bharat Mission, NULMM, AMRUT, Housing for All, Smart City Mission tihte atanga sum lo lut tur atang hian cleanliness drive-ah a ni emaw, fire prevention drive-ah a ni emaw, incentive hi a thun luh theih a. Chuvangchuan, kan hotuten hei hi hre reingin, heti zawng hian hma min laksak theih chuan a lawmawm ngawt ang a.

Governor's speech-a a rawn sawi smart city din tura Department-in a rawn pho chhuah dante hi ngaihthlak a nuam a. Tun atanga hun reiloteah chuan Agartala leh Aizawl te pawh Trench 3 stage ah kan lut thei dawn niin a lang a. Hengte pawh hi kan sorkar hnathawktute, mawhphurtute bakah kan sorkar hotu liante hmachhawpna niin ka hria a, a lawmawm ka ti tazet a ni.

PHE in tuna a bik takin rural area lam a hma in lakna hi hmuh theihin a awm a, a lawmawm khawp mai. Khaw hrang hrangah kan han kal a, kan harsatna ber

chu inthiarna hi a ni thin a. Tunah chuan hemi scheme hnuaiah inthiarna mumal tak leh changkang tak kan nei tawh a. Hei hi lawmawm ka tih phah bawk a.

Tin, PWD in a enkawl PMGSY hi kan lo hriat danah a dik emaw, dik lo emaw kum 2019 ah wind up tawh tur niin central lam atangin kan lo hria a. Ama'rawhchu, kumin-ah central budget Finance Minister-in a present ah khan PMGSY fund kha tam tham tak a awm a. Kan hotute, kan Chief Minister zahawm takten thiam takin an zu chuh niin kan hria a. Thla hmasaah lawk khan Guwahati-ah an meeting a ni awm a. He scheme an wind up hma a chuh thiam tur hian ka'n ring bawk a. Chutiang tur pawh chuan he House kaltlang hian ka'n ngen a. A wind up hma hian a awm thei ang ang kan hotute chuh turin ka'n ngen bawk a ni.

Thil lawmawm deuh mai chu Minor Irrigation-ah nikum lamah kan ro a. Kuminah budget lamah thahnem tak dah niin kan lo hria a. Hei hi uluk deuhin a bial bial ni lo, a district pawh ni lo, mamawhna khua-ah tawh phawt chuan lut mawlh rawh se tih hi ka'n ngen duh a.

Tin, Agriculture-ah pawh kan lo hriat angin tunah zau zawk leh chak zawkin link drain te pawh siam ni dawnin kan hria a. Hengte pawh hi a lawmawm lutuk a. A lawmawm ka tih ruala ka'n sawi duh chu heng link drain hi tu tan nge kan tih chuan kan kuthnathawktute tan a ni. Ama'rawhchu, an kalkawng laihna kawngah hian kan hna pekte hian kan duh angin an lai lo thin erawh hi chu engti tak emaw hi chuan i monitor teh ang u. Tha deuhin sorkarin hna a siam a, chuti zat, feet chuti zat laih tur tiin; mahse, hmanhmawh takin rawn laih thin a ni a. A hnuaah a chhawr tur ten a tak takin kan chhawr theih lohna hi chu en uluk deuh a ngai a. A chhan chu kan tum bul ber chu kan kut hnathawktuten man man zawka, man tha zawka an thlai thar chhuahte an thiarna kawng a nih miau avangin hei hi chu min lo en sak se.

Sports chungchangah hian Pathian zarah he sorkar leh a Minister avangin hmasawna a tam tawh em em a, lo chawl ve rih rawh se an tihna angah ka ngaih rual rualin, report tur a tam lutuk a. Tunah hian Indian tournament sang ber pawh helaiah kan khel ve thei tawh a, khatiang kha a ni discipline hrang hrangah. Mahse, Saiha bialtu zahawm tak sawi ang deuh khan zau zawka a hmalak chu a ngaih ve deuh hmel tih kha ka'n sawi ni sela.

Transport-ah pakhat leh chiah ka sawi duh chu mega block kan ti a, kan ramah rel kawng lian a lo luh theih nan nasa takin kan sorkar pawhin hma kan la a. Mipuite hnenah pawh kan lo inzirtir lawk a, buhfai chungchang a ni emaw, engemaw kan harsatna tawhna turah. Thla hmasa hmasa lawk khan Agartala-ah rel lian a lut. A mipuite lo dawnawn danah chuan a mipuite chuan economic boon ei leh bar kawnga hmasawna a ni tih an hriat avangin, Durga Puja function angin ropui deuhin an lo receive a ni. Kha rel lian lut khan kha state ah khan eng malsawmna nge a thlen dawn an hmu pha tlat. Keini pawh nimin min leh lawkah goods train a rawn lut a, a leh pek maiah passengers an lo lut dawn. Engnge mipuiin kan suk thlek, hei hian kan ram leh hnam tan hmasawna a rawn thlen dawn em, economic boon a ni em, malsawmna a ni em tih te pawh hi kan zir chian a ngai a ni. Hemi kawngah pawh hian mipui ho pawhin kan hriat a ngai a ni. Ka duhtawh phawt mai ang. Ka lawm e, Pu Speaker.

DEPUTY SPEAKER : Pu Lalruatkima.

Pu LALRUATKIMA : Pu Dy. Speaker, ka lawm e. Vawiin-ah kan Governor zahawm tak thusawi sawihona hun tha tak mai kan nei thei hi a lawmawm khawp mai a. A hmasa-in kan Governor-in a sawi ang khan Central YMA in National Civil Society Organization Award for best campaign on voters education and awareness President of India hnen atanga January Ni 25, 2016-a an dawn chungchang rawn sawilan a ni a, a lawmawm hle-in ka hria a. Kan ramah hian election wawi tam tak kan nei tawh a. Tlawmngai pawl tha tak mai YMA te leh pawl hrang hrang kan nei a. Police duty lo

pawhin anni ringawt pawh hi awm sela election tuang takin kan neih theih ka ring a, an hnathawh rah liau liau niin ka hria a. An chungah lawmthu ka'n sawi tel bawk a ni.

Tin, chutih rual chuanin, Village Council election khaw 30 chuangah inthlan theih lohin Advisory Board hnuai a la awm reng erawh hi chu Law & Order lamin tan an lak lehzual ngaiin ka hria a. Kan Governor zahawm tak thusawi hi Sorkar thu a ni a. Tun kar chu Pu Dy. Speaker, ram pum hi kan hlimin ka hria. Ration Card thuah Ni 1 thla 1 ah kan piang thup mai a, kan surprise a, mahni fanu te nen a chang leh kan inrual a. Food Security Act a lo chhuak a, ration card-ah nuihzatthlak angreng deuh deuhin mahni fanu te kha kan nuah te an lo chang vel a, khati vel kha a ni a. Chutah Governor thusawi arawn chhuak ve leh a, Governor thusawi rei ber mai ti mai ang, a rei em em mai a, darkar khat leh a chanve thu a sawi a. Ka'n han chhiar chiang a, tawng dik tawk lo te, statistics mumal lo te a ni a. Fiamthu bu han tih ngawt chu Pu Dy. Speaker, a mawi si lova, ama'rawhchu, kan uluk tawk lo a ni. Fimkhur tun hnuah chuan a tul khawp mai a. Chuvang chuan, khatiang khawp khan kan hlimpui a, kan nuihpui ham ham kha a tam khawp mai a. Tun hnuah chuan fimkhur a tul hlein ka hria a. State flagship programme pawh National Land Use Policy-ah min rawn thlak sak a. New kha National a thlak kha tu mawhpurh nge, Sorkar hi a ni dawn lawm ni tih kha ka'n sawilang duh a.

Tin, hei bakah hian NLUP fakna darkar khat dawn kan ngaitla a, Governor hnen atang khan. Chutah chuan NLUP line Department, Soil & Water Conservation Department hmalakna te, leh Department thenkhat hmalakna te a lang ve hauh ta si lova, tam tak a lan lai khan chutiang te chu a ni a. Han en vang vang ila, a bik takin Vety Department ah khan bawngnute ton 14327 thar chhuah a nih thu kha arawn sawi lang a. Mahse, nikum Vanglaini March ni 27, 2015 ah khan NLUP kan neih hnuah hian bawngnute thar chhuah hi 2013-2014 ah hian ton 15304 a ti daih tawh a ni. Chu ai chuan tuna kan thar hi a lo tlem leh reng mai a, hmasawna awm lo a back gear-ah kan awm a ni. Chu chu enge a awm zia, hma kan sawn lo tak tak nge a statistical mumal loh vang? Data mumal loh vang? Pu Deputy Speaker. Chutih

karah chuan kum 2008-2009 chhungin Bawngnute hi 16882 ton kan thar chhuak a ti leh lawi baw si a, NLUP awm hma khan bawngnute te hi kan lo thar teuh tawh mai a, NLUP awm hnu kum thum hnu velah pawh hei Governor thusawi atang pawh hian a lo tlahniam leh daih tawh mai a, chung ang te chu kan ni a. A hlimawm zawnga kan lak dawn chuan hlimawm tak a ni a. Chuta official pakhatin a sawi chu Pu Deputy Speaker, thawktute indaihlohna avangin a hmun field-ah an kal lova, dawhkanah rinthu in an duh zat zat an ziak mai thin a ni, a ti a, a serious khawp mai a. Chutiang ang te chu kan ni a.

Chumai a la nilova, helaiah hian WRC atangin buh thar te pawh a lo.. (DEPUTY SPEAKER : Ngawi rawh aw lawk, tuna i chhiar kha sorkar thuchhuak nge Chanchinbu news?) Chanchinbu atangin Pu Deputy Speaker, chanchinbu atangin a ni a, he chanchinbu hian an source chu official te a ni. Chuvang chuan, helaiah hian thil pakhat chu WRC atanga buh thar zat leh tlang ram lo neih atanga buh thar zat te hi Assembly question-ah pawh hian a inmil lova, an duh zat zat hi dawhkan atangte pawhin an ti ta mai niin a lang a. Kum 2014 ka Starred Question 26 November ni 13 ah ka zawhna leh Unstarred Question No. 31-na October ni 16. 2015 ami te hi han en kawp ila, an duh zat zat buh hi min thar tir niin a lang a ni.

Chuvang chuan nimin lawkah kan hotute an thukhawm a, data leh statistic mila hnathawh dan tur duan tum a ni a ti a. Data dik hi a pawimawh a ni. Statistic diklo kan neih avangin hmasawna hianin a tuar em em mai a ni. Chuvang chuanin kawng tinrengah tan kan lak takzet zet a tulin ka hria a. Chungte chu ka rawn sawi lang zawr zawr duh a ni.

Tin, kan Governor zahawm tak thusawiah hian ka bial chhung Vaivakawn Bazar sak that tur chungchang a rawn sawi a. Amaherawhchu, chu pawh chu DPR submit a nih thu a sawi a, DPR submit te kha chu House zahawm takah hian

Governor thusawi meuhah chuan a la hma deuh e tih theih a ni a, pawm loh theih a la ni baw a, khang em em kha chu a la tul lo em aw ka ti baw a ni.

Tin, Pu Deputy Speaker, (DEPUTY SPEAKER : Ngawi rawh lawk, Chair kan han inthlak lawk ang e,) Pu Speaker, a chhan chu kan in correct nasa a. Enge ni? Model Village pawh kha khaw pahnih chauh kha kan lo puang reng emawni le? MLA zahawm tak tak 40 Model Village kha khan kan puang kha a ni si a. Khangte pawh kha engatinge sawi a nih ve tak reng reng loh tih te pawh kha ka ngaihtuahnaah chuan a awm a ni.

Tin, chumi bakah chuan hei sawi tur tam tak awm zingah Public Sector Undertaking te kha thiah a ni a, thil lian tak a ni. Tuman kan sawi lova, kan Governor zahawm tak khan a rawn sawi chhuak baw si lova. Heng ang te chu kan achievement ang te pawhin a lang a, chuvang chuan heng angte pawh kha a rawn tih hmaih pheng phung mai a. Chuvang chuan kan budget speech a kan ngaihtlakah pawh khan kan Year of Consolidation te pawh kha puan a ni a, Year of Consolidation a hlawhtlin nana hmalakna pawh pakhatmah hmuh tur a awm lo a ni, sawilan pawh a hlawh zui lo a ni. Kan kum puan ve lem sawi hlawh lo ber pawl a ni mai awm mang e, tih te pawh ka ngaihtuahnaah chuan a awm a.

Amaherawhchu, Chiang taka rawn lang chu, MLPC Act a hlawhtlin thu leh Zu avanga Revenue kan hmuh tam thu kha a rawn tarlang a, chutah chuan vaibelchhe 12 leh nuai riat khan kan target kan achieve tawh thu kha lawm angreng tak khan a rawn sawi a ni. Amaherawhchu, hemi phena awm erawhchu, Revenue heta tanga kan hmuh hian eng angin nge chhungkua a tihbuai a, sum leh pai damdawi kan inenkawl na avang te a, kan mangan a kan insenso kha ngaihtuah tham fe a awm a ni. Chuvang chuan heti zat hi kan exceed tawh a nih si laiah chuan kan inngaihtuah a ngai khawp mai. Zu manah hian kan va inseng tam em, zu mana kan sen zawng zawng atangin 10% vel hi tax-ah lo ngai ta ila, hemi let engemawzat hi vai ram lamah

Zoram sum a luang thla dawn zu phur chhuah nan tih kha a lang a. Chuvang chuan hemi kawngah hian kan inzirtir a ngai khawpin ka hria a ni.

Tin, hemi bakah hian kan Governor thusawiah hian culvert 152 siam a ni han tih te hi chu thu ropui tak chu a ni lem lo a ni, he House zahawm taka han sawi ah hi chuan. Khang ang te kha engatinge an lo cut vek mai loh aw ka ti a. Tin, PMGSY atana propose tih te, state matching share han tih ang chi te kha kan hmu thluah thluah mai a, khang em em kha chu hengah hi chuan a tul tawh chuang lovin ka hria. Dah a nih phawt a, pek a nih bawk si loh kha chuan thil kha tih leh fe tur a awm a. Tin, sorkar hmasa a thil tih tam tak a awm tawh a, tun financial year a tih si loh e.g. Cultural Centre-Auditorium, Vaivakawn under NEC tih te hi tunah chuan an sa mek a, kum 2013-a lung phum daih tawh kha a ni nghe nghe a ni. Hei, kan member MLA zahawm tak Pu P.C.Zoram Sangliana lungphum hi a ni nghe nghe a, chuvang chuan khangte kha chu tarlan rih loh mai atan a tha ka ti a.

Tin, power hi kan sawi kan sawi a, vawiin thlenga kan thar chuah chu Mega watt 29.35 a la ni reng mai a, Tlawva Project te pawh kan han tlawh a Subject-II Committee-in 2016-2017 a zo turin an sawi a. (SPEAKER : Hun i hmang zo a ni lo maw?) La hmang zo lo deuh Pu Speaker, kan interrupt nasa a, Pu Speaker, lawk khawngaihini Deputy Speaker khan thilrawn sawifiahna te a neih avangin minute nga lek khawngaihini min lo pe, chutiang angte chu kan ni a. Chuvang chuan thil tul vak lo sawi te pawh hi a tam mai a, hei hi tun hnu ah chuan fimkhur phah nan hmang ila.

Tin, Recruitment Rules siamthat tih ang chi te, thil ropui vak lo ang chi te kha kan tarlang nasa a. Tin, chutih lai chuan Higher and Technical Department-in College 12 a neih thu, a enkawl thu kha arawn sawi a. Amaherawhchu, kan Governor thusawi Republic Day-a thusawiah hian College 21 arawn ti leh bawk si a, khawi hi nge figure dik zawk ni? Khatiang te kha kan ni a. Chuvang chuan kan inenlet a tul a,

MNF ministry building of Directorate Transport Department te phei chu, kan sakna a rei lutuk tawh, chutiange chu kan ni.

Tin, labour cess chungchangah te pawh khan statistic inmil lo, crore 28 collect a nih thu tarlan a ni. Amaherawhchu, Assembly session 6.10.2015 starred question-ah khan labour cess hmuh chu crore 29 a kai daih tawh a ni, khatiang ang te kha kan ni a. Kan Governor thusawi hi kan buatsaih uluk lo deuh niin ka hria a.

Tin, Aizawl Civil Hospital chungchang sawilan a ni a. Aizawl Hospital hi District Hospital-a leh a nih thu te pawh kha Office Order chhuah a ni daih tawh bawk a, khatiang te pawh kha kan ni neih nuaih mai a, a sawi tha viau awma kan han ngaih lai khan a sawhchiar thusawi lek lek mai a, chuvang chuan hetiang thil hi kan ngaihtuah ngun a ngai a.

A tawp bera ka'n sawi duh chu Pu Speaker, Krismas muanawm taka kan hman lai khan a muanawm rual rualin mitthi vuiin kan kal kual nasa a ni. A lungchhiat thlak khawp mai, a pawl pawh ka ti a, tam zawk chu a ni em lo ang a, Zu leh a kaihnawih avang kha a ni a. Police pawh 100 chuang an boral thu September ni 2, 2015-a Police hotute thuchhuak khan a tarlang a, chutiange chu kan dinhmun a ni a.

Drug control and trafficking chungchangah khan thawhhlaw em em tute chu Excise leh kan Police Force te ai mahin Central YMA SRS te an ni. Ni tinin heroin hawng thum hawng li hi an rawn man reng mai a ni. A chhan hi kan zawnchhuah a, kan tan tlan loh chuan kan thalaite hi pul hriin a man mai ang tih hi a hlauhawm a. Chuvang chuan, hengah te pawh hian sorkarah tan la turin an ngen thin a. Champhai chheh velah te pawh Excise and Narcotic te pawhin Check Gate te pawh siam thei ta se, a rawn kal thla engemaw zat te hi chu khilalaiah khian kan lo tihtawp theih te pawh a rinawm a. Chuvang chuan Krismas leh kum thar leh vawiin thlenga

muanawm leh hlim taka kan hman theihna bul pui ber chu kan Central YMA te leh kan tlawmngai pawl te hmalakna hi a lian hle a ni tih hi ka han sawi lang duh a.

Sawi tur tam tak a awm ang Pu Speaker, kan sawi vek seng lo ang a. Amaherawhchu, khang zawng zawngah khan kan state flagship han thlak te, data inmil lo lutuk te leh tul vak lo tam tak han telh te kha a awm si a, chuvang chuan he thil hi tun hnu ah chuan kan fimkhur a, keimahni kan inenlet nan he hun hi hmang ila a thain ka hria, chu chu ka'n sawi duh a ni e, ka lawm e.

SPEAKER : Aw Pu Zoram Sangliana

Pu P.C. ZORAM SANGLIANA : Pu Speaker, kan Governor zahawm takin kan session pariatna nimina min han address chungchangah member zahawm takin lawmthu sawina a rawn putluh hi ka'n support duh a. Chutih rual chuan hei House-a ka lo awm ve zauh zauh tawhna Pathian leh hotute zarah he Governor Address hi a rei ber dawttu a ni mai awm mang e, ka tel ve tawh ah ka ti a. State kan nih hlim khan session vawikhat chu Governor-in, i veilama kan thut hunlai a ni a, chulai chuan darkar 1 leh 45 minutes a sawi a. U.T. hunlaia thil tihthat hlir hi a sawi a ni mai a, a lawmawm ang reng viau a chu chuan. Vawiinah Governor in min han address leh a thil min han hrilh hian hmalakna chi hrang hrang, department pakhatat ringawt pawh sawi sen loh khawp sawi tur a lo awm a. Darkar 1 leh a chanveah hetia mita kan han hmuha kan han hriat, mimawl mit pawhin kan hmuh a hmasawmna he sorkarin a tih nasat em em te tarlan loh tam tak a awm a ni tih hi a hrechiangtute kan ni a.

A bik takin thalaite khawvel thar thlirna a kan sorkarin hma a lakna lai te phe chu hun dangah te sawi hnem a lo ni bawk nen tun tumah hian a rawn cheng na lo hle a. Chung ang ringawt te pawh chu district hmun hrang hrang leh he kan khawpui chhung ngeiah pawh kan han en a, kan han hmu a. District hrang hrang leh village hrang

hrang atanga kan football thiam te han inelna hmun thlir tur tam tak an awm ta te hi he sorkar hmalakna leh hmachhawp mek te ziah sen loh a nei a ni tih hi a langin ka hria a.

Chutih rual erawh chuan Pu Speaker, kan sawi tel ve duh chu department tinreng ten hetiang Governor thusawi tur lakkhawm a nih rual hian figure-ah te, thil kan hrilh nawn a ni em tih te hi chhui fo sela chu a that ka ring a. Helai tak hi a bik takin sawi tur ka ni em ka hre lo a, han sawi ta ila. Minister concern te theuh pawhin approve lovin hei hi a kal ka ring lo va. Khawngaih takin hetah hian tunhnu zelah chuan department-a zawhna kan pek, chhanna min rawn pek bakah kan Governor zahawm tak thusawi turah te chuan uluk takin enpui a pawimawh mang e aw tih hi vawiinah kan hmu a ni. Chumi kan hmuh rual chuan kan sawi tel duh chu, Nunna Bu pawh hi khawp kham lova mahni tawnga chi hrang hranga min an leh duh a ni a. Tah hian a kim lo, chuti khati ti reng rengin Mizoram ngei ngeiah pawh kan Kohhran te pawh in Nunna Bu ziah lehlin thenkhat chu hman loh tur ti te hial a sawirik awmna khawvelah kan la awm hrih a. Chuvang chuan famkim lo lai leh dik lo lai ringawt mai kan kher dawn a nih chuan kher tur hi a tam em em dawn a.

Chu ai zawk chuan vawiina min tilawm em emtu zawk chu kan ramah kan NGO, tlawngai pawl lian tak mai Governor thusawiah a rawn tarlang a. India rama NGO dangte tan pawh entawn tlak khawp NGO lian YMA kan nei a. Chumite chuan inthlanna uluk a pawimawh zia a an role play avanga President hnen atanga lawmman an dawn thu a rawn tarlan te hi sorkar khan thawhpui lo se engtin nge maw an tih theih ang le? Chuvang chuan a bul chu sorkar a ni tho a ni. Sorkarin hman tur a hria a, a ngaihna a hria a, tiang hian a hmang tangkai a ni tih a lang a.

Tin, kan flagship programme te pawh hi mi tam takin nuih zatin an han sawi thin takna a Pu Speaker, a that zia lo lanna chu kan Governor thusawiah hian a rawn lang a. Tilang chiangtu pakhat chu NLUP kalpui hmam buh hmun 39.04% laiin tunah chuan kan lo nei zau ta zawk a. Buh tharchhuah pawh 22.21% laiin a lo pung ta bawk a.

Tlangram buh hmun atana ram mamawh pawh 28562 hectares lain a zauh tawh thu te, chutiang te chu 8497.195 hectares laia a tlak hniam tawh thu te min han hrilh rual khan, chung chu programme leh policy dik lo ni ta se sawi tur Governor-in a nei dawn em ni? Chuvang chuan, he sorkarin a thil ctih mipuite hnena a rawn thlen hi lawmawm ka ti a. Chutih rualin pawisa thawhchhuah kan neih si loh chuan hmasawmna hna a kal thei lo a ni.

Tun tuma central sorkar budget Finance Minister in a pharh pawh kha ka theih ang tawk tawka lo en vein ka lo thlir ve a. Chungah pawh chuan a pharh ruala a inchhuanna ber kha Finance Minister khan mipuite hnena thleng tur a sawi a. Chumi thleng tur a sawi rual chuan chung atana sorkarin chhiah a lakkhawm te a sawitel a ni. Chutiang chiah chuan he sorkar pawh hian chhiah a lak that avangin vawiinah heng hmasawmna tam tak te hi lo thleng chho a ni tih kan hmu a. 2015-16, January 2016 thlenga Taxation Department-in thla 2 a la awm pawhin a target a khum hman hi a va han lawmawm em ka ti a ni. Chutiang chuan thil tam tak sawi tur a awm.

He hunah hian kan Governor hian chipchiar takin a rawn sawi kan tih rual hian hmaih tam tak a rawn nei a. A rawn tarlan, min rawn hriattir a duh, keini pawhin kan sawidarh zau zel atana itawm ka tih chu he sorkar hian a ngaihna hriain, a tih dan hriain a rawn ti ta a. Chumi avang chuan kan economic dinhmun te, kan GDP rate te a rawn san phah hi a lawmawm a ni. Chutih rual erawh chuan duh khawp lohna te chu kan nei mai thei e, chungte chu nakinah general discussion-ah emaw, demand wise-ah emaw sawina hun kan la nei turah ngai ta ila.

Heng a tlangpuia kan Governor-in min rawn hrilhah hian kei ka lawmna chu hmasawmna tam tak hmuh tur a awm a. A number te chu dik lo hlek hlek te chu a lo awm a ni thei e, chung zawng zawng ka va hmuh kanna chu hmasawmna he sorkar hi a kal a, mipuite hnena a thu tiam, 'kan ti ang,' ti thin leader kaihhruaina hnuai a awm kan nih vang a ni e. Mipuite hnena in zawrh ang ngei hian, mipuite hnena a tih hi a ti thin a ni

tih hi kan Governor hian min rawn hriattir a, chu chu ka lawmna a ni. Tlak lamah kan kal dawn ti a chhuah lama kal nen chuan a inang lo tlat a ni. Silchar-a kal tura Lunglei bus ticket lak ang kha a ni lo a ni. Chu chu nimina kan Governor thusawi a bu a kan lo hmuh hian a rawn ti lang tlat.

Kan zin kawngah kan kal laiin han chawlh hlekin min thlen tlai tir thei. Thingpui in te, sehrep han lei kual te chuan, an tum ram chu an thleng tlai hret mai thei e. Amaherawhchu a kalna tur dik, a ticket dik lak hi a hlawk a. Vawiinah chuan National Land Use Policy tih a rawn sawi pawh hi a sawi sual emaw ni le ka ti a ni. He programme hi, he policy hi India ram chhung mai ni lovin thlam ram atanga biak thin UNO in a hriatpui programme a ni tawh alawm le. Khawvel tan pawh a zir tlak kan nei a nih hi. Tihsual palh kan nei ang tih hlauin min rawn vilpuitute lah ni se Delhi tlang mai a ni tawh lo, UNO kan han ti a, hming lam rual pawha kum 50 kal ta a lung tileng khan a takin kan khawpui zawlah hian bu min rawn khuar sak tawh. Chumi ten an tih tur chu he sorkarin miretheite chhanchhuahna tura a programme siam hi enkawlpui tlak, a aia changtlung zawkin kan rawn enpui ang che u min rawn ti te hi a va han lawmawm. Nawrhna leh lungawi lohna ringawt aia hmasawna lampang thlirna hian he kan ramah hian hmasawna tha min thlen zel dawn niin ka hria a. Vawiina kan Governor zahawm takin heta membrete min rawn hriattir hi lawmthu sawi tlak a ni ti a Aizawl South I bialtu MLA zahawm takin a rawn putluh hi ka thlawp a.

A para tin hian sawi tur chu awm mahse darkar 1 leh a chanve-a kan Governor-in a sawi kimchang a han fak pah zel bawk a sawi tur chuan ka pu, minute 10 hun chuan a daih lo a ni. Chuvang chuan rilru a kan han vei lai leh khalai te mai a kha duh tawk pawh ka duh a. Heta tana pawimawh ka tih chu kan Governor-in min rawn hriattir ang hian thlamuanna hnuaiyah mi rama inthlannaah te an thih nasat thin tehlul nen, muanawm taka inthlanna kan han nei thin chungchang a rawn sawi lang te hi a va lawmawm tehlul, kan ram ze dik, kan Mizo zia mawi tak mai hi tarlanin a awm tel a. A

ziak diak diak chuan ziah lan vek sen a ni lo thei a. Heng angte hi thil lawmawm a ni tih hi ka'n sawi tel duh a. Kan Motion neitu hi ka rawn thlawp a ni e. Ka lawm e.

SPEAKER : Pu Vanlalzawma.

Pu VANLALZAWMA : Pu Speaker, ka lawm e. Dar li a hnai deuh a, ka din vat loh chuan House Leader kha i ko ang a, mover kha i ko leh dawn niin ka hria a, chuvangchuan, ka'n ding vat ang a. A hminga helama opposition lama a leader angreng deuha ka'n sawi hmasak leh lawk duh chu nichinah pawh i'n sawi zawk kha, hei TV camera dahna thar te kan lo nei a, a tha khawpin ka hria a, kan thlalakte pawh Mizoram mipuiin min thlirah hian fiah leh zualin min hmu thei ang tih ka'n ring a. Chutih mek lai chuan, helama dah ang hi helamah pawh hian dah ve ta se chuan a va rual tlang awm mang e aw tih kha ka'n rawt pah deuh bawk ni sela.

Tichuan, vawiinah kan session-ah a tan nan kan Governor zahawm tak thusawi kan han sawiho a ni a. A sawi tur ka ni em ka hre chiah lo nang a, a chang chuan tlema rilru lo hah deuhna hi ka nei thin a. A inhniai pawtawk ang deuh hian kan bei lek lek em aw ka ti a. Helai zia ang ang hi thil fel tawk lote pawh a awm thei a, tuna kan han sawi mekte pawh, National Land Use Policy tihte hi chu tihsual palh liau liau a nih hi ka'n ring deuh a. A tum pawh a nih ka ring chiah bik lova. Khami han tan kawih tak vel lai tak te kha chu a pawtawk deuh em aw te chu ka'n ti deuh mai mai a, sawi tur ka nih leh nih loh pawh ka hre chiah lova. An hriatsual palh liau liau a nih ka ring. Thil hi tihsual palh a awm a, ka'n sawi lawk duh chu ka hming te pawh hi hresual hi an tam thei khawp a, Lalzawmliana min ti pawl te pawh hi an awm a. Mahse, ka'n ngaihtuah chian hian, 'an hresual a ni, hriatsual an duh lo, mahse an hresual a ni mai, huat viau turah pawh ka ngai lo e,' ka ti a. Chutiang deuh hlek chuan eng emaw sual hlek lo awm kha tihsual palh hi a awm ve hrim hrim a, mihring kan nihna laiah hian. Khalai a kan han tang vak lai erawh kha chu a ni chiah dawn emaw ni aw, he ram tana kan tih zelnaah hian tih te ngaihtuahnaah chuan a awm a.

Tin, kan chhunchawlh lai khan kan thian pakhatin min fiam deuh zawk a, ‘Opposition ho hi in pawr lo lutuk a ni, official ho pawh an awm ngai reng reng loh hi an thuthmunah,’ a ti a. Mahse, ‘ngawi rawh, chutilam chu a ni lo lo maw, kan sorkar hi an ngai pawimawh tawh lo a ni deuh lo maw,’ tiin ka’n chhang ve mai bawh a. Chulai te chu vawiinah hian ka’n sawi kai leh zuai duh a, a chhan chu hei, kan Minister-te, kan House Leader hovin uluk deuhvin kan thusawi zawng zawng min ngaihthlaksak a Opposition lam te pawh, a lawmawm ka tih laiin, kan thusawite a tul anga lo bawhzui a, a tak taka lo ti tur an awm lo hi a khawharthlak thin deuh hian ka hria a. Budget kan discussion-ah Department bik kan sawi te hi chuan a changtu lam Minister-ten an kuah khawm tha deuh nge ni an rawn awm tha viau a. Amaherawhchu, general discussion, Governor thusawi kan han sawi te, tin, nakin lawkah general discussion Budget pawh kan nei dawn a, chungah te chuan (SPEAKER : Sawi lai khan awm vek se, office lamah thawk tur awm ta lo se tih te pawh ngaihtuah a ngai a.) Chulai tak chu ka’n sawi leh duh lai a awm a ni. Tunhnaiah chuan ka hre tawh lo, tunhma deuh chuan ka’n hriat chian ve deuh lai chu office-ah va kal ila, an hotu pawimawh tak te khawnge tiin, ‘Session a ni a, session lamah a kal,’ an ti leh si a. Helamah kan hmu leh chuang bawh si lova. Chu chu a awm tlat a ni. Chuvangchuan, ka’n han phut deuhna lai te pawh a awm a.

Kan Minister-te chuan min ngaihthlak sak a, chutih mek lai chuan anni chu mi buai an ni a, bial leh rampum huap aiawh te leh party hotuten an hual tuau tuau reng lo thei lova. A hminga opposition lam tan chuan va inrawlh ve sek te pawh a nuam lova, chungah chuan official te khan kan thusawite lo ngaithlain lo hre ve ni se a hnua bawhzui leh te pawh hi a nuam deuh a ni. Chungte chu a ni vawiinah hian ka’n phut deuh pakhat chu. Amaherawhchu, chawhma lamah kan hotupa kan House Leader-in a sawi a, a zahawm angreng chuan ka hria a, thil pawh ka tiam tha ngam tawh lo, tih loh leh zel si chuan ti ang zawng te khan a han sawi a. Engemaw zawnga ngaihtuah chuan politician te, he House hrim hrim pawh hi kan zahawm lo em ni tih te pawh vawiinah hian ka ngaihtuahnaah a awm a.

Tin, kan thiante khan point pawimawh zawng zawng chu an sawi tawh a, sawi nawn leh vek a ngai lova. Amaherawhchu, hetia ka lo thlir ve thuak a, he kan Governor thusawiah hian tam tak hi chu sawi lem loh pawha pawl lo hi a awm a ni lawm ni aw, sawia hmasawna tur lam hawi miah lo, sawi lo ila a tha zawk lawm ni ka tihte pawh a awm ve deuh nual a.

Chutih mek lai chuan a then hi chu sawi ngei ngei awma ka ngaih lang lo hi a awm a ni. Nichinah ka hmaa mite pawhin an sawi tawh. Sports lama kan hmasawna te pawh hi a ropui em em, hengte pawh hi han tihlana record-a awm atan pawh a thain ka hria a. Tunlai pheih chu I-League te an ti a, mimal deuh te pawhin han sawi ila a pawiin ka ring lo Aizawl Football Club te pawh hi an contributin hi a ropuiin ka hria. Sorkar hmalakna te pawh a nih vek zel dan a awm a ni heng zawng zawngah hian. A chhan chu tunhmain team ropui deuh deuh te pawh Aizawlah an lo kal thin, an inkhel kan hmu tawh thin. Kan hmuh tam ber chu friendly match khel an ni. Mahse, tuna I-League a lo kal ho zawng zawng hi chu Aizawlah hian point thum hmuh tuma tang taka rawn inkhel vek an ni. Russian team a ni emaw, German team a ni emaw an lo kal dan ang a ni lo. India rama kan football thiamho tuntum an lo kal hi point thum kan hmu thei hram angem tiin theihtawp chhuahin an rawn khel a ni. Hengte hi a ropui em em a, ram tan pawh a chhuanawm a ni tih te pawh hi han sawilan ka duh a. Governor thusawiah lang chiah lo mah sela. Tin, sports lama kan hmasawna hrim hrim pawh tam tak sawi tur a awm, chungte chu kan tilang lova.

Tin, nichinah kan hotuten an sawi zawk tawh a Lai Autonomous District Council inthlan chungchang helaia kan mention lo ringawt mai pawh kha keipawh a dik lo chuan ka hria a. Bye-election kan sawi a, AMC election kan sawi a, Lai Autonomous District Council inthlan chungchang kan sawilang lo mai te pawh kha tihsual palhah te pawh han ngaihsak leh ta tho ila, a la dik thovin ka ring a. Chutih mek lai chuan sawi lem loh tura tha te pawh nichina ka sawi ang khan kan sawilang a. Nikum kum tir lama

Republic Venga inthahna han point out leh kher te; tin, helaiah ambush kan tawh te sawilan kher a tul em ka hre lova, police thi te chawimawi zawngin kan sawi chiah mang bawk si lova tih te ka ngaihtuahnaah chuan a awm deuh bawk a.

Tin, zu zawrh chungchang kan sawi khawm tawh a, kan sawi chiah tawh a, zu dawr kan lo ngah em em tak zia te han tihlan te pawh hi, tuten emaw RTI hmangin an lo va zawt a, loh theih lohva sawi te chu ni se la thudang a nia. Tunah hian hei helaiah kan Governor zahawm tak thusawia a lan danah hian zu dawr hi 55 lai mai Mizoram pumpuiah kan lo nei der tawh mai a, ka rin aiin a lo tam tawh a. Chutih laiin, nichina kan ngaihthlak tawh ang khan zu atanga kan chhiah hmuhte pawh hi kan target kan khum a, lawm tur nge lawm loh tur tih hi ngaihtuah tham a awmin ka hria a. Target hi pha lo ila a thain ka hria a duhthusamah chuan, zu atanga chhiah kher kherah hi chuan. Amaherawhchu, nuai 1200 dawrh maiin kan target kan khum a. Hei hi lawm chi emaw ni aw ka ti a, kohhran rilru atanga han ngaihtuah pheih chuan point out loh chi tura ka lo ngaih zawk mah a ni a. Hengte hi chiang deuhin a rawn tilang a, lang lo mah sela a pawh lo mang e. A chhan chu Assembly record-a awm reng tur leh awm kumkhua tura han lang hi kei ka tim deuh a. Mahse, a lo tilang tawh a nih chuan keini lo paih ngawt theih pawh chu a ni chuang lova.

Tin, kan thusawi hrim hrim hi ka hriatsual loh chuan Cabinet te hian en a approve tur emaw ka lo ti deuh a. Governor thusawi tur te, Republic Day-a a thusawi tur te, House-a a thusawi tur te hi. Chanchinbua kan hmuh thinah hi chuan President-in Joint Session a Parliament a address dawnah a thusawi tur te hi chumi khami ni ah chuan Cabinet-in a pawm tih te hi a lang thin a. Mahse, tilaiah hian kan ti ngai vak lo niin ka hria a. Kan senior Pu Sangthuama ka'n zawt a, 'Cabinet-in a pawm hi in ti ngai lo em ni? Chutiang thusawi tur pawimawh hi,' ka ti a. 'Kan tih pawh ka hre vak lo,' a ti a. Tin, niminah kan Minister pakhat pawhin, 'kan pawm lo, chutiangin kan ngaihtuah lo,' a ti a.

Engpawhnise, helaia Governor meuhin a sawi tur te hi chu uluk deuha Cabinet-in a remtih chin kha sawi tur ni awm takin ka ngai deuh a, kan kalpui thin dan hi ka hre lova. A chhan chu Governor kha chu hre viau tur pawh a ni lova, heng zawng zawng hi kan Governor hi chuan hre viau tur pawh a ni lo. Amaherawhchu, kan sorkar-in a feed a, sawi tur a tih ang lo sawi mai tur kha a nih dan a awm a, kan ram democracy kalphungah hian. Chuvangin, enlawk a, tin, helai Department te pawh a lang lo tih te pawh kha Cabinet- in en ni ta se chuan Department lang lo deuh, kan Minister-te chuan anrawn point out ngeiin ka ring a. Tin, helai chu sawi pawh a tul ka ti love a, kan Department hnathawh a ni tho nachungin tih te pawh kha thil awm ve thei tho a ni. Chung zawng zawngah chuan general deuh takin Pu Speaker ka'n sawi ve a. Sawina hun tha tak min pek avangin ka lawm e.

SPEAKER : Aw le, tunah chuan kan House Leader sawihona khaikhawm turin ti mai ang, a hmawrbawkna siam turin kan sawm ang a. Amah kan sawm hmam nichina Saiha bialtu MLA zahawm takin Mara Autonomous District Council thla hnih hlawh an la theilo tih lai kha, an lo la thei a ni. January thla hlawh an la tawh a, February pawh hi hmun thuma thena hmun hnih ($\frac{2}{3}$) kan inpe tawh an ti a, khalai te kha House-in thudik a hriat kha a thain ka hria a, chu chu ka'n sawi lawk a ni e. Bialtu thahnemngaihna pawh kha min lo hriatsak sela a tha ang e.

Tunah chuan Leader of the House, Pu Lal Thanhawla thusawi turin i sawm tawh ang.

Pu LAL THANHAWLA, CHIEF MINISTER : Pu Speaker, kan Governor address kha a thui hle mai a. Wording te pawh kha a lo uluk lova, thenkhatah chuan thiamlo leh puhmawh tur a awm a nih chuan keimah hi ka ni mai a, a hminga leader nihnain. Amah pawh khan thla kan lak zawh khan, "Governor address sei ber a ni mai awm mang e, a rei hle mai, darkar khat leh a chanve zet a ni a' ka ti a. "Ka patience in test a nih hi ka ti mai a sin" a ti a. Engpawhnise, chipchiar viau hian a bik takin

Opposition lama kan hotute tan hian a tha zawk daih nghe nghe a. Sawi tur a tam a, hriat tur a tam a, chin pawr tur pawh a tam phah a, chuvangin, kan eptu lampang hotute kan Governor hian a va duhsak em ka'n ti deuh zawk mah mah a.

Tin, 'Sports lampang a va sawi lo ve' tih hi, ni e, chhan tur tam tak a awm a, mahse, ka rin danin Governor ngaihdan hi Sports lamah hi chuan thalaite tan khawvel thar kan siam ang an tih ah hian, 'he sorkar hi an titha em mai a, India ram pumpui piahlamah an lo hre tawh a ,sawi sawi a ngai lo, hun a la mai mai e,' a ti a ni mai awm mang e aw ka ti deuh a. Sawi loh pawhin Opposition Leader meuh pawhin a rawn sawi chhuak teuh mai a. Khatiang khan Governor khan a sawi chhuak thiam dawn reng reng lova. Point 3 inchu in helaiah India ram football team tha ber berte an rawn ri lauh lauh tawh a ni tih te kha ropui tak a ni. Kan Governor khan sawi se khatiang khan a sawi chhuak thiamin ka ring miah lo. Chuvangin, a sawi chhuak lo kha sorkar tan hian a tha phian zawk mai awm mang e tih te ka ngaihtuah a.

Tin, keipawhin sawi ila helaiah Rajiv Gandhi Stadium tha tak, phullem phah helaiah lammual te kan nei tawh a, heng hi achievement ropui tak a ni emaw kan ti liam mai mai ang a. Tuna Opposition Leader rawn sawi kha a bengvar thlak hlein ka hria a, kha khan Sports lampang thil zawng zawng pawh kha a khuh vek a ni.

Tin, tunah hian India ram football-ah hian team tha hming han lang thamah reng reng hi chuan Mizo tlangval awm lohna hi a awm tawh lova. Hmanni chanchinbu pakhatah pawh football players manufacturing academy, Mizoram tih ang vel khan an rawn ziak a ni. A saptawng kha a diklo mai thei a, mahse, 'Football player tha tak tak chherchhuahna ram a ni e' an rawn ti hial tawh a. Chuvangin, kan Governor hian chhuang takin a sawi lo a ni ang e. Engpawhnisela, 'a hretute awmkhawm kan ni a, hrih hrih pawh an ngai hleinem,' a ti pawh a ni mai thei a. A dang a rawn sawi hi chu kan hriat mang loh, eng eng emaw, chulaiah chuan revenue chuti zat chu an la a tih a rawn

sawi te kha a bengvarthlak viau a. Governor's address a a awm ngai leh ngai loh chu ka lo ngaihtuah lova.

Engpawhnise, a lawmawm a. Helam atanga thusawitute pawhin chhuanchhe zawng leh engemaw zawng nilovin a duhthawh zawngin kan sawi hlawm te hi Pu Speaker, thil lawmawm tak a ni a. An hnenah lawmthu ka sawi a. Engemaw inkher mualpho tumna emaw, a chhuanchhe zawng emaw a insawina a awm lova. Tin, tawngkam kan lo hmang parliamentary lo hret a nih pawhin duhthawhna avang a ni tih a lang chiang a, a speech a kha kan duhthawh a ni tih a lang chiang a, chuvangin khalai kha chu kan inhrethiam tlang turah ka'n ngai a.

Tin, kan Dy.Speaker khan a sawi tawh a, sawi nawn leh ka duh chu ka bial ka bial tih hi a nazawngah chuan ti lo ila tih kha, ka bial tih kha thianga lo vah ngaih tur a ni miah lo a, thenkhat khan an rawn sawi chhuak a, ka bial tih thianga lo a ni lo. Amaherawhchu, ram pumpui atana thlan kan nih avangin bial hi chu for convenience of collection kha a ni mai a, kan main concern hi chu ram pumpui hi a ni tur a ni a. Chuvangin, mi zawng zawng hriata ka bial atan chauha ngaihtuahna hmang anga min ngaih loh nan tihna mai a ni a. Entirnan, Thenzawl chu a hmingin ka bial a ni ve a, mahse 'ka bial Thenzawl-ah hian' ka ti zen zen lo va, 'ka bial Serchhip' ka ti zen zen lova, a hminga MLA ka nih ve tan tirh atangin. Thenzawl-ah chuan tualchhung kawng step te a tha lova, sawng saw sawrkarin min ngaihtuahsak sela tih emaw, chutianga vel zawng chuan ka sawi thin a. Amaherawhchu, ka bial tih kha a rem loh na pakhat mah a awm lo a, mahse ram pumpui tana hotu atan, hruaitu atan a thlan kan nihna entirnan bial pakhat te ah chauh in concentrate lo ila tih na mai a ni, chu chu ka sawi nawn leh duh a ni. Misunderstanding, hriatthiam loh palh te a awm theih takin.

Kan Vety College te leh Horticulture College kan neih tur hi Central Agricultural University, Imphal, Manipur hnuai a awm a ni a. Mahse khami avang

khan Meitei ho an duhsak bikin an pawng lak bik thei lo a ni. Scheduled Caste tana reservation tih te hi chu India Constitution-ah a awm a, Resource person reserved for Scheduled Caste/Resource person reserved for Scheduled Tribe tih te kha a awm ve thin a. Khami hnuaiah khan Scheduled Caste reservation kha chu Central University kan neih MZU ah pawh khuan a awm deuh reng a ni. Hei hi kan Gurkhali unaute pawhin chhuanlamah an neih ve pakhat a ni a. ‘OBC ah te min puang ula, OBC quota te a awm ziah a, mahse vai dang ten an rawn luahlan zel a, keini min telh loh avangin; hemi quota-ah kan lut thei si lova, Scheduled Caste-ah kan lut bawk si lova, Scheduled Tribe-ah kan lut bawk si lova,’ an tih hi dik ve tak a ni. Chuvangin keimahni ramah OBC claim tur an awm loh avang khan quota kha pawn lama miin an rawn hnawhkhat zung zung a ni, central establishment tam takah hian hei hi hria ila.

Tin, Vety College te leh Horticulture College te pawh hi an hotu lu ber ber te nen pawh teaching faculty-ah hian Mizo tling an awm a nih chuan preference shall be given to local candidates tih tur a ni a, ‘in ziak lang Chiang lo a ni hi, hei hi in ti tur a ni,’ kan ti a. A mawi tham tak chu an awm ve a ni Vety College ah te pawh khian.

Tin, IVth Grade leh qualification ngai vak lo phei hi chu tualchhung ami in la tur a ni kan ti a. Tualchhung mi an tam viau ka ring, 100% a nih em loh pawhin a percentage a sang viau ang ka ring. Tin, an lo ti lo a nih chuan hria kan awm a nih chuan englaipawha chhuahchhal a vau theih an ni. Chutiang chu a ni a, chuvangin Horticulture College lo awm turah pawh hian chutiang zawn chuan a tir atangin kan hotute an fimkhurin an sawi thin a. Tin, chumai a ni lova, entirnan, hei oil emaw, natural gas emaw te pawh neih kan tum ve a, hemi hunah hian pawn lam mi hlirin a hna awm chhun pawh, a awm pangngai ten an rawn chan lohna turin tun atang hian kan hotuten kha lampang a specialization tul te a nih chuan quota te ngaihtuahin an phe ve reng a ni tih he

House zahawm tak hi ka'n hrilh ve duh a ni. Chuvangin Central Agricultural University hnuai awm kan nih avangin leh heng kan Vety College te pawh chumi hnuai ami chu a nih avangin keimahni duh thal chuan a kal theih lova, mahse chuti chungin maximum preference min pe tur a ni kan ti a, min pe mek niin kan hria a, chu chu ka'n sawifiah duh a.

Tin, forest cover tih kha nia, forest cover kan tih kha a greenery zawng hi chuan India ramah a tha ber zing ami kan ni a 91.47% kan ni a greenery-ah chuan. Amaherawhchu, dense forest an tih ah hi chuan 65% chauh kan ni, kan chhe tawh khawp mai. Hei ramngaw chhura pual kan tih chi ang vel awmna hi chu 6.65% chauh a ni a, a greenery zawngah chuan kan tha a. Tin, a greenery-ah hian tuikunluk, coconut te, kuhva te heng ang zawng zawng hi an chhiar tel vek a ni.

Tin, Forest Survey of India-in kum 2 danah satellite mapping an rawn ti thin a, chumi atanga record chu a ni. Tin, hetih rual hian hei aia kan neih that zawk theihna turin ram kang lakah hian kan fimkhur a tha a. Tunah hian ber nihna lawmawm vak lo pathum kan nei a ni. Ringtu 100 a 100 inchhal ngam, Pathian Hnam thlana inchhal ngam hi vaihlo, zuk leh hmuam hmanah hian India ramah a ber kan kai a, hmeichhiaah pheih chuan a ber sang tak kan ni a. Chuvangin hei hi thil chhuanawm loh tak a ni a, tunlai khawvelin a condemn tawh si a, hei hi kan ngaihtuah ngun hle a ngai a.

Tin, cancer tamna ber ram kan ni, population ratio atanga chhiarin. Hei hi thil chhuanawm loh tak te zing ami a nih ka ring a.

Tin, India ramah chuan ram kang nasa ber, kum tina thala ram tikang nasa ber zing ami kan ni bawh a ni. Tin, HIV positive tamna ram state 3 zinga pakhat kan ni a. Kan ber nihna te hi han ngaihtuah ila keini helaia a

hminga ram hruaitua thlan MLA te hian keimahni bial theuhah pawh hei hi kan beih nasat a ngai a.

Tin, nichina kan thu khel chungchangah te leh faina chungchangah lawmthu kan sawi nak nak a, a dik a. Amaherawhchu a taksa lamah hi chuan a fai lo ber pawl kan ni angem aw ka ti. Kuhva eisen hemhuam, ka bal tak, ha pawh hmuh tlak mang loh hi kan tam hle a ni. Tin, chu chu a pawl chauh pawh ni lovin khawlaiah hian han kal ula kan thirhruai ban te hi chu chinaiin a khat vek mai a ni Khasi ram vanglai kha kan pel tawhin ka hria a. Chuvangin, heng kawngah te pawh hian kan fimkhur a tha a. Chinai hi cancer siamtute zing ami pakhat niin an ngai a, chinai a siam heng tile bang kan tihah te hian asphalt 70.20% a awm a. Tichuan, ram changkangah, America ram changkangah te chuan tunhma kum sawmli kal ta daih tawh khan an lo banned tawh a ni, chutiang chu a ni a, chuvangin hei hi kan hriat a tul a.

Tin, nimirah khan kan hotu thenkhatte nen company pawimawh takin organic state kan nih dan tur sawi hovin power point presentation te min rawn pe a. DDT hlauhawm zia kan sawi a, tunah hian Silchar atanga kan thlai lakluh tam ber Zikhlum kan tih te pawh hi DDT an hmang nasa khawp a, a ngeih baw si a, a thenah hi chuan an sawngbawl hma ringawt pawh hian a nam a ni an ti, thenkhat chuan. Mahse, kha kha engatinge kan doctor-te hian “DDT a hlauhawm lo” tih hi YMA thutthleng tin maiah hian an ziah tir theih le tih hi ka ngaihtuah a ni. A hlauhawm zia mai chu America ramah hian tunhma kum 40 emaw daih tawhah khan DDT te hi an banned daih tawh a ni. Thliarkar pakhatatah sava tui an la a, an han analysed a, chutah chuan DDT a lo awm a, kha kha chu a chhiat ngei ngei dawn a, tichuan a darh zau kha a hlauhawm avangin DDT-te hi an lo banned daih tawh a. Kan ramah chuan kan doctor-te ngei pawhin “DDT a hlauhawm lo” min la tih tir hi a pawl khawp a. Amaherawhchu, thosi kah nan a tha a nih chuan ei leh in leh khatiang lampang khawih miah lova tih tur, thosi

thahna tur dang kan neilo a nih chuan. Keini ang mithiamlo tan chuan sawi tur a awm lova, mahse DDT hi a hlauhawm a ni. Tin, hmun tam takah chuan organic tih certified ngam a nih loh chuan anhnah, thlai dawng tha tak, him pal mai hi an lei ngam manglo a ni an ti a, chutiang khawp chuan DDT hi hlauh nachang hria an awm a ni. Kha kha kan lo hriat ve atan a tha a.

Tin, nichina ka sawi tawh ang khan ram kang lakah hian a ber kan nihna a nih avangin kan fimkhur hle a tul a. Kan ram hi ramdang Pathianin min pe dawn tawh lova, chhaklamah te, thlanglamah te min la zauh erawh chuan kan ram neih chinah, chu chu thudang ni sela, kan duat tur a ni a. Hei tunah khua a thal leh tan tawh a, niminah thuawih takin Zoram pum dung leh vang deuhthawah lo an hal a, hemi hnu ah hian ven tur tam tak kan nei a. Tin, hetia kan ti chung pawhin tun tumah pawh hian a kang leh fe tawh a ni. Tin, a hminga bial neitu theuh kan nihna anga kan ven a kan hriat tur chu, kumtin Green Mizoram kan ti a tha leh zung kan seng a, holiday ang hrimin kan hmang a, thing tiak tam tak a nuai tel kan phun a, amaherawhchu a nun theihna turin preservation-ah hian tha kan thawh tehchiam lova.

Tin, kawngdungah te khualzin leh kea kalte tan chawlh hahdamna tur atan ornamental trees te kan phun ve a, a lo nung hluah hluah a, hmun tam takah chuan Lamkhuang te a rah tawh a. Mahsela, kan thuawih lohna avangin kawng kam reserved hi 10mt. a ni a, mahse tu te mahin chu chu kan awih duh lova, kawng thlengin lo kan vat a, huan kan vat a, leipui kan vat a, kan han hal leh a. Kum tam tak lo nung tawh, thlansa phul kaia sum senga kan phun hi kan hal hlum leh teuh mai a ni. Chuvangin, nichinah kan hotu thenkhatin hengte hi a hremna ngaihtuah tur a ni, na taka hrem tur a ni, an damchhunga ti leh thei tawh lo tura hrem tur a ni tih te pawh hi rawn sawichhuak awm se a awmin ka hria. Mi tam takin mahni thu pawha thahnemngaia sum leh pai hun senga an humhalh laiin khatiang kha a ni a.

Tin, member zahawm tak Col. Sangzuala pawh khan a ti a, thingtlanga han zin hian ramchhuak silai pu hmuh hi a hrehawm khawp mai tunlai boruakah chuan. Chumi rual chuan China siam air-gun telescopic lens nei hi an hmang a, sava hi a za tel an kap deuh reng a ni. Hei hi kan hotuten rem in tih chuan ban nghal a thain ka hria, ala ti lui te chu dan angin an hrem theih mai lawm ni tih te pawh hi ka ngaihtuah a. Mahse, kan remtih tlanna a ngaiin ka ring a. Chutiang chuan kan inhumhalh a ngai a.

Tin, ram kang chungchangah pawh mahni bial theuhah theihpatawpa fimkhur tura kan in chah a tul takzet a ni. Chuti a nih loh chuan kan forest cover area kha a zim tawh em kha, khami rual khan chungleng savate leh ramsate kan um tiau zo dawn tihna a ni bawk si a, kha kha sim tlang ila a thain ka ring.

Tin, mau hi kan MNF President tuipui angin member zahawm tak Pu Beichhua khan a rawn sawi a, a lawmawm khawp mai keini pawh kan tui ve tan tawh a. Amaherawhchu, MNF President tuipui dan kha chu a mak deuh a ni, helai tlangdung a rawn kal pheihunah chuan hung thum in neih chuan millionaire in ni ang a, in hausa ang a. In tu leh fa ten sorkar hna an thawk duh miah lo mai ang an ti a. Mahse, engatinge thu kha an awih loh? Hung thum siam kha ka hre mang lo a ni ka ti. 'Hung thum in neih chuan in tu leh fa ten sorkar hna an melh duh miah lo ang,' a ti a ni.

Tin, sawtah hmarah District Council inthlan ah khan ka va campaign a, a ni leh a khaw hming pawh ka nei a, tunah hian ka hre ta mai lova. Chutah chuan, a thusawinaah chuan, 'khu tah Kerala luipui kamah mau chang nei lo, fit 50/60 vela sei hi a awm a, chung te chu kan lachhuak ang a, patling pahnihin pai khawt khawtin an pu thei tawka ni,' a ti e, an ti a. Dawt sawi ka hlauh avangin ka zawt chiang a, a sawi ni leh thla engkim kha an sawi thei a ni. Khatiang mau kha a awm ngai a nih chuan tuipui vek a

thain ka hria a. Mahse, kan hmu zo lo ang tih ka hlau, ft 60 vela sei chang nei lo, chutiang chu a ni a. Chuvangin, kan tuipui hi a dan dika tuipui a tha. Kum 2008-a kan lo kir leh khan bamboo forest hi a lo chhe tawh hle a ni. Mahal an pe a, a department concern ten an enkawl leh tawh si lova, an duh ang ang kha an sam a. A tuai te te lam nen khan an sam fai vek a, kan bamboo forest kha a chhe takngial dawn tiin kan hotuten mahal system leh khatiang reng reng a mau sawisak kha an khap ta tlat a ni. Tichuan, kan mithiamte kan zawt a, a regeneration period hi eng chen nge kan ti a, kum 4, kum 5-ah chuan a puitling leh vek thei an ti a. Tunah hian a puitling leh deuh vek tawh a, bamboo forest hi a tha leh tawh e, an ti a. Tichuan, Cachar-a paper mill pawh kan supply duh tawh lo a ni. Chutiang a nih avangin UPA sorkarah pawh khan kan supply loh chuan an ro char ta a. Minister tam takin an rawn phone thin a, 'aw kan hria', Cachar paper mill hi national asset a ni tih kan hria. A function thatna tur atan pawh mawh kan phur tlang tih pawh kan hria. Mahse, kan mau hi a rem takngial dawn. Chuvang chuan, a regeneration kan ti, bamboo forest siamthat leh kan tum a ni,' kan ti tlat a, tihngaihna an hre bik lo a ni.

Tichuan, tunah hian kan mau te hi forest a tha leh tawh tih India ram hian an hre hle mai a. Paper mill rawn din te pawh hi an duh sup sup a ni. Kolkatta-ah ringawt pawh khuan firm 2/3 an awm a, mahse kan hotuten paper mill chu a hlawk lo an ti a, an remti rih lo a ni. Chuvangin, tunah hian China technology hmangin Chinese firm te nena collaboration nei Bombay firm pakhat te nen tunah hian thawh ho dan kan hotuten an ngaihtuah mek a. Anni chuan, '50 thousand acres of bamboo forest kan mamawh,' an ti a. Amaherawhchu, 'hmun pakhat chuan kan pe thei lo ang che u a, hmun 2-ah emaw, hmun 3-ah emaw chuan 50 thousand acres of bamboo forest chu kan pe thei ang che u,' an ti a. Tichuan, anmahni pawhin an rawn survey tawh a. Tlabung lamah te pawh an va kal tawh a, an duh lai hmun pawh an thlang tawh niawm tak a ni a. Tunah hian memorandum of understanding sign mai tura inpuahchah mek a ni a. Eng angin nge a kal zel dawn erawh chu tunah mai hi chuan sawi a harsa a ni.

Chutiang chuan kan maute pawh hi tangkai thei ang ber, a hlawk thei ang bera hman tum a ni a. Chu mite chuan puan an siam ang a, kawr tha tak tak kan hak ang chi hi a tha ber chi an siam thei a. Lapaw tha tak tak te an siam thei a, sample te an rawn keng a, chutiang chuan tunah hian kalpui kan tum a. Chuvangin, mau tuipui theuh theuh a tuipui dan a inang lova, a hlawk leh hlawk loh dan pawh a inang lo a ni. Ama'rawhchu, mau a tui kha a tha lo e ka ti lo a, a tha zawnga tui hi a tha.

Nia, zu hi kan buaipui a, a mak ka ti khawp mai a. Kei, zu hi ka'n buaipui lo em em khawp a. Tunah hian a in hovin an buaipui a nih chuan a in lo phei chuan buaipui miah lo awm tak hi a ni a, mahse, kan buaipui sup sup mai te hi enge a chhan ni ang aw ka ti a. Zu hi chu MNF President boral ta khan 'thil a ni' a ti a. Thil pakhatah hian lo awm ve mai mai se, buaipui lo ila a tha mai tur a ni a.

Hei, Adventist unaute pawhin Deuteronomy, Bible-a Pathian thuin min tih ang in 'vawk hi a ke kak mahse, chaw a thial nawn lo va, ei thiang lo a ni, a thisen phei chu in khawih miah tur a ni lo,' a ti a. Mahse, chuti chungin a thithun duh hlir ringtute kan ni a. Bazarah an va kal a, lo inkhai diah duah mahse an buaipui miah lo. An kal pel a, an duhzawng sa dang kha an lei mai a ni. Chutiang chuan thil pakhatah hian ngai ve thei sela chuan a buaipui tu ho hian hnam ang chuan kan buaipui ka ring lova.

Tin, kan hotute rilrua khat ber chu khawvelah hian zu buaipui lo hnam an tam lutuk, engatinge buaipui hnam kan nih bik, buaipui lo hnam kan nih dan tur hi i ngaihtuah teh ang an ti a. Total prohibition kan kohhran te nen inthurualin ti mah sela, in mithiam committee engemaw zat kan Kohhranin a siam te chuan kan hlawhchham lailet der a ni, a kawng tha zawk dap a ngai tih hi an ngaihdan a ni, unanimous opinion a ni. Chutah chuan tha kan zawng mai a ni. Tuna tha lo a nih chuan kum17 kan hman tawh pawh kan titawp thei a nih chuan engah nge maw tun ami pawh a that loh chuan kan tihtawp theih loh ang le? A tha lo te a ni ngai a nih chuan. Chu zawk chu kan hmuh dan tur a ni a; chuvangin thil pakhatah ngai mai ila a thain ka hria.

Tin, chu lo ah chuan, kan Kohhranah te pawh kan biak inah chuan thurawn sawi chi hrang hrang an tam mai a. Sawitu tam ber chuan helaiah hian zu hi engatinge kan buaipui tan, luang huau huau mah se kei chuan ka in dawn miah lova, melh pawh ka melh peih lo, inbual nan pawh ka hmang dawn hek lo, a ti mai a, a tawp der a ni mai a. Chuvangin, hei hi indem nan hman chi pawh niin ka hre lova. Kan hotuten an han ngaihtuahna ber chu zu buaipui lo hnam nih i tum teh ang u, kan buaipui em mai tih hi a ni deuh ber mai a. Chuvangin, buaipui lo theuh ila kan buaipui lo a ni mai dawn lawm ni ka ti deuh a ni.

Tin, Power & Electricity hi induhthawh a na khawp mai, keini hlei hlei hian kan duhthawh a ni. Mahsela, 'khai u, i siam ang u,' tih a hnatlanga tih mai theih a ni lo va, tih mai theih chu ni se chuan kan hnianghnar tawh ngawt ang. Tun hma kan hun hmasa lam zawngah khan state thuneihna chu ka sawi fo tawh a, mega watt 5 hnuai lampang chin a ni. Mega Watt 5 a pelh chuan central-ah thawn thlak a ngai a, CEA in kum li kum nga an kawl a, chutah forest clearance, environment clearance tih ang chi clearance tam tak a ngai a, kha khan kum 10 tam tak a duh avangin a tih hleih theih loh a ni. Tin, lo sure pawh ni se, khawi atangin nge pawisa tih kha a ni. Chuvangin, tu sorkar mah hian Mega Watt zahnih zathum kha an siam nghal ut ut thei lo a, chumi zingah chuan keini pawh kan tel a ni. Kan neih len hmasak ber tur mega watt 60 lah chu tihchingpen in a awm a. A bul kan tan a, Japan sorkar in chutih lai chuan Overseas Economic development Co-operation fund an ti a, Japan hovin Pu C.L.Ruala Minister lain minrawn pawm sak a, sum pawh tanpuina min pe a, chuvangin Tuirial kha foundation stone phumin a hovin hna an tan nghal char char a ni.

Tin, Kumpinu hun lain, Lal lal hun thlengin ram ro nei chu chhungkaw 48 chiah an ni. Tichuan, midangrawn insiam chawp an awm lohna turin sorkarin notification a chhuah a, helai area-ah hian tumah ram emaw in

emaw pek loh tur a ni kan ti a. Chutih laia Revenue Director leh Settlement Officer ten chhungkaw 12 hnenah an lo pe leh a, kan suspend nghal a, prosecution proceedings na taka kan draw laiin kan tla ta a. Tichuan kan tlak hnu kum hnih khatah khan khulaiah khuan ram nghet nei chhungkaw sangkhat leh za chuang an lo awm leh ta a ni. Tichuan chung zingah chuan kan Chief Minister chhung khat laina te an tel avangin tihngaihna a awm lova, tichuan a khuahna tur zawng zawng NEEPCO in an hman double kha compensation leh thil dangah a kal a ngai a, tichuan an chhuah san ta a ni. Kum 2008-a kan lo kir leh khan kan hotuten theihpatawp chhuahin an nawr a, tichuan khuah tan leh a ni a. Tunah hian harsatna a awm loh chuan October kumin chhung hian an commission dawn a, chu chu a lian hmasa ber tur a la ni chauh dawn a ni. Chuvangin he thilah hian puhmawh tur kan zawng a nih chuan puhmawh tur chu chiang takin ka hrilh thei che u a ni.

Tin, tunah hian state thuneihna hi 50 mega watt-ah tihpun a ni ta a Prime Minister Devi Gowda hun atang khan, chumi avang chuan tunah pawh hian Tuirini Mega Watt 47 vel pe thei tur kha keimahni thuneihna (power) chhungah a awm a. Hemi thawh duh tuipui tur zawngin, kan ram chhunga power a awm phawt chuan, chungte nen insiamrem chhohna a awm zel a. Tin, a tira MoU ah pawh khang kha chu a khung theih tiin tunah hian Subhas Project te nen MoU signed in loan kan dil mek a, Ministry of Finance pawhin min recommend a, chu chu a hnuk tawina ber a ni.

Tin, Tuirial lungphum kan phum lai khan kan hotuten, 'ka pu, nakum tun ang hunah hian mega watt 210 pechhuak thei tur Tuivai pawh i phum leh thei ang,' min ti a, kan phur hle a. Mahse 1998 inthlanah ka awm tak loh avangin Tuivai pawh chu lipuia thlak ang vang vang a ni ta a. Kan hotute 2008-ah an lo kir leh a, an thar thawh leh a, tunah hian a tul tul thawk tan turin NEEPCO kutah kan sorkar hian a hlan a ni. Tichuan Aizawl-ah pisa rawn hawngin tiang hian

hma an la chho a ni. Mahse tunah hian clearance tur tam tak a la awm a ni. Kan lui tam ber hi company hrang hrangte nen MoU kan signed pui deuh fur tawh a ni.

Tin, MoU kan signed pui avang khan hna tan nghal mai theih a ni lo. Tin, power siamna tur atan hian hydro project siamna atan hian bawngtuthlawh an hmang tawh lo a, changkang zawk an hmang a ni. Han thawh tan theih hun tur kha chu clearance zawng zawng an neih vek hunah a ni ang a, chuvangin company te mawhphurhnaah kan dah a, a lo clear hunah khan engtinng e kan la thawh ho ang tih kha chu la ngaihtuah tur a ni. A kawng kan dap loh chuan a ngaiin kan ding reng ang tih kan hlauh avangin kan hotuten tiang khan remchang an siam a ni tih kha House zahawm tak hi ka hrih a ni.

Power and Electricity hi thil pawimawh tak a ni a, chuvangin a tel lovin engmah a tih theih lova tunlai khawvelah. Kawlchawah NTPC pek an ni a, tun thleng hian an la harsa a. A chhan chu, DPR kha kan hun hmasa a siam a ni a. Tunah chuan time over run, post over run te avangin revise leh a ngai tawh a, chumi chhung chu hun a duh a ni. Tichuan tunah hian clearance hrang hrang an zawng mek a ni. Power lamah hi chuan a tlan puat puat theih loh a ni tih hi hriat a tha a. Ama'rawhchu, tuna kan neih ang ang pawh hi tangkai leh changtlung zawka nih theihna turin a hrui thlun hrang hrang hi ngawrh takin beih mek a ni. Kan neih sa pawh tun aia changtlung zawk a kan neih theihna turin.

Tin, Mizo ram leilung fate kan nih anga kan hriat tur chu, Mizoramah transmission and distribution lost hi a sang ber te zing ami kan ni. Chumi awmzia chu, hetia pekchhuahna ah leh niin an ruk vel ah hian a riral tam, hei hi thil zahthlak tak a ni bawk. Christian zaa za ramah chuan power theft awm awm lo tak a ni a, mahse rawngbawltu un tak tak te pawhin vawk chaw chhum nan te an pawt ru thin tih te hi kan lo hriat dan a ni a. Chuvangin, sim tur te

kan sim chuan kan tha deuh dawn niawm tak zawk a ni. Kha kha kan ngaihtuah a ngai.

Hmanniah khan I & PR Department leh Central YMA ten khawtlang nun siamthat seminar an nei a, min sawm ve a. Chutah pawh chuan khawtlang nun kan siamthat dawn chuan keimahni lampang kan insiamthat hmasak hi a ngai mai awm mang e aw tih te kan ngaihtuah tlang a ni. Chutiang chu a ni a power lamah hian, thil harsa tak a ni. Amaherawhchu, thil pawh zawk deuh chu kan hun hmasaah khan lei hnuai hausakna Pathianin a dah sa dap turin kan zawng a. Tin, mal min sawm a duh a, ‘Tihnuam tak leh thuawih taka in awm chuan in rama thil tha te hi in hmu ang’ tih hi kan awih dawn a nih chuan thuawi tak leh tihnuam taka kan awm chuan a dah belh zel dawn a ni tih te pawh kan hria a. ONGC te pawh kan ko chhuak a, in hre vek ang a. Bilkhawthlir dai ah, Thingdawl dai ah, hetah Hunthar veng a lo kal chho tur, mahse kan tla ta a, kan tlak hnu reiloteah khan an bo ta a ni.

Tichuan, kan awmlah kum 10 chhung khan Tripura-in min lo tlan pel a, hetia bul kan tan lai hi chuan, tan nachang pawh an la hre ve lo a ni. Tunah khuan Palatana ah mega watt 750 pechhuak thei, thermal power gas base an nei daih tawh a, keimahni zawk hian mega watt 20 kan zuk lei a ngai ta a ni. Chuvangin, kum 10 kan awmlo kha he ram hian power lamah a tuar hle a ni. Chuvangin, inpuhmawhna tur lampang nilo vin, a thatna tur zawnga engtingge kan thawhtlan ang tih hi kan ngaihtuah dan tur niawm tak a ni a. Chu chu wawiinah hian han sawifiah tulin ka hria a.

Tin, Hospital te hi tihchangtlun a tul hle mai a. Engatinge kan lo tihchangtlun loh le, tunhma atang te khan? National Rural Health Mission-a pawisa a tam lai te thleng pawh khan tih te hi a ngaihtuah loh theih loh a.

Hmanniah khan engemaw thilah doctor hovin minrawn en a ngai a, an lo kal a, MRI chu sawi loh X-Ray ti tur mai pawh khan Trinity-ah min refer a ni. ‘Engatinge Civil Hospital-in in nei ve na nge,’ ka ti a, ‘neih chu kan nei a, mahse a fiah lo’ an ti a. ‘Engatinge Trinity-ah a fiah si’ ka han tih chuan, ‘Trinity ah chuan computerized a ni,’ min ti a, ‘Trinity-ah chuan computerized a ni a, a fiah zawk a, helaiah chuan kan computerize lo’ a ti a. Computerize nan hian nuai za engzatnge in mamawh ang le, ka ti a ni. Trinity-ah private-in an computerize theih chuan engatinge Civil Hospital sorkar ta an computerize theih loh le, tih hi zawhna lian tak niin ka hria a. Tun thlengin min la chhang lo. Chuvangin hetiang kawngah hian kan tan tlan, kan thawh tlan a ngai a ni.

Dik tak chuan, tawng mawilo a ni em ka hre lo, kan District Hospital zawng zawngte hi thihna tlaka ngaih theih tura chei hi a tha. Vawiinah chuan damlo enkawl theihna chu sawi loh, damlo enkawlna tlakah pawh an ngai lova. Aizawl-ah khawi khawiah emaw an refer zung zung a, hetiang hi a ni a. Chuvangin, heng kawngah te pawh hian sum tam zawk senga kan tihchangtlun a tha lawm ni? Kan lo kir leh hlim khan C.T. Scan pawh a lo awm lo, private-in MRI an neih theih tawh lai khan, chutiang chu a ni.

Chuvangin Pathianin min hunna theuh hi midangte malsawm nan min duh a, a rawngbawlna a nih avangin rilru leh tihtakzetin thawk turin min duh a. Mahse kuttlinglo a sum lakluh nan hman mai mai te hi kan ching dawn a nih chuan, kan thlen tur leh kan duh ang hi kan thleng lo ang tih hlauhawm tak a ni. Chutiang chuan vawiinah hian ngaihtuahna thar, sorkar hnathawk zawng zawng leh keini ho pawhin kan ngaihtuah a tul hle tih ka sawi nawn leh duh a ni.

Tin, Tourism-ah te, Eco-Tourism-ah te kan ramah hian pawnlam atanga lo zin tawh reng reng chu domestic tourist an ni emaw, foreign tourist an ni emaw, in ram a mawi si a, Eco-Tourism lamah te hian theihtawp chhuahin

industry tha tak a ni ang tih hi min advice dan a ni a, a chakawm hle a ni. Amaherawhchu, keimahni tualchhunga mite hian kan mind set te kan siamthat a ngai a. He House-ah ngei hian engtik kum nge ka hre lova, tourist te attract nan hian chutiang khatieng chuan ti ila ti a kan han sawihonaah chuan, chutih laia member pakhat chuan, 'E, tourist te kan sawmluh tamin kan nula ten hnamdang sawn an pai nasa ang asin', a ti daih mai a. Chuvangin kan mind set hi kan tihthat a kan siamthat loh chuan miin Tourism-ah te industry tha taka hmanga sum tak tak, ram ro hlute an lakluh lai hian keini hian kan ti ve thei lovang tih kan hlau hle a.

Tin, chulo lehah chuan, kan Department thahnemngaite hian a ngai ngai a a nih ang hi an tihmelhem zung zung mai a. Hei hi inkhap a ngai a, inkhap turin a concerned department te pawh koh khawm a tul a, kan inkoh khawm dawn a. Thasiama se no neihna khi tunah chuan step tha tak railing nen a kal ruah mai a ni, kha kha an rawn hmu duh lo. An ramah step tha deuh, railing tha deuh chu an ngah lutuk, anni chuan Thasiama se no neihna, Pi/Pu hun a hmingthang tak kha, a nih ang ang khan an rawn hmu duh a ni. Pu Speaker, chuvangin heng kawngah te pawh hian mipuiin kan mind set te kan siamthat a tul rual in, Tourism kan thlir dan pawh hi kan tihdanglam a ngai em tih te pawh hi kan ngaihtuah tur a ni a, ngaihtuah tur a tam khawp mai.

Pu Speaker, ka sawi tam tawh lo ang a, hei New Economic Development Programme kan hotuten thui tak ngaihtuahin an duang a, naktuk/naktipah hian kan Finance Minister-in Budget Speech-ah rawn puang tel se kan hotuten an ti a ni. Mi thenkhat chuan, 'a nih chuan Economic Programme in nei na nge,' tih nan lo hmangte pawh an awm a. Mahse, Economic Programme tha tak kan nei a, New Land Use Programme te leh a dang dang, allied service department atangte pawhin a lang a, chung chu a lo hlawhtling tan a. Chuvangin, New Economic Development Programme hnuaiyah hian sustainable economy, 'The way forward' road

map tha tak siamin khanga lo hlawhtling ta te hi engtingge kan sustain ang tih kha ngaihtuah a tul tawh avangin, chulam chu kan hotute, ngaihtuahna hmang thui te leh ngaihtuahna vai vir thiam ho hian an duang a. Chumi chu tunah hian a tharin kalpui kan tiam a ni.

Chutiang chuan vawiinah hian kan hotuten sustainable economy, kan hlawhtlinna hrang hrangte leh a belhchhahna tur atan kan neih theihna turin ngaihtuahna an hmang mek a. Chu chu naktipah kan hotuten an puang dawn a ni.

Tin, inthlan hi nia, Mizoram hi kan hmingthatna ber pakhat a ni a. Chuvangin inthlan, free & fair poll hi kan vawn nun reng a ngai a. Tin, khawtlang nun siamthat chungchangah pawh, zu chungchangah pawh, drugs chungchangah pawh YMA te hi kan hlawhtlinna bul an ni. Kan Police te, kan Excise lampang te an thawk tha em em chungin uniform nena an tih theih loh chin tam tak a awm a, chung chu SRS ten an thawk a, an fakawm takzet a, lawmawm kan ti a. An thawh hah tehlul nen, sum leh pai lamah te pawh kan tanpui lo zawk a. Kan hlawhtlinna sorkar ang pawhin, vawiinah khawtlang ang pawhin hnam ang pawhin khawtlang nun siam that leh hemi zu, drugs tih chungchangah hi chuan YMA, SRS tih te hi kan inngahna berte an ni. Chuvangin an chungah lawmthu kan sawi takmeuh a ni.

Tin, drugs te a lo hluar zel a, khawvel awm chhung chuan a hluar chho zel dawn a, nawhchizawrhate, zute hi a bo ngai dawn reng reng lova, khawvel a awm chhung chuan. Mahse, engtingge kan control ang a, kan buaipui loh deuh ang tih hi ngaihtuah a ngai a. Tichuan, tunah pawh hian kan mithiamten New Drug Policy te pawh an duang mek a. Chumi hnuaiah chuan a inhrem dan na zawk te, tha zawk te, chulam pang chu, chu Dan hnuaiah chuan rawn thun luh an tum a, kan hmanhmawh angreng hle a ni. Chutiang chuan khawtlang nun siam that kawngah leh he hnam hi 'hnam hrise' a lo nih theihna tur atan vaihlo zuk leh hmuam, kuhva khawr ei, ei tur dik leh eitur tha ei thiam, khatiang zawng khan kan hotuten hma an la a, tin, a pawlte pawh an awm a. Tin,

tunah chuan ram ngaw humhalh chungchangah pawh mi thahnemngai, mahnia theihpatawp chhuah engnge maw zat kan nei ta a, a lawmawm hle a ni.

Tin, Pu Speaker, a tawpna tur atan, UNO in tunah hian NLUP kan tih kha nia, National Land Use Policy an rawn tih pawh kha a tha viau a. Khatianga rawn ti tur kha an awm a nih chuan International Land Use Policy han ti se a dik leh zual tur a nia.

Tunah chuan kan va sawm leh kan va hrih hriat pawh ni loin kan hotuten Delhi-a an zuk sawina ang leh power point presentation kan zuk neih atangin mi tui tam tak an lo awm a, University of Minnesota atang pawhin Senior Researchers kan ramah chawlhkar eng maw zat an cheng a. Kan farmers te nen interaction tha tak an nei a, an hlim hle a, beiseina sang tak an nei a. Tin, chumi denchhen chuan kan Mizoram University te nen Memorandum of Understanding for co-operation te an siam a, kan University pawh hian a tangkaipui hle a ni. Chung mite chuan kan kuthnathawk mite tui dan te an rawn hmuhin tel ve tur an duh a. Tichuan, tunah hian United Nations Organization atangin Agency 4 lai an rawn lut ve tawh a. Kum 1966, 67 vel bawr laia UNO kan hriat dan nen kha chuan danglam tawh tak a ni. Tunah chuan Aizawl khawpuiah pisa an rawn hawng a, tichuan, C-in-C thlam rama vawihuih hruia UNO biak ngai tawh lovin an pisa a kalin kan be thei tawh a ni. Chutiang chuan vawiih hian NLUP pawh hi National Land Use Policy ti mai lovin International Land Use Policy an rawn ti law law lo hi an inthlahrung mah mah a ni tih ka'n sawi a ni.

Tin, kan opposition leader zahawm tak khan Pu Sangma chungchang a sawiah khan a rawn sawi a, Election Fund sum kir kha. Khami kum khan AICC Observer-in kan rama MLA inthlanah khan a lo kal a ni. Chumi tum pawh chuan hei AICC hian Observer an tir thin a. A tlangpuiin MLA ding turte hnenah sum min pe thin a ni, zep tur a awm lova. Tichuan chumi tum pawh chuan a rawn keng teuh mai a. Bial pakhatat nuai chuti zat tih ang deuh a ni. Kan hotuten, 'e, keini lamah chuan sum emaw, money power emawa mipui rilru tihchhiat kan tum lova, chuvangin kan mamawh

chin chiah sum kan la ang a, a bak chu i kir dawn nia', kan hotuten an ti a. Tin, ani pawh kha mi rinawm tak a ni a, a kir leh thlap a ni. Thenkhat chu Treasurer hnena thlen leh lo te pawh an awm nual niin ka hria a. Khatiang khan kan hotute hian Election Fund min rawn pek hi tum 3 tum 4 vel an kir tawh a ni. Chuvang chuan All India Congress Committee-ah khuan kan hotute an hming a tha hle a. Indira Gandhi phei chuan, 'Indian National Congress a awm hnu ah hetiang hi ka hriatna hmasa ber a ni', a ti a, 1984-a sum kan returned Pu Sharma a pek kha, chutiang chu a ni a. Min hriatpuitu Opposition Leader tha tak kan neite pawh hi kan vanneihna a ni.

Awle, Pu Speaker, kan member zahawm tak te, a bikin opposition lam atang te pawin a ngiaunger leh chhuan chhe zawnga sawi lova, an rilrua sincere taka tel tur awma an ngaih an rawn sawi chhuak te kha lawmawm ka ti a. Kei pawhin awmlo tih deuh deuh ka nei a, mahse a mawhphurtu ka nih angreng deuh avangin tha pawmin ka pawm mai a. Chuvangin, pass ngei ang u ka han ti ve a nih chu. Pu Speaker, ka lawm e.

SPEAKER : Aw le, tunah chuan a Motion neitu Pu R. Vanlalvena kan sawm ang a, khaikhawm se, House remtihpuina lo dil nghal mai se.

Pu R. VANLALVENA : Pu Speaker, ka lawm e. Kan Governor thusawi hi sei kan ti a, kan thusawiah pawh khan a lang tlangpui tawh a, point 56 a ni a. Vawiinah kan House Leader telin mi 16 in kan sawi a. Kan sawi tha khawp mai a, han sawi chhonzawm leh tur awm pawhin ka hre lova. Kan member ten a point kimchang takin an sawi a. Tin, a tir hawinna lamah engemaw chen chu kan sawi tawh bawk a.

Kan House Leader-in a sawi angin, thinlung tak puin i vei lam leh dinglama miten an sawi a. Inhauh buai leh engemaw han inkherna tur lai tea inkher lovin, kan hriatthiamloh laite kan sawichhuak zawk a. Chu pawh chu a hria ten tha takin an hrilhfiah zel a.

Helai point 16 leh 18-naah pawh khan, Rural Area-ah majority mipui kan cheng a, tih a ni a. 18-naah khan Urban ah population zatve kan cheng, tih a ni leh a. Khangte pawh kha kan Minister zahawm tak Pu R. Romawia'n a rawn sawifiah tawh a. Mihring pakhat kha vawi-2 chhiar a ngaihna lai a awm a. A thenah ni 100 inhlawhnaah thingtlang lama kan inchhiar laiin, thenkhatah khawpui anga kan inchhiar chang te a lo awm thin a. Kha kha a in bawhthuah deuh a ni tih kan hre tawh a.

Tin, AH & Vety Department-ah sa thar chungchangah khan a survey hun chhung a lo inbawhthuah deuh a ni tih fiah takin min hrilh tawh a, khang te pawh kha lawmawm ka ti a. Vawiinah hian sawituten rilru tha leh tuang taka kan sawi hlawm avangin lawmawm ka ti a. Chuvang chuan kan Governor thusawi hi lawm taka min pawmpui turin ka rawn sawm e. Ka lawm e.

SPEAKER : Kan Motion chu hei hi a ni. “The members of the Mizoram Legislative Assembly assembled in this session are deeply grateful to the Governor for the address which he has been pleased to deliver to the Assembly on the 15th March, 2016’ tih a ni a. Hei hi, pawm remti zawnngin ‘remti’ ti rawh u le (MEMBERS: Remti) Rem tilo kan awm em? kan awm lova. Tichuan, he Motion, ‘The members of the Mizoram Legislative Assembly assembled in this session are deeply grateful to the Governor for the address which he has been pleased to deliver to the Assembly on the 15th March, 2016’ tih chu he House hian lungrual takin a pawm a ni tih ka puang e. (Pu R. VANLALVENA: Pu Speaker, ka lawm e.)

A lawmawm a. Khami piah lamah pawh khan lawmna tur kan neih hi, India ram state-te te zinga pakhatna kan ni hrim hrim pawh hi a lawmawm tih kha he House hian hre nawn leh ila a tha awm e.

Tichuan, vawiina kan tih tur kan zo ta a. Kan chawl rih ang a, naktuk, ni 17 (Ningani) March, 2016, zing dar 10:30-ah kan kalkhawm leh dawn nia. The sitting is adjourned.

The sitting is adjourned at 4:15 PM.